

Waja



Part of the New Testament in the Waja language of Nigerea

Waja

Part of the New Testament in the Waja language of Nigerea

copyright © 2024 The Seed Company in collaboration with Language Developers and Bible Translators Association

Language: (Waja)

Contributor: The Seed Company

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

PDF generated using Haiola and XeLaTeX on 12 Jun 2026 from source files dated 9 Jul 2025

bc61fc0a-b349-5328-9699-9f7ae5bceaa7

Contents

Matayo	1
COL	64
1TH	71
2TH	77
1TI	81
2TI	89
PHM	95
JAS	97
1JN	104
2JN	111
3JN	112

Ciyei du teng a boŋngo Matayo Tosugu

Nere wu bala ciyei du teng dina wii Matayo, yo twii nere wu Yudaya, wu wiino a cudi kwatimba Yesu wa.

Ciyei du teng a wai Matayo a juƙiya kin Yesu wii Masiya wu nuwa ce ciyei yei a miringgi lakargarindi su dooi, wii yo wu nuwa bu Yudaya wa man nii kin baa wei. A jorondi tum *Ciyei du teng a wai Matayo* a pero a juku nyindi su Yesu twanga cewi tu banabindi ceji a lakargarindi su dooi. A jukuya kin Yesu twii nere wu duu Ibrahim. A jorondi tum a ce kin Yesu twii <<Bol Dawud.>> Yesu a ba yi giru Masiya, cimacima yi ku nuwa bu Yudaya wa lee jire. Anda kana yito ciyei du teng dina kingga bu yigi buru wang a bonggo nuwa bu Yudaya wa. *Ciyei du teng a wai Matayo* juƙiya kin, Yesu Masiya baa dingin nuwa bu sima wa mwa mwa, nuwa bu Yudaya wa yi pma bu yaa yoogi nuwa bu Yudaya wa. *Ciyei du teng a bonggo Matayo* a ba juƙiya dak kin Yesu twii kulum wu gira wu kangge wu jukugu yiri you yi cewi yei a juƙiya kin woo yi dimbir wang, a gwala Musa.

A miringgi *Ciyei du teng a wai Matayo* nuwa cwaanga

yiring tu Yesu juƙiya yi tu ningai a nuwo. Tu gawuri yei, Yesu a juƙi yiri a dwii cingu, a dwii nyindi su daa yei nuwa Yamba ba ninga songma yi tonoi (Pendi 5-7). Jukugi yiri a dwii nere wu dee ciyei a dwii Yesu ning wei wurai yei (Pendi 8-12). Goro yito woo yi balanggu ciyei wundu wundu a dwii Lau Yambau (Pendi 13-17). Tu nii yei dong a juƙi ninga wu daaya nuwa bu pongguwa ba ninga (Pendi 18-23). Tu cwata goroi a juƙi tu ningdu wei a daandi su cwata goroi. (Pendi 24-25.)

Yiring tu miringgi yei

Bir Yesu yi pu twiwe
1:1-2:23

Wasigu ciyei Yohanna wu
Ning Batisima 3:1-2

Batisima Yesu yi cuugu
you 3:13-4:11

Wurangi Yesu a sima
Galili 4:12-8:35.

Yesu duwe sima Galili a
baa sima Wurcalima.
19:1-20:34

Wurangi Yesu tu cwata
goroi a Wurcalima
21:1-27:31

Piingu Yesu a yeu yi
boori Yeji 27:32-66

Wunggu Yesu boore yi
juku buri yei nuwa
28:1-20

Dinendi kakaa Yesu wa

¹ 21Tina kuƙi kakaa Yesu

Masiya wa, * wu twii kaka
Dawud, wu yoogi kaka
Ibrahim.

2 Ibrahim twii mbaa Icahu,
Icahu mbaa Yakubu,
Yakubu mbaa Yahuda yi
ciyamba ya,

3 Yahuda mbaa Perisa yi
Serah wu njaa pmo
wii Tamar,

Perisa mbaa Esruna,
Esruna mbaa Aram.

4 Aram mbaa
Amminadab,
Amminadab mbaa
Nacon,

Nacon mbaa Salmon,

5 Salmon mbaa Boasa
wu njaa yo wii Rahab,
Boasa mbaa Obed wu
njaa yo wii Rut,

Obed mbaa Jesse,

6 Jesse mbaa balaa
Dawud.

Dawud twii mbaa
Solomon, wu njaa yo
nang twii nure Uriya,

7 Solomon mbaa
Rehoboam,

Rehoboam mbaa Abija,
Abija mbaa Asa,

8 Asa mbaa Jehocapat,
Jehocapat mbaa Joram,
Joram mbaa, Ussiya,

9 Ussiya mbaa Jotam,
Jotam mbaa Ahas,

Ahas mbaa Hesekiya,

10 Hesekiya mbaa
Manassa,

Manassa mbaa Amon,

Amon mbaa Josiya

11 Josiya mbaa Jekoniya
yi ciyamba ya, a jor
du nuwa kura pma
kewuri Babila.

12 Goro kewuri pmai a
Babila,
Jekoniya mbaa
Ceyaltiyal,

Ceyaltiyal mbaa,
Serubabel,

13 Serubabel mbaa
Abiud,

Abiud mbaa Eliyakim,
Eliyakim mbaa Asor,

14 Asor mbaa Sadok,
Sadok mbaa Acim,
Acim mbaa Eliyud,

15 Eliyud mbaa Eliyasar,
Eliyasar mbaa Matan,
Matan mbaa Yakubu,

16 Yakubu mbaa Yusupu
bwiya Maryamu, wu
bi Yesu wu nuwa yiri
kin Masiya.

17 Dingin toso toso bonggo
Ibrahim bee bonggo Dawud
twii kaka kwap sur ni,
pero toso bonggo Dawud
bee jor du mwatanga Babila
twii kaka kwap sur ni,
pero toso jor mwatangu
Babila bee jor Masiya twii
kaka kwap sur ni.

Bir Yesu Masiya

18 Tina nyinou wu nuwa
bi Yesu Masiya. Njaa yo
Maryam ninga leengi
laabwiya yi Yusupu, pu boo

* **1:1 1:1** Masiya: Din Masiya nuwa yiri mwaasi kin Kristo. Kristo too nyan Elina wa, pitindi din yei twii nere wu nuwa parman yo nunggu a dwii. Nang a bonggo nuwa bu Yudaya wa pma parman nere wii nunggu a dwii dingin ba jukuya kin twii nere wu Yamba seka dingin ba yo balaa. A jor du Yamba ninga alkawal kin yo tumo wej nere mirima, dingin ba baa, ba mira nuwa ya, pero ba de pma lau Yambau, nere wu Yamba tumo wej wii nuwa yiri kin Masiya. Pero din yei Kristo. A jukuya Yamba seka yo, pero tumwe,

de bu yo a nyingga woo yi
rwii a bonggo Bawei du
Walwal.

¹⁹ Anda Yusupu twii nere
wu nyaa yaa kasi ba
dwiyyanga yo melma cudu
nuwai, a kasa ba man yo
tukugi.

²⁰ Anda pu woo danggu
yito, bacama Mbaa Wu Gira
a bammanuwe yo a
miringgi dweendi kin,
<<Yusupu bol Dawud, nuu
yaa gwasi degu Maryam ba
yoo nure mo, dingin tu
miringgi pwii yei too a baa
bonggo Bawei du Walwal.

²¹ Yo biru wei bwiya, ma
jee ru wei din min Yesu,[†]
dingin yo miru wei nuwa ya
bonggo welemdi pmai.>>

²² Mwa mwa too a ningwa
palaka ba twanga tu Mbaa
Wu Gira ce a bonggo banabi
kin,

²³ <<Bweecanga ning wei
rwii, pero biru wei bwiya,
nuwa yiri wei din yei kin
Immanuwel,>> pitindi yei
kin, <<Yamba woo kem yi
yo.>>

²⁴ Pu Yusupu romwa, a
ninga tu bacama Mbaa Wu
Gira sa yo, a dee Maryam ba
yo nure yo.

²⁵ Anda yaa ku daa yi yo,
kopo jor du bi bol yei. Pero
a jee din kin Yesu.

2

*Bagu kulumba bu som yiri a
dwii bajwari wa*

¹ Goro pu nuwa bi Yesu a
Baitalami a sima Yudaya wa

a jor du Balaa Hiridus jeegi
lau, nuwa bu kangga
twiyongo donome bu som
yiringi a dwii bajwari a
baanga Wurcalima

² a pira kin, <<Pu nuwa bi
balaa wu nuwa bu Yudaya
wa a piyau? Yi ko bajwali
yo a donome yi baanga
dingin yi kuraman yo
sima.>>

³ Pu balaa Hiridus nuwa
yito, gaanggu you bwiiwa
kem yi nuwa bu Wurcalima
wa mwa mwa.

⁴ A yiwe bagiraa kuruwa
wa yi kulumba teeringi wa,
a pira pma pu nuwa biru
wei Masiya.

⁵ Pma leeman yo kin, <<A
Baitalami sima Yudaya wa,
dingin tina tu balgi miringgi
lakargar banabi kin,>>

⁶ <<Anda mo Baitalami bu
sima Yahuda wa,
ma yaa yoogi wu
banyina miringgi
lauri tu Yahuda,
a miringgi mai balaa twiwe
wei,
wu yoo wei taage nuwa
muwa Israila.>>

⁷ Anda Hiridus yiwe
kulumba bwii tukugi ba pira
jor du bajwale wii twiwe.

⁸ A tum pma Baitalami a
sa pma kin, <<Ambira bu
kasa pu nuwa bi bwiya wii.
Ka bu nyinggi ba bu sangge
palaka mi mwa n angge n
kuraman yo sima.>>

⁹ Goro pu pma nuu
balaau, pma taa nyinou,
bajwale wu pma ko a

[†] 1:21 1:21 Yesu too din Elina wa cika Jocuwa yi nyan Yudaya wa pitindi yei twii
Mbaa Wu Gira wu yi mirma

donome wii a songma
gawur pmai ba tin tiyei pu
nuwa bi bwiya wii.

10 Pu pma ko bajwale wii
pma twangwa yi buri
degdeg.

11 Pma teendo laa wii a ko
bwiya wii kem yi njaa yo
Maryam, anda pma kundi
kwiyei kuraman yo sima.
Pero pma pera swarindi
pmai a nyii nii sinariya yi
turala wu teng yi nyinou ku
nuwa yiri kin mirr.

12 Nuwa ningaman pma
dikacene a miringgi
dweendi ba pong yaa
bonggo Hiridus, pma pong
nyinou wu kanggu a
waatanga buri sima pma.

*Yusupu yi nur yo ceendo
Masar*

13 Pu pma mwatangu,
bacama Mbaa Wu Gira baa
bonggo Yusupu miringgu
dweendi, a see kin. <<Wuni
ma de bwiya woo kem yi
njaa yo ma amna Masar. Ma
sin siyei pwii kopo jor du sa
minai, dingin Hiridus kasi
wei bwiya woo ba ji yo.>>

14 Bur a wuni a de bwiya
wii yi njaa yo yi kum wii a
mwati Masar,

15 a sin siyei pwii kopo jor
du Hiridus bwaa. A ningwa
yito palaka ba twanga tu
Mbaa Wu Gira a ce nyan
banabi kin, <<N yiwe bol mi
a Masar.>>

16 Pu Hiridus kuranga
kulumba bwii welenga yo, a
suko kwang kwang, a diina
nuwa ba laca bakor
nambirmba bu Baitalami yi

gorondi tu worigi yo bu mila
rop yi bu mildi pmai dwalna
wa, cuungi jor du kulumba
sa yo labar wii.

17 A jor dwii yiri tu banabi
Irmiya cei a twangwa.

18 <<Nuwa nuu miu a Rama,
wiindi yi bwiyang
gaanggu wang

Rahila wiindi dingin kwaraa
ya
a kwaa kin nuwa ba
doromini ya
dingin pma yaa mere.>>
*

*Yusupu yi nur yo waatanga
Nasaret*

19 Goro pu Hiridus bwaa
bacama Mbaa Wu Gira
bammanuwe Yusupu
miringgi dweendi a Masar

20 a ce kin, <<Wuni ma de
bwiya woo kem yi njaa yo,
ma amna sima Israila,
dingin nuwa bu kasigu jigu
bwiya woo wa, a
bwaanga.>>

21 Dingin tono a wuni, a
de bwiya wii kem yi njaa yo
a aara sima Israila.

22 Anda ku nuwa kin
Arkilawus jeegi lau a
Yudaya a candu mbaa yo
Hiridus, a nuu gwasi ba
aara pwii. A aara sima Galili
yake ku nuwa ningaman yo
dikacene a dweendi.

23 Anda a aara sin siyei a
gwei du nuwa yiri kin
Nasaret. Too a ningwa yito
dingin ba twanga tu
banabindi ce kin, <<Nuwa
yiru wei kin Nasarin.>>

3

Yohanna wu Ningi Batisima menenga nyinou

¹ A swii daandi Yohanna wu Ningi Batisima a baa, a wasigu ciyei a gulai Yudaya,

² a cegu kin, <<Bu ninga bwiiwa bonggo welemdi mbiri, dingin lau ku diyau a ninga nem.>>

³ Yohanna wii yo wu banabi Icaya ce ciyei a dwii yei, pu ce kin,

<<Miu ku yigu yiru a miringgi gulai,
Bu carman nyinou Mbaa Wu Gira,
Bu curman nyindi yei tek!>>

⁴ See Yohanna menenggi yi kuri nggelai, bogi pii yi biyau, jeendi yei twii juwai yi niyari.

⁵ Nuwa tum a twiyongo Wurcalima, yi Yudaya, yi gorondi mwa mwa tu nem yi you ku Urdun a aanda bonggo you.

⁶ Pma ninggu bwiiwa bonggo welemdi pmai, a ningaman pma batisima a you Urdun.

⁷ Pu Yohanna ko Parisayo yi Sadukayo bagu bonggo you dingin ba ningaman pma batisima, a sa pma kin, <<Mba coogindi su bwii wu sambira kin bu cembir bal Yambai su soo baa we?>>

⁸ Bu ninga ningandi tu jukuru wei kin bu ninga bwiiwa a bonggo welemdi mbiri.

⁹ Anda bu danggi ya a gaanggu mbiru min Ibrahim

twii mbaa mbire. N woo sagumbiru Yamba woo yi dimbire ba waata swaringi tina ba yo kwaraa Ibrahim!

¹⁰ Nuwa gicila cenni nyan cunau a pii sou, kana kono sou ku twiya bu tutwiyari tu nyaayi buri nuwa ba kaca ba manna bwalau.

¹¹ <<N ningambiri batisima yi gundu ba jukuya kin bu ninga bwiiwa, anda wu kangge woo baa goro mu ninga mbiru wei batisima yi Bawei du Walwal yi bwalau. Yo gwalangge yi giru, n yinnibu kana paari yei n de.

¹² Yo tagi kaa tena yo yetu wei jama ya, pero ba kuranga goma ya, ba tena bindou you, anda taaru wei pudi yei yi bwalau ku yaa dumdu.>>

Yohanna ningaman Yesu Batisima

¹³ A dwii jore Yesu duwe sima Galili a baa you Urdun dingin Yohanna ba ningaman yo batisima.

¹⁴ Anda Yohanna kwaa, a see kin, <<A daaya mo, ma ningangin batisima, dingin ca ma bagu bonggo mu?>>

¹⁵ Yesu leeman yo kin, <<Yama ba ningwa yito. Dingin tagi yi twanga tu Yamba kasi.>> Bur Yohanna a lee.

¹⁶ Pu nuwa ningaman Yesu batisima, twiigu gundu kwii, kinangu, bur diyau wum buri, a ko Bawei Yambai julomanuwe cika bamolo a tina dwii yei.

¹⁷ Bur miu twiiwe diyau kin, <<Ma Bol mi, wu n

kangne, n ningi buri degdeg
yi mo.>>

4

Cuugu Yesu

¹ A dwii jore Bawei du
Walwal a de Yesu gulai
palaka Balaa Buwai ba cuu
yo.

² Goro pu ninga daa kun
nii kume yi nyanggu yaa tu
jei, Yesu nuu june.

³ Bur Balaa Buwai baa
bonggo you a see kin, <<Ka
ma yoogi Bol Yamba wei
diin swaringi too ba waka
buri, ba yoo kumaa.>>

⁴ Anda Yesu leeman yo
kin, <<Lakargar Yamba ce
kin, <Nere na yili yi kumaa
yi wundu, anda yi kana
dono ciyei du baa bonggo
Yamba.>>>

⁵ Pero Balaa Buwai a de
Yesu Wurcalima, gwei du
walwal, a cenna pu
dekerger Laa Yambau,

⁶ a sa yo kin, <<Ka ma
yoogi Bol Yamba wei, yarwe
poo, dingin balgi miringgi
lakargar Yamba kin,

<Yamba nyii wei bacamandi
yei teere a dwii mai,
pma kangaminu wei a
war pmai,

dingin ma buni ya kana
namau a swelei.>>>

⁷ Yesu leeman yo kin,
<<Lakargar Yamba a ce kin,
<Ma cuu ya Mbaa Wu Gira
Yamba mo.>>>

⁸ Bambang Balaa Buwai
de Yesu a cingu ku
getengteng a juku yo lauri tu
simai yi yilau yau mwa
mwa.

⁹ Balaa Buwai see kin, <<N
nyii minu wei tina yiringi
mwa mwa ka ma kun
kwiyei ma kurangin sima.>>

¹⁰ Yesu leeman yo kin,
<<Mwati poo Balaa Buwai!
Lakargar Yamba ce kin, <Ma
nyii giru Mbaa Wu Gira
Yamba mo, ma kuraman yo
sima yo wundu.>>>

¹¹ Bur Balaa Buwai a du
Yesu, anda bacamandi
baanga pma kalanga yo.

Yesu toso wurai yei a Galili

¹² Pu Yesu nuwa kin nuwa
manni Yohanna a jarum, a
aara sima Galili wa.

¹³ Yo yaa ku si siyei
Nasaret anda a mwati si
siyei a gwei Kaparnahum,
gwei du nem yi kalinggu ku
Galili, a sima Sabulun yi
Naptali.

¹⁴ Too yiri ningwa yito
palaka ba twanga tu banabi
Icaya cei.

¹⁵ <<Sima Sabulun yi sima
Naptali,

a nyinou wu aari
kalinggu, ku yero you
Urdun,

yi Galili, sima nuwa bu
yaa yoogi nuwa bu
Yudaya wa!

¹⁶ Nuwa bu pisindi pu rim
wa
kwee wei rangu wu
girau.

Pma bu pisindi sima bu yi
kumjila booru wa,
Rang swii pma.>>

¹⁷ Toso dwii jore Yesu toso
wasigu ciyei yei, <<Bu ninga
bwiiwa bonggo welemdi
mbiri dingin lau ku diyou
ninga nem!>>

Yesu yi kwatimba ya bu gawuriyo wa

¹⁸ Pu Yesu woo songma ging kalinggu ku Galili, a ko nuwa rop ciyamba buri twii nuwa bu ree jindu wa, Simon wu nuwa yiri kin Bitrus yi ciya yo Andarawus, a regu jindi a kalinggu yi lemu.

¹⁹ Yesu sa pma kin, <<Bambe bu pongge, n juku mbiri wei regu nuwau.>>

²⁰ Yoko yoko pma du lemdi pmai, a pong yo.

²¹ Yo jee gawure a ko bu kangga rop ciyamba buri, Yakubu yi Yohanna, kwaraa Sabadi wa. Pma miringgi konggoru kem yi mbaa pmo Sabadi, pma menenggu lemdi pmai. Yesu yiwe pma,

²² pma duu konggoru wii mbaa pmo, yoko yoko pma pong yo.

Yesu mira nuwa bu yi buwangi wa

²³ Yesu wora Galili, a jukugu yiringi nuwa a girindi kuri pmai, a wasigu ciyei du teng a dwii lau Yambau, pero a mira nuwa bu yi buwangi wundu wundu yi buri wulok wa pma yilanga.

²⁴ Labar yo wasi buri sima Siriya wa mwa mwa, dingin tono nuwa ninga pu demuwe yo nuwa mwa mwa bu yi buwangi wundu wundu wa bu cusanggu bonggo buwangi wundu wundu yi bu buri mwaanga buru wa, nuwa bu yi wuturindi wa yi bu yi toki

wa, yi bu buri borgi wa Yesu mira pma mwa mwa a yilanga.

²⁵ Nuwa tum pong yo, toso sima Galili yi sima bu yi Gorondi Kwap wa, yake Wurcalima, yi Yudaya yi sima bu donome yi Urdun wa.

5

Wasigu ciyeu a cingu

¹ Pu Yesu ko nuwa tum kuranga buri a geero cingu, a sin siyei. Kwatimba ya kuranga buri worigi yo,

² anda a toso pirgu pmau.

³ <<Wuure bonggo pma bu som dwal pmai du bawei, lau ku diyou kwii kopinau!

⁴ Wuure bonggo pma bu yi bwiyanggu gaanggu wa,

Yamba diramanu wei pma gaanggu!

⁵ Wuure bonggo pma bu yi cingon dwiu wa, pma kinggu wei sima!

⁶ Wuure bonggo pma bu nuu jun ninggu pisu wu nyaau a gawuri Yambai, Yamba yaminu wei pma biiki pmo gekrek!

⁷ Wuure bonggo pma bu nuu bunam bu kangga, Yamba nuu wei bunam pmau!

⁸ Wuure bonggo pma bu yi gaanggu walwal, pma kwee wei Yamba!

⁹ Wuure bonggo pma bu teci naapu wa,

Yamba yiru wei pma
kin kwaraa ya!

10 Wuure bonggo pma bu
nuwa turongo pma
dingin ningu pisu wu
nyaau a gawuri
Yambai,
lau ku diyou kwii ko
pmau!

11 <<Wuure bonggo mbiru
ka nuwa rweembiri, turo
mbiri pero ciyei kana kono
duu yiri tu bwii a dwii mbiri
kin dingin bu ponggu mu.

12 Bu ninga buri degdeg yi
dirang gaanggu, dingin
woriri mbiri tum a pwii
diyou. Too tu ningaman
banabindi su gawuri yi mba.

Bimakwana yi rangu

13 <<Bu yoogi
bimakwanaa nuwa mwa
mwa. Anda ka bimakwanaa
cwaani buri yi teng you,
nuwa puunu wei teng you
kwii nye? Yo ninga
kwecekwece, bur nuwa ba
par siyau sima ba peenga.

14 <<Bu yoogi rangu wu
sima mwa mwa. Gwei du
mogi dwii cingu yaa tukuri.

15 Yaa nere wu kucin
bwalau kendabwala ba
summo yi takale, anda
nuwa cenni pu dekerger,
dingin ba nyii rangu kana
we wu laa wii.

16 Yito mwaasi rang mbiru
ba swii buri bonggo nuwau,
palaka ba ko wurangi mbiri
tu nyaayi tu bu ningi, ba
terenga Mbaa mbire wu
diyou.

Pirgu yiringi a dwii teere

17 <<Bu dangani ya min n
baa palaka n woo siyei
Teere Musa yi yiring tu
banabindi balai. N baa bu n
woo siyei, anda n twanga.

18 N woo sagumbiru jire
kopo ka diyou yi sima woori
buri, kana gon ciyei diino,
kana jokugu ku banyinau,
yaa ku woo wei buri
miringgi Teeringi Yambai
kopo ka yiringi too mwa
mwa ningdi buri.

19 Dingin tono kana we
wu paa teere diino du
banyina a miringgi teeringi,
pero pir bu kangga ba ninga
yito, yoo wei wu banyina a
lau ku diyou, anda kana we
wu ponga pero piryo yoo
wei wu gira a lau ku diyou.

20 N woo sagumbiru jire,
ka pisu mbir wu nyaau a
gawuri Yambau gwala bu
kulumba teeringi wa yi
Parisayo ne, bu tembiri lau
ku diyou.

Pirgu yiringi a dwii sukom

21 <<Bu nuu tu Yamba sa
kaka yiwa nang kin, <Ma
jiri ya nere, kana we wu
ninga, nuwa ningamanu wei
yo bali.>

22 Anda n woo sagumbiru
min: Kana we wu suko yi
bagon yo nuwa ningamanu
wei yo bali, kana we wu yi
bagon yo kin, <Ner wu nyo,>
nuwa der wei gawuri
bagiraa nuwa bu Yudaya
wa, pero kana we wu yi
bagon yo kin bapime yannu
wei par bwalau.

23 Ka ma wuni nyiigu nii
Yamba a kwaare anda ma

danggi min bagon mo woo
yi yiri yi mo,

²⁴ ma du nii mai a gawuri
kwaare, ma mwati ma
nuwanga bagon mo anda
ma waata ba ma nyii nii mai
Yamba.

²⁵ <<Ka bacen mo der
kwaram mo a gireng balu,
kasa bu nuwanga jor du bu
boo nyinou, pu bo bu laman
bu laa balu. Ka yito ne
deminu wei bonggo nere wu
ning bali, wii yo wu deminu
wei bonggo bagiraa, pero
nuwa manminu wei jarum.

²⁶ N woo sagumbiru, yaa
ku ma twii wei pwii, kopo
ka mo yar kana ca tu nuwa
mwar minai.

Pirgu yiri a dwii taari

²⁷ <<Bu nuu tu Yamba ce
kin, <Ma ningi ya taari.>

²⁸ Anda n sagumbiru min,
kana we wu suwa nure yi
miyam a gacila ninga taari
yi yo a gaanggu.

²⁹ Ka nung mo wu jeu
diimini wei welem wei, ma
yikiyo ma man siyei! Kujang
ma yaa bonggo wu kangge a
buri mai yiku buri mai mwa
mwa nuwa manminu wei
bwalau ku yaa dumdu.

³⁰ Ka wai mau wu jeu
diimini wei welem wei, ma
mwariya ma man siyei!
Kujang ma yaa bonggo wu
kangge a buri mai yiku buri
mai mwa mwa nuwa
mannu wei bwalau ku yaa
dumdu.

*Pirgu yiringi a dwii jigu
laabwiya.*

³¹ <<Cegi kin, <Kana we ka
man nure yo kopo ka nyii
lakargar jigu laabwiya.>

³² Anda yoko n woo
sagumbiru min, kana we wu
man nure yo, yaa dwii taari
ne, a diina nure yo ba ninga
welem taari, pero kana we
wu yiki nure wu nuwa
mana a ninga taari.

Pirgu yiringi a dwii wera

³³ <<Pero bu nuu tu
Yamba sa kakaa yiwa nang
kin, <Ma kiyani ya wera mo,
anda ma ninga tu ma
weranga gawuri Mbaa Wu
Gira.>

³⁴ Yoko n sagumbiru, bu
ningi ya wera a dwii kana
ca. Bu wereni ya yi diyoo,
dingin twii candu Lau
Yambau

³⁵ kana yi sima pu cenni
mwar yei, kana yi
Wurcalima, dingin twii gwei
Balaa wu Gira.

³⁶ Bu ningi ya wera kana
yi dwii mai, dingin bu puwi
wakugu kana kuu kuri kiino
polo polo kana pitipiti.

³⁷ Yama <Ong,> mbire ba
yoo <Ong,> pero <<Ang
Ang,>> mbir ba yoo Ang
Ang.> Kana ca tu bu ce ka
gwal yito a baa bonggo wu
bwiye wii.

*Pirgu yiringi a dwii yagu
gerou*

³⁸ <<Bu nuwa cegi kin,
<Nunge nyan nunge, pero
nwii nyan nwii.>

³⁹ Anda yoko n sagumbiru
min, ma yari ya gerou
bonggo nere ning tu bwii.
Ka wu kangge kapa mini

dwang mo_wu jeu ma
wakaman yo_wu kanggi_wii
mwaasi.

⁴⁰ Ka nere_wu kangge_kasi
der kwaram mo_a laa balu
palaka ba yiya min cacuwe
mau, ma murman yo_
gatangamau mwa.

⁴¹ Ka kana we_kica min
songma nyan mel wiino ma
amna nyan mel rop.

⁴² Ka kana we_ka senggi
yiri_bonggo_mou, ma puwa
yo, ma jari ya nere_wu baa
kasigu_cine_bonggo_mou.

Ma kangman bacemba ma

⁴³ <<Bu nuwa cegi_kin,
<Ma kangman bapun mo,
ma kwaa bacen mo.>

⁴⁴ Anda yoko_n sagumbiru
min, bu kangman bacemba
mba, bu ceman pma kuru
pma bu turo mbir wa,

⁴⁵ palaka bu yo_kwaraa
Mbaa mbir wu diyou.

Dingin yo_diini nyanggu
swiiri nere_wu bwiiye_yi
nere_wu nyaa, pero diini
gundu yar man nere_wu
ning_pisu_wu nyaau a
gawuri_Yambai_yi pma bu
yaa ning_pisu_wu nyaau a
gawuri_Yambai.

⁴⁶ Ka bu kangman nuwa
bu kang mbiri_wa tibak,
woriri_yei ca tu bu king wei?
Kana nuwa bu yiri_janggal
wa mwa, ning_yito!

⁴⁷ Anda ka bu cir_basimba
mba tibak, tu bu ninga
tweeyei ca? Kana nuwa bu
som bu Yamba wa ning_yito!

⁴⁸ Tagi bu siya cimacima
cika ku Mbaa mbire_wu
diyou cimacima.

6

Nyigu nii bu yaa tono wa

¹ <<Bu ruun tuwe, bu
ningi ya wurangi tu nyaayi
min palaka nuwa ba ko. Ka
bu ning_yito yaa ku bu
nyingu_wei woriri_bonggo_
Mbaa mbire_wu diyou.

² <<Dingin_yito_ka bu nyii
yiri_nere_wu yaa tono_bu
teeri_ya, cika ku nuwa bu yi
batal wa ningu_a miringgu
girindi_kuri_yi nyindi. Pma
ningi_yito palaka nuwa ba
wandi pma. N woo_
sagumbiru_jire_pma nyingga
woriri_pmai.

³ Anda ka bu kalan nere_
wu yaa tono, kana basin mo_
wu nem ba som ya,

⁴ palaka nii_mai ba yoo_
tukugi. Mbaa mo_wu kweeyi
tu tukugi nyiiminu_wei_
woriri.

Pirgu yiringi a dwii cegu_kuru

⁵ <<Ka bu wuni cegu_kuru
bu ningi_yaa cika nuwa bu
yi batal wa! Pma kasi_ba ce_
kuru_a pitindi_a girindi_kuru
yi gengelte nyindi, palaka
kana we_ba ko pma. N woo_
sagumbiru_jire, pma gicila
nyingga woriri_pmai mwa

⁶ Anda mo, ka ma wunni
cegu_kuru, ma dimno kane,
ma laka nyinou, ma ce_kuru_
bonggo_Mbaa mo_wu nuwa
yaa kweeyi. Mbaa mo_wu
kweeyi tu tukugi nyiiminu_
wei_woriri.

⁷ <<Ka bu wunni cegu_
kuru bu ningi ya pu
perenggu, cika ku nuwa bu

som bu Yamba wa ningu,
pma nuu cika Yamba nuu
wei pma dingin cewi pmai
tu cokurok.

⁸ Bu ning ya yito dingin
Mbaa mbire a som tu bu
kasigi yake pu bo bu senggo
bu yo.

⁹ Tina nyinou wu bu ce
wei kuru:
<<Mbaa yire wu woo diyou,
nuwa ba nyii giru din mai.

¹⁰ Lau mou ba baa,
dangandi mai ba ningwa
sima,
cika ku ningu buru a
diyou.

¹¹ Ma puu yir jeendi tu reni.

¹² Ma para sukom welem
yiru,
cika ku yo mwa yi
paraman sukom
pma bu wele yiru wa.

¹³ Ma de yiri ya bonggo
miyam,
anda ma mira yiro
bonggo wu bwii wii.

¹⁴ <<Ka bu par sukom pma
bu ninga mbir welem wa,
Mbaa mbire wu diyou yika
mwaasi para mbir wei
sukom welem mbiru.

¹⁵ Anda ka bu kwaa pargu
sukom pma bu wela mbir
wa, yito mwaasi Mbaa
mbire yaa ku para mbiru
wei sukom welem mbiru.

Pirgu yiri a dwii degu cooji

¹⁶ <<Anda ka bu der cooji,
bu bwiyani ya gaanggu cika
nuwa bu yi batal wa. Pma
caari kau palaka kana we ba
ko kin pmai degi cooji. N
woo sagumbiru jire pma
gicila nyingga woriri pmai
mwa mwa.

¹⁷ Anda ka ma der cooji
ma car kau mau, ma swati
dwii mai,

¹⁸ dingin nuwa ba som ya
kin ma degi cooji buri Mbaa
mo, wu nuwa yaa kweeyi,
yo som wei. Anda Mbaa mo,
wu kweeyi tu tukugi
nyii minu wei woriri.

Nyaa ku diyou Yambau

¹⁹ Ma ruumani ya buri
mbiri gina a sima, pu bobo
yi saasa bwianu wei, pero
kuuwa kinggu wei nyinou
ba jinda.

²⁰ Anda bu ruu man buri
mbiri gina diyou Yambau,
pu bobo yi saasa na
bwiyani, pero kana kuuwa
na pu repugu ba jinda.

²¹ Dingin pu gina mo woo
miru, gaanggu mou koo
pwii.

Rangu buru

²² <<Nundi twii
kendabwala buru. Ka nundi
mai kundi wang, mwa mwa
buri mai twanggi yi rangu.

²³ Anda ka nundi yaa
kundi ne, buri mai mwa
mwa si wei yi kumjila.
Dingin tono ka rang wu buri
mai twii kumjila wei,
kumjila wu ma miri wang!

Yamba yi gina

²⁴ <<Yaa nere wu
kuramanu wei sima nuwa
bu girawa rop, ma
kangmanu wei wiino, ma
kwaa wu kangge. Ma cedo
wu wiino, ma pong wu
kangge. Yaa ku ma
kuramanu wei sima Yamba
bambang ma kuraman sima
kene.

25 *Ding*in tono n woo sagumbiru, bu miyani ya buri yi piima mba, yi yiri tu bu jee wei yi tu bu naa wei, kana see wu bu teeru wei a buri. Piima gwala bu jeendi ru? Buri gwala bu see ru?

26 Bu suwa yidi, pma yaa piri yaa kaci, pero yaa gamani ba parna bindou, anda Mbaa mbire wu diyou pu pma jeendi! Bu gwala bu yidi kwaara ru?

27 Wii we a cudu mbiri *ding*in miyanggu buru puu wei cwatugu kana daa kiino a miringgi daa yo?

28 <<Anda *ding*in ca bu miyani buru *ding*in see? Bu suwa pundi tu gulai giri, yaa pu ninggu kana ca *ding*in buri pmai, yaa pu ba ninga waandi *ding*in buri pmai.

29 Anda n woo sagumbiru kana Balaa Solomon yi gir you mwa ninga bu waandi sii yilau cika tono.

30 Ka cembere Yamba pu ningaman sii tu gulai waandi tu too reni anda punge nuwa parnu wei bwalau, dwiyaman mba tee mbiru wei see, mba bu yi dwal leegu jire.

31 <<*Ding*in tono, bu miyani ya buri, bu cegu min, <Tu yi jee wei ca? Tu yi naa wei ca? Tu yi teeru wei ca?>

32 Nuwa bu pma som bu Yamba wa, a kasangu too yiringi mwa mwa, Mbaa mbire wu diyou a som biiki mbire.

33 Anda tu gawuriyo, bu kasa lau you yi pisu wu nyaau a gawuri yei, anda yo

nyimbiri wei too yiringi mwa mwa.

34 *Ding*in tono bu miyani ya buri yi punge, punge a yi biiki yo. Kana kono nyangu yi biiki yo.

7

Bu ningamani ya nuwa bali

1 <<Bu ningamani ya bali nuwa, palaka Yamba ba ninga mbir ya bali,

2 *ding*in Yamba ning mbir wei bali yito cika ku bu ningaman bali nuwa. Yi bosoro wu bu cuuman nuwa yi tono, Yamba cuu mbiri wei yi tono,>>

3 *Ding*in ca mo sugu bosiyau ku nung bagon mou, anda ma yaa kogu gulsou wu nung mou?

4 Ningdu wei nye ma sa bagon mo min, <Yama n deman bosiyau ku nung mou,> anda mo yiri mai ma woo yi gulsou a nung mo?

5 Mo wii batal, ma toso demanggu gulsou wu nung mou bati, palaka mo kwee wei sima kundi, ma podoman bagon mo bosiyau ku nung you.

6 <<Bu nyi ya bairi yiri tu walwal. Ma mandi ya siyei gisi tu yi pircu a gawur bakambi su lai, pma penu wei yi mwari pmai! Anda ba waata bonggo mou ba pwara mina.

Ma celo, ma kasa, ma kupo

7 Bu ninga pu celo, nuwa nyimbiri wei. Bu ninga pu kasigu, bu nyinggu wei. Bu

ninga pu kupugu, nuwa wunmbiru wei.

⁸ Dingin kana we wu celo, nuwa nyii wei. Kana we wu kasa, nyinggu wei, pero dong kana we wu kupo, nuwa wunmanu wei yo.

⁹ Mba kwiimba, wii we a cudu mbiri wu ka bol yo cel yo kumaa, nyii wei swel?

¹⁰ Pero ka cel yo jingne, nyii wei coogu we?

¹¹ Ka mba bu bwiiwa bu som nyiiigu tu nyaayi kwaraa mba wei, dwiyamin Mbaa mbire wu diyoyu, yo nyii wei yiringi tu nyaayi nuwa bu senggu yo wa!

¹² Dingin tono, cika ku bu kasi nuwa ba ningambira, yito mwa bu ningaman pma, too pitindi teering Musa yi banabindi.

Nyinou wu lepek yi wu gurcik

¹³ <<Bu tembiro nyinou wu gurcik. Dingin nyinou wu lepek der nere par bwalau, pero nuwa tum teendi.

¹⁴ Anda nyinou wu banyinau pero gurcik twii nyinou wu der nere piima, anda nuwa banyina tibak kinggi.

Bu som wei nuwa bonggo wurangi pmai

¹⁵ <<Bu ruun tuwe bonggo banabindi leendi wa. Pma baanga wei bonggo mbiru a miringgi biyau cika puuri, anda a miringgi pmai twii geppindi.

¹⁶ Bu kuranu wei pma bonggo tutwiyari pmai. Yaa ku nuwa war wei tutwiyari

inabi a bonggo kurille, yito mwa yi pwaari pwalgu a bonggo sou calau.

¹⁷ Yito mwaasi yi kana konou sou ku nyaau nyii tutwiyari yei, anda sou ku bwii nyii tutwiyari tu bwii.

¹⁸ Sou ku nyaau yaa nyii tutwiyari tu bwii. Yito mwa sou ku bwii yaa nyii tutwiyari tu nyaayi.

¹⁹ Kana konou sou ku yaa nyii tutwiyari tu nyaayi nuwa kacinu wei sima ba manna bwalau.

²⁰ Yito mwaasi, bu kuranu wei pma bonggo tutwiyari pmai.

²¹ <<Yaa kana we wu yinggi kin, <Mbaa Wu Gira, Mbaa Wu Gira,> diiru wei lau ku diyoyu, anda buri nere wu tum dangandi Mbaa mi wu diyoyu.

²² A nyangu balu, nuwa tum sanggu wei kin, <Mbaa Wu Gira, Mbaa Wu Gira, yi ce tu ningdu wei pina yi gawuri a miringgi din mai, yi din mai yi yikongo wuturindi, yi ninga yiringi riyandi buri tum.>

²³ N saru wei pma gembel min, <N tii bu songgumbiru. Bu laanga poo bonggo mu, mba nuwa bu tum tu bwii wa.>

Ba mweme wu pwiyaagi yi wu yaa pwiyaagi

²⁴ <<Dingin tono kana we wu nuu ciyei mi pero ningi wurai yi tono cika nere wu pwiyaagi wu monni laa you dwii sweli.

²⁵ Pu gundu toso yarugu, youri twanganga, wutur baa

a buu laa wii anda yaa ku yarau, dینگin nuwa man taayau dwii sweli.

²⁶ Anda kana we wu nuu ciyei mi anda yaa ku nginga wurai yi tono cika nere wu yi cini wu monni laa you a swai.

²⁷ Pu gundu toso yarugu, youri twanganga, pero wuture nginga, a buu laa wii, a yara, yarangu you a nginga wang.>>

²⁸ Pu Yesu mata cegu to yiringi, nuwa bwii riyanga buri yi yiringi tu jukugu,

²⁹ dینگin a jukugu yiringi cika nere wu yi dimbire, yaa cika kulumba teeringi pma wa.

8

Nere wu yi butangi

¹ Goro pu Yesu julo cingu kwii, nuwa tum pongwe yo.

² Nere wu kangge wu yi butangi baa bonggo you a kun kwiyau a ce kin, <<Mbaa Wu Gira, ka ma lee, ma mirangge n yila a bonggo butangi mi.>>

³ Yesu a yaku wai a cerman yo, a see kin, <<N lee, yila!>> Yoko yoko butangi twii a du nere wii.>>

⁴ Yesu sa yo kin, <<Ma sari ya kana we too yiri. Anda ma amna ma juku buri mai kuru Yamba ba suwa mina, pero ma nyii nii du Musa ce kin nuwa ba nyiia, dینگin ninggu walwal. Ma nginga yito dینگin nuwa ba soma kin ma yila.>>

Leegu jire bagira kacaraa wu Roma

⁵ Pu Yesu diiro Kaparnahum, kacala Roma wa wu kangge baa kinga yo a senggo yo kin,

⁶ <<Nere wu gira, kewe mi woo pidau lai, buri yei borgi a cusugu wang.>>

⁷ Yesu see kin, <<N anggu wei n mira yo.>>

⁸ Bagira kacaraa wii ce kin, <<Ang ang yaa yito Mbaa Wu Gira, mi yinnibu ma baa laa mu, anda mo ce ciyei tibak, kewe mi yi wei.

⁹ Dینگin mi mwa n woo kuu nere wu kangge, pero dong n woo yi kacara kuu mu, ka n sar wuna min, <Amna,> yo ba aara, wu kangge dong n see min, <Bame!> bur ba baa, pero ka n sar kewe mi min, <Nginga yiri nyo!> Bur ba nginga.>>

¹⁰ Pu Yesu nuwa yito, a riyanga buri, a sa nuwa bu ponggu yo wa kin, <<N woo sagumbiru jirei yaa ku n nyingga nere wu leegu jire ku yi dimbire cika kinaa a Israila.

¹¹ N woo sagumbiru nuwa tum baanga wei bonggo donome yi nyambirangu ba sindi siyau, a jegu a naagu kem yi Ibrahim yi Icahu yi Yakubu a lau ku diyau.

¹² Anda pma bu daaya ba teendo lau ku diyau nuwa parnu wei pma kumjila, pu pma jii wei wiindi yi dumonggu nyiyau.>>

¹³ Anda Yesu sa bagira kacaraa wii kin, <<Mwati lai, cika ku ma pu jire nindu wei

yitō.>> Anda kewe bagira
kacaraa wii a yila kinangu.

Yesu mira nuwa tum

14 Yesu aara laa Bitrus, a
kingga sii Bitrus wu nure a
pidau yi buri wulok.

15 A mwaanga wai yau,
bur buri wulok swii man yo,
a wuni, a ningaman yo
jeendi.

16 Ku lam nyambirangu
nuwa demuwe Yesu nuwa
bu yi wuturindi wa tum.
Yesu yikongo wuturindi yi
ciyei tibak, a mira pma bu
yaa cingcing wa pma
yilanga mwa mwa.

17 Too ningwa yitō palaka
ba twanga tu banabi Icaya
ce kin,
<<A de dwal buri cingcing
yiru
yi buwangi yiri.>>

Ponggu Yesu yi buu

18 Pu Yesu kuranga kin
nuwa tum wora yo, a sa
kwatimba ya kin ba yerongo
gingu kalinggi kwii.

19 Kulum teeringi a baa
bonggo yau a ce kin,
<<Kulume, mi pongminu
wei kana piyau pu mo amnu
wau.>>

20 Yesu nyii lee kin,
<<Bapirmisindi boo yi
boring pmai, yidi mwa yi
cwaaringi pmai, anda Bol
Nere yaa pu daa miru.>>

21 Wu kangge cudi
kwatimba ya a ce kin,
<<Mbaa Wu Gira, dungge
bati n angge n tingwe mbaa
mi.>>

22 Yesu see kin,
<<Pongguwe du nuwa bu
bwanggi wa ba tingi
kappima bu bwaanggi wa.>>

*Yesu yera wuture yi gwerai
gundi*

23 Yesu diiro konggoru
anda kwatimba ya pong yo.

24 Yaa temandi bur wutur
gundu a wunuwe. Gwerai
gundi a paringgu gundu a
miringgu konggoru, anda
Yesu a diima.

25 Kwatimba ya aanda
bonggo you a romya pma ce
kin, <<Mbaa Wu Gira, mira
yiro, yi bwanu wei.>>

26 <<Yesu sa pma kin,
<<Dingin ca bu nuugu gwasi,
mba bu leegu jire mbiru
banyina wa?>> Bur a wuni a
yera wuture yi gwere gundu
dwii, bur a sin siyei tok.

27 Kana we riyanga buri
kin, <<Kinaa kono duu
neru? Wu kana wuture yi
gwerai gundi ningi
pongondi yi yo!>>

*Yesu yil nuwa rop bu yi
wutur wa*

28 Pu Yesu aara bonggo
sima Gadara* a ging
kalinggi kwii, a kaanga yi
nuwa rop bu twiyongo
dwiiyongi puringi, nuwa
bwii yi wuturindi. Pma yi
kwei wang dingin tono yaa
nere wu pong wii nyinou.

29 Pma ninga duwai
kinangu kin, <<Bol Yamba
ma kasigu ca yi yo? Ma baa
pina ma turo yiro bo jor lam
bu ru?>>

* 8:28 8:28 Lakargarindi su kanggi a bala kin sima Gargasinau bu kangga bala
kin sima Garasinawa

30 Kan bakambi su lai soo nem yi poo wii, a taagu taawu.

31 Wuturindi swii senggo Yesu kin, <<Ka ma yiki yire ma suka yiro yi teendo miringgi bakambi su lai swii.

32 Yesu sa pma kin, <<Bu ambira>> Pma twiyongo, teendo bakambi su lai swii. Mwa mwa kan bakambi swii a mwatanga kilang kilang a julomana cerau a yaramana gundu a bwaamana a miringgi.

33 Nuwa bu taagu bakambi su laa swii pma ceendo gwei, pma nyii nuwa labar yiringi tu ningwai yi nuwa bu yi wuturindi bwii.

34 Kana we a miringgi gwei dwii, a mwati dingin ba kanga yi Yesu, anda pu ko yo a senggo yo ba du sima pma.

9

Yesu mira nere wu buri borigi

1 Yesu geero konggoru a waata buri, a yeri bonggo kalinggi a aara gwei yei.

2 Nuwa demuwe yo nere wu buri borigi a pidau yuu. Pu Yesu ko leegu jire pmau, a sa nere wu buri borigi wii kin, <<Ciko gaanggu bol mi, nuwa paramin sukom welemdi mai.>>

3 Kulumba teeringi wa bu kanga yanna cegu ciyei yi buri pmai kin, <<Nere woo bwiyanggu din Yambai!>>

4 Yesu kuranga tu pma dangangi a ce kin, <<Dingin

ca bu danganggu yiringi tu bwii a gaanggiri mbiri yito?

5 Tu leelee tono, yiku n sa nere wo min, <N paramin sukom welem mau,> yi ku n see min, <Wuni ma ninga songma?>

6 Anda n kasi bu soma min, Bol Nere woo yi dimbire a sima ba para sukom welem.>> Anda a sa nere wu buri borigi wii kin, <<Wuni, ma de yuu mau, ma mwati lai.>>

7 Nere wii wuni, a mwati laa yuu.

8 Pu nuwa bu kurangi buri ko yo, pma nuu gwasi, pma teranga Yamba dingin woo dimbire wu nyii nuwa.

Yesu yi Matayo

9 Yesu du poo wii, anda pu songmau, a ko nere wu yiri janggal wu din yei Matayo, a pisu pu nuwa yiri janggal. A see kin, <<Pongguwe.>>

Matayo wuni, a pong yo.

10 Pu Yesu woo jegu jeendi laa Matayo, nuwa bu yiri janggal wa tum yi nuwa bu kanga bu yi welem wa pma baanga je jeendi kem yi yo yi kwatimba ya.

11 Parisayo bu kanga ku ko yito pma pira kwatimba ya kin, <<Dingin ca kulum mbire a jegu jeendi yi nuwa yir janggal yi bu yi welem wa?>>

12 Pu Yesu nuwa, a sa pma kin, <<Nuwa bu cingcing wa yaa kasi kulume, bur nuwa bu yaa cingcing wa.

13 Ambira bu yesa tu lakargar Yamba cej, <Tu n

kasi twii nuwa ba juki
bunam, twii nyigu nii ne.>
N baa bu dingin nuwa bu
ningi pisu wu nyaau a
gawuri Yambai anda n baa
dingin nuwa bu yi welem
wa.>>

Pira dwii degu cooji

14 Kwatimba Yohanna wu
Ningi Batisima baanga
bonggo Yesu a pira kin,
<<Dingin ca yo yi Parisayo
yi ning cooji nyikirik anda
kwatimba ma yaa ningi?>>

15 Yesu nyii lee kin,
<<Ningduwe nye basinba
laabwiya wa ba de cooji pu
bo woo kem yi bwiya wu
laabwiya weyo ru?>> Anda
daandi soo baayi su nuwa
demanu wei bwiya wu
laabwiya weyo a bonggo
pmau, bur pma ningi wei
cooji.

16 <<Yaa wu cwakinu wei
see wu puca a dwii wu
milga, ka nindi yito wu
nuwa cwakina wii
kwaciranu wei see wii ba
diina ba pwarwa wang.

17 Pero yaa nere wu deru
wei gundu inabi ku pucu ba
parna cweindi biyari tu
milgai, ka nindi yito gundu
inabi ku puci kwii, repanu
wei cweindi biyari twii,
pero gundu inabi kwii ba
par siyau. Anda nuwa ba
parna a cweindi biyari tu
puci, mwa mwa pmau ba
ningga kundi.

*Bweecanga nere wu gira yi
nur wu mwaanga
gangamau Yesu*

18 Pu Yesu woo cegu tina
yiringi, nere wu gira wu
gireng kuru a baa bonggo
you a kun kwiyau gawuri
yei, a ce kin, <<Bweecanga
mi a bwaa yoko kina, bame
ma cenni wai wuni wei yi
piima.>>

19 Yesu wuni a pong yo,
kem yi kwatimba ya.

20 Nur wu kangge wu tiigu
kuulu yi buwai pargu siyei
tiimau nyan mildi kwap sur
rop, a baa gorou Yesu a pilo
nyan gangamau you.

21 A sa buri yei kin, <<Ka n
pili kana gangamau you, n
yilu wei.>>

22 Yesu waka kau a ko yo,
a ce kin, <<Bweecanga mi
ciko gaangu, leegu jire mau
a miramina.>> A dwii jore
nure wii ninga cingcing.

23 Pu Yesu lama laa nere
wu gira wu gireng kuru, ku
ko nuwa kwarindi yi bu
kangga wuugu bagaati
boore,

24 a ce kin, Kana we ba
twiyo. <<Bweecanga woo
yaa bwaagi, a diima!>> Pma
rii yo.

25 Ku nuwa yiku nuwa
bwii twalange, Yesu tee wai,
a wuni.

26 Labar yo wasi buri kana
piyau a sima bwii.

Yesu mira kerma rop

27 Pu Yesu du poo wii,
kerma rop pongu yo pma
ningu duwau a cegu kin,
<<Bo! Dawud, nuu bunam
yiru!>>

28 Pu Yesu diiro laa wu
pisu miri, kerma bu rop
bwii baanga bonggo you

anda a pira pma kin, <<Bu lee jirei n puu wei kalanggi mbir du?>>

Pma leeman yo kin, <<Ong nere wu gira.>>

²⁹ Yesu mwaanga nundu pmai a ce kin, <<Yama ba ningwa cika ku bu lee jirei!>>

³⁰ Nundi pmai toso kogu. Yesu sa pma kin, <<Bu sari ya kana we!>>

³¹ Anda pma mwatanga a wasi ciyei dwii Yesu kana piyau a sima bwii.

Yesu mira nere wu yaa ce ciyei

³² Pu pma twiyongo, nuwa bu kangga dee nere wu yaa ce ciyei dingin yi wuturindi a bonggo Yesu.

³³ Anda ku Yesu yiki wutur wii, nere wii toso cegu ciyeu, kana we riyanga buri pma ce kin, <<Yaa ku yi tij kogu yiri cika tina a Israila!>>

³⁴ Anda Parisayo ce kin, <<Twii bagira wuturindi a nyii yo dimbire ba yiki wuturindi.>>

Yesu nuu bunam nuwau

³⁵ Yesu wora gorondi tu girai yi tu nyititi. A jukugu yiringi a girindi kuri pmai, a wasigu ciyei du teng a dwii lau Yambau pero a mira nuwa tum yi buwangi wundu wundu yi buri wulok pma yilanga.

³⁶ Ku ko nuwa kuranggi buri tum, a nuu bunam pmau dingin pma tiigu kuulu pero tetenggi, yaa

nere wu kalanu wei pma, cika puuri su yaa taage.

³⁷ A sa kwatimba ya kin, <<Jama bu biya wa a ninga tum, anda nuwa bu kaci wa ninga banyina.

³⁸ Dingin tono, bu senggo Nere wu kondo wa yau ba tumuwe nuwa wura wa a kondo you.>>

10

Yesu tum kwatimba kwap sur rop

¹ Yesu yiwe kwatimba ya kwap sur rop pweyau piinou, a nyii pma dimbire ba yiki wuturindi pero ba mira kana konu du buwai.

² Tinaa dinendi nuwa tumandi wa Yesu wa bu kwap sur rop wu gawuriyo wii Simon, (wu nuwa yiri kin Bitrus) yi ciya yo Andarawus, Yakubu bol Sabadi yi ciya yo Yohanna,

³ Pilibus yi Bartalamawus yi Toma yi Matayo wu yiri janggal, yi Yakubu bol Alpayo, yi Tadawus,

⁴ yi Simon wu yi bwiiu dingin sima ya yi Yahuda Iskariyoti wu cuu Yesu.

⁵ Nuwa bu kwap sur rop bu Yesu tuma bwii a nyii pma dikacene kin, <<Bu ambir ya bonggo nuwa bu yaa yoogi nuwa bu Yudaya wa, yi gorondi nuwa bu Samariya wa.

⁶ Bu ambira bonggo nuwa bu Israila wa bu liyanga cika puuri su yaa taage.

⁷ Ambira bu wasi ciyei min, <Lau ku diyou ninga nem!>

8 Bu mira bu yaa cingcing wa, bu wumongo bu bwaanga wa, bu mira babutanga, pero bu yikongo wuturindi. Nuwa nyiimbira nyo bu nyiia nyo.

9 Bu deri ya sinariya yi asurpa, yi kana kene a swari mbire,

10 bu deri ya swari songmai kana landari rop yi paari, yi jwalu dingin nere wurai a yinno nuwa ba nyii jeendi.

11 <<Ka bu tembiro gwei du girai yi du banyinai bu kasa nere wu yi mbir wei bu sindi siyei a pwii kopo nyangu ku bu duru wei poo wii.

12 Ka bu tembir laa wii bu ci pma.

13 Ka nuwa bu laa wii yoo bu nyaa wa, yama pidau gaangu mbiru ba siya bonggo pmau, ka kwaai yama pidau gaangu ba waata buri bonggo mbiru.

14 Anda kana piyau pu nuwa kwaa yigu mbiru pero kwaa ba ka twiyau yi mba, bu kapa gur du mwar mbiri, ka bu dur gwei dwii.

15 N woo sagumbiru jire, a nyangu balu, Yamba nuu wei bunam nuwa bu Sodom yi Gomora yiku ba nuu bunam gwei dwii!

Tigu kuule ku ko baawu

16 N woo tumgu mbiru cika puuri a cudi geppindi. Bu yoo pwiyangi cika coogindi pero tok cika bamori.

17 Bu sindi siyei cipigi buri, nuwa rembiru wei, ba dembira laa balu pero ba wacambira wei a girindi kuru.

18 Nuwa dembiru wei gawuri gomnandi yi balamba dingin mi. Anda too yoo mbiru wei nyinou wu bu wasiri wei ciyei du teng a dwii mi a bonggo balamba yi nuwa bu yaa yooi nuwa bu Yudaya wa.

19 Ka rembiri bonggo balu bu domi ya buri min tu bu ce wei ca yi kanda ku bu ce wau, ka jori yei lami Yamba nyiimbiri wei tu bu ce wei,

20 dingin bwii mba bu cegu ciyei ne anda twii Bawei Mbaa mbiri a cegu ciyei a miringgi mbiru.

21 <<Ciyate nyii wei ciya yo nuwa ba jiyo, yito mwa mbaate yi bol yo. Kwaraa wunmanu wei kwiimba diinu wei nuwa ba laca pma.>>

22 Nuwa mwa mwa kwaambiri wei dingin mi. Anda kana we wu boo gaangu lam nyangu ku pungu nyingu wei mirma.

23 Ka pma turo mbiri dina gwei bu cembro du kanggi. N woo sagumbiru jire yaa ku bu mati wei worugu gorondi Israila Bol nere baa wei.

24 <<Nere wu tilanggu yiru yaa gwali kulum yo, kewe yaa gwali nere wu gira yo.

25 Nuwa bu tilanggu yiringi wa a daaya ba ninga cika kulum pmo yito mwa kewaa a daaya ba ninga cika

nere wu gira pmo. Ka nuwa yiri nere wu gira wu laa kin, Baalsabul, gwalanga nuwa bu laa wii wa, nuwa yiru wei pma yi din du gwala doo!

Wu daaya yi gwas

²⁶ <<Bu nuu ya gwas nuwai. Yaa yiri tu sumgi tu nuwa na wumdi, pero yaa yiri tu tukugi tu nuwa na soni.

²⁷ Yiri tu n sa mbiru kume, bu wasiri wei yi nyanggu. Pero yiri tu bu sewai a tweendi mbiri, bu teeru wei dwii kani.

²⁸ Bu nuu ya gwas nuwa bu jiri buri wa anda yaa ku puu jigū bawei, waka bu nuu gwas Yambai, yo wu puu bwiyanggu mwa mwa buri yi bawei a pari bwalai.

²⁹ Nuwa yaa cuuri banyili nyan kobo rop ru? Anda yaa banyili su yari sima yaa kem yi somgu Mbaa mbiru.

³⁰ Kana kuri mbiri tu dwii a som kuçi yei.

³¹ Dingin tonon, bu nuu ya gwasi dingin bu gwala banyili wang.

³² <<Dingin kana we wu ce cudu nuwa kin yo wongge, mi mwa n ningi wei yito a gawur Mbaa mi wu diyau.

³³ Anda kana we wu gwelengge a gawuri nuwai, mi mwa n gwelu wei yo a gawuri Mbaa mi wu diyau.

N dee bu pidau gaanggu, anda buri kasigar

³⁴ Bu dangani ya min n baa dingin n dee pidau gaanggu a sima. Ang ang, n

baa bu n dee pidau gaanggu, anda n dee kasigar.

³⁵ N baa n din cere <Cudu nere yi mbaa yo, bweecanga yi njaa yo, siite wu nure, ning wei cere yi sii yo wu nure

³⁶ bacen mo wu bwiiye yo wei a miringgi laa mau.>

³⁷ <<Kana we wu kangman mbaa yo yi njaa yo gwalanggi yaa ku yinno yoogu kwaa mi, ka kangman bol yo wu nambare yi wu nure gwalanggi yaa ku yinno ba yoogu kwaa mi.

³⁸ Anda kana we wu de bu yeu you, ba pongguwe yinnibu yoogu kwaa mi.

³⁹ Kana we wu nyingga piima ya mandu wei siyau, kana we wu mansi yei piima ya dingin mi nyinggu wei.

Yigu woriri

⁴⁰ <<Kana we wu yimbira a yingge, kana we wu yingge a yi wu tunguwe.

⁴¹ Kana we wu yi banabi, dingin twii banabi, yo yiri wei woriri banabi. Pero kana we wu yi nere wu nyaa dingin twii nere wu nyaa yiri wei woriri nere wu nyaa.

⁴² Kana we wu puu gundu naagu wu wiino wu banyina a miringgi bu yoogi kwatimba muwa, n woo sagumbiru jire, yiru wei woriri yei.>>

11

Yohanna tum nuwa bonggo Yesu

1 Goro pu Yesu mata nyiigu kwatimba ya dikacene, a du poo wii a mwati gorondi tu nem a wasigu ciyeu yi jukugu yiringi.

2 Pu Yohanna woo jarum a nuu yiringi tu Masiya ninggu, a tum kwatimba ya,

3 ba pira Yesu kin, <<Woo mo wu bagu wii ru? Yikwii yi yam wu kanggu ru?>>

4 Yesu sa pma kin, <<Bu waatanga bu sa Yohanna yiringi tu bu nuu wai yi yiringi tu bu koi,

5 kerma boo kogu simau, guwongi boo ninggu songmau, babutanga boo yilangu, bapimba boo nuugu simau, nuwa bu bwaanggi wa a wunonggu yi piima, pero nuwa boo wasiman ciyei du teng bakuuluwa.

6 Yamba diiman wuure pma bu waatan bu yi gorou dingin mi wa.>>

7 Pu kwatimba Yohanna wa mwatanga, Yesu toso sugu ciyei nuwa bu kuranggi buri wa a dwii Yohanna, <<Bu ambira sugu ca a gulai? Bu ambira sugu siyang tu cokurok tu wutur mwangu ru?

8 Ka yaa yito ne bu twiyongo bu ko ca ki? Nere wu pargi see wu nyaa ru? Yaa yito nuwa bu pari see wu nyaa boo caame balambai.

9 Min na, bu twiyongo bu ambira sugu cau? Banabi ru? N woo sagumbiru, yo a gwala banabi.

10 Wunaa yo Yohanna wu Lakargar Yamba ce ciyei dwii yei kin,

<N tummo wei nere tumandi mi gawuriyo yi mo,

wii yo cardu wei nyinou dingin bagu mou.>

11 N woo sagumbiru jire a miringgu nuwa bu nurumba bi pma wa, yaa wu gwala Yohanna wu Ning Batisima yi giru. Anda wu banyina a lau ku diyou Yambau a gwala Yohanna yi giru.

12 Toso jor du Yohanna wu Ning Batisima wasi ciyei, baa dina jore lau ku diyou a tii kuule, nuwa bu bwii wa kasa ba jee yi dimbire.

13 Mwa mwa banabindi yi teeringi Musa a ce ciyei dwii lau ku diyou kopo jor Yohanna,

14 ka bu kasi bu yi ciyei dwii wei, Yohanna woo Iliya, wu banabindi ce bagu you.

15 Yama nere wii twendi dingin nuugu, ba ka twiyau.

16 Anda Yesu je gawure yi ciyei kin, <<N cipiranu wei nuwa bu sina daandi yi ca? Pma cika bakwara pisindi nyan lummou. A yiyangu buri pmai a cegu kin,

17 <Yi wuu mbiri bagaati, bu kwa sigu kolou!

Yi pii mbiri pii boori, bu kwaa wiye.>

18 Pu Yohanna baa yaa jee jeendi, yaa naa gundu inabi, anda bu cegu min, yo woo yi wuture.

19 Bol Nere a ba a jegu a naagu, bu cegu min, <Suwa yo woo yi swawu a jegu, a

naagu, yo yoogi basin nuwa bu yiri janggal wa, yi nuwa bu yi welem wa.> Anda pwii Yambai jukur kin twii jire a bonggo wurang yei.

Gwei du kwaa leegu jireu

²⁰ Nuwa bu gorondi tu Yesu ninga yiringi riyandi buri tum dwii yaa ku ninga bwiiwau, dingin tono a yerenga gwei dwii.

²¹ <<Ai mba! Nuwa bu Korasin. Ai mba! Nuwa bu Betsaida! Dingin wurang riyandi buri tu nuwa ninga a miringgi mbiri, ka nuwa na ninga a Taya yi Sidon wei, pma na ninga bwiiwa kilang, na tee gusuringi pero na parni buro dwii pmai!

²² N woo sagumbiru, a nyanggu balu, Yamba nuu wei bunam nuwa bu Taya yi Sidon yiku ba nuu bunam mbiru.

²³ Bika nuwa bu Kaparnahum, bu dangani min nuwa dembiri wei diyoo ru? Kana banyina, waka nuwa julumbiri wei Hades!* Ka yiringi riyandi buri tu nuwa ningai a bonggo mo, ka na ningwa Sodom wai, reni pma na boo!

²⁴ N woo sagumbiru a nyanggu balu, Yamba nuu wei bunam gwei Sodom yiku ba nuu bunam mbiru.

Bambe bonggo mu bu yorongga

²⁵ A dwii jore Yesu ce kuru kin, <<Mbaa, mo Mbaa Wu

Gira wu yi diyoo yi sima, n wanamina, dingin mo tuko tina yiringi a bonggo pma bu pwiyanggi wa yi bu yi somandi, anda mo juku bakwara bu nyititi wa.

²⁶ Yito Mbaa, too yiringi ningwa cika ku mo kasu.

²⁷ Mbaa mi nyiinggi yiringi mwa mwa. Yaa nere wu som Bwiya wii bur Mbaate, pero yaa wu som Mbaate bur Bwiya wii yi bu Bwiya wii kasa ba juku pma Mbaa yo.

²⁸ <<Bambe bonggo mu, mba bu janganga pero deegi see komburom wa, n nyii mbir wei yoronggu.

²⁹ Bu dee sou garama mu pero bu tilanga bonggo mu dingin n bubuk yi dwii du cinggai, pero bu nyinggu wei yoronggu bonggo bawei.

³⁰ Dingin sou garama mu yaa komburom, see wu n ceri mbiri wei sakirak.>>

12

Pira dwii nyanggu sabadu

¹ A dwii jore Yesu songma a koondi alkama nyanggu sabadu, kwatimba ya nuu june pma cora alkama a woo.

² Ku Parisayo ko, pma sa Yesu kin, <<Suwa! Kwatimba ma ninggu yiri tu teeri yiri jee kin nuwa ba ning ya nyanggu sabadu!>>

³ A leeman pma kin, <<Celeke bu tii bu cegu yiri tu Dawud ninga pu yo nuu

* 11:23 11:23 Hades pwii pu nuwa bu bwaanggi wa sii miru

june yi basinba songma ya wa ru?

⁴ Yo diiro Laa Yambau, yo yi barauwa ya pma jee kumaa wu coogi, kana ku teere jeu pma ba jee ya, bur kuruwa Yamba wa ba jee.

⁵ Pero yaa ku bu tii bu cegu miringgi teere Musa kin kuruwa Yamba wa pma pari teere a laa Yambau nyangu sabadu anda kana yito pma yaa welem.

⁶ N woo sagumbiru woo yi wu kangge a pina wu gwala Laa Yambau yi giru.

⁷ Lakargar Yamba ce kin, <Tu n kasi twii nuwa ba juki bunam, twii nyigu nii ne,> ka bu som too yiringi yaa ku bu ningamanu wei nuwa bali min yi welem anda yaa welem.

⁸ Dingin Bol Nere twii Mbaa Wu Gira nyangu sabadu.>>

Yesu mira nere wu wai borgi nyangu sabadu

⁹ Pu Yesu du poo wii, a aara diiro gireng kuru pma,

¹⁰ woo yi nere wu wai borgi pwii. Pma dwaagu ba nyingga yo yi welem. Pma pira yo kin, <<Teere yiri jee nuwa ba miri ya nere nyangu Sabadu ru?>>

¹¹ Anda a lee man pma kin, <<Yikwii wii we a cudu mbiri ka puuri yo yanni bou nyangu sabadu na taa ba yiki we?>>

¹² Anda nere gwala bu puure kwaara ru? Ong teere lee nere ba ninga yiringi tu nyaayi nyangu sabadu.>>

¹³ Bur a sa nere wii kin, <<Tari wai mou.>> Nere wii tari wai you, bur wai you waata buri cingcing cika wu kanggu wii!

¹⁴ Anda Parisayo a twiyongo twalange palaka ba kasa nyindi su pmai jiru wei Yesu.

Yesu kewe wu Yamba seka

¹⁵ Yesu som tu pma kasigu ninggi. Dingin tono a du poo wii, nuwa tum pong yo. A mira pma bu yaa cingcing wa mwa mwa, pma yilanga.

¹⁶ A nyii pma dikacene kin, ba ce ya ka yo we wei.

¹⁷ Too a twanga yiri tu banabi Icaya ce a dwii yei kin,

¹⁸ <<Suwa kewe mi wu n seka.

Wii yo wu n kangman yo,

wu dirangin gaangu.

N diinu wei Bawei mi a miringgi yei,

anda yo sar wei jire nuwa bu sima wa.

¹⁹ Yaa ku ningu wei gwela kana ba wun miu you a nyindi.

²⁰ Yaa ku penu wei bu yaa cingcing wa,

kana ba nuu buu nuwa bu yaa dimbire wa,

kopo ka diini jirei je gawure.

²¹ Anda miringgi din yei nuwa bu sima wa mannu wei nii.

Yesu yi Baalsabul

²² A dwii jore pma demuwe Yesu nere wu kangge wu yi wuturindi twii kermo pero yaa ce ciyei.

Yesu mira nere wii palaka
ba ko pero ba nuu sima.

²³ Nuwa bwii riyanga buri
a pira kin, <<Yikwii woo
Yesu Bol Dawud ru?>>

²⁴ Anda ku Parisayo nuwa
yito pma ce kin, <<Mwele,
nere wo, woo Baalsabul
tibak, bagira wuturindi, a
nyii yo dimbire ba yiki
wuturindi.>>

²⁵ Anda Yesu kuranga
dangandi pmai, yo sa pma
kin, <<Kana kono lau ku
cwaanga buri rop bagu cere
yi buri pmai, ko lau bwii ru
wei, yito mwa yi kana dono
gwei kana laa ka cwaani
buri bagu cere yi buri pmai
wo laa na tin tiyei.>>

²⁶ Anda ka Balaa Buwai
yikir Balaa Buwai, a
cwaanga buri yei, a bagu
cere yi dwii yei. Lau you
ning wei nye ba tin tiyau?

²⁷ Ka n yikigu wuturindi
yi dimbire Baalsabul wei,
nuwa mba rei? Pma yikiri yi
dimbir we? Dingin tono,
pma ningi mbiru wei bali.

²⁸ Anda ka n yikiri
wuturindi yi dimbiri Bawei
Yamba wai, lau Yambau baa
dwii mbiri.

²⁹ Bang bang, yaa neru wu
puu wei dimma laa nere wu
yi dimbire ba dee see yo,
kopo ka twali neru wu
dimbir wii bati, anda ba puu
degu see yo.

³⁰ Nere wu yaa kem yi mi,
yo bagu cere yi mi, nere wu
kalanggu bu kuranggu, yo
weenggu siyau.

³¹ <<Dingin tono n
sagumbiru, Yamba

paramanu wei sukom
welem di nuwa yi kana ca tu
bwii tu pma ce wei, anda
kana we wu ce ciyei du bwii
a dwii Bawei du Walwal,
Yamba na paraman yo
sukom welem you.

³² Kana we wu ce ciyei du
bwii a dwii Bol Nere Yamba
paramanu wei yo sukom
welem you, anda kana we
wu ce ciyei du bwii a dwii
Bawei du Walwal Yamba na
paraman yo sukom welem
you, kana sina daandi kana
daandi su baai.

³³ <<Nuwa kuran sou
bonggo tutwiyari yei. Ka sou
kundi tutwiyari yei ning
wei kundi. Ka sou yaa kundi
ne, tutwiyari yei na ningi
kundi.>>

³⁴ Mba coogindi su bwii!
Nindu wei nye nuwa bu
bwiwa cika mba ba ce tu
kundi? Yiring tu nere ciyei
twiiwei miringgu gaanggu
you.

³⁵ Nere wu nyaa ning
wurang tu nyaayi, dingin
wurang tu nyaayi twiiwei
miringgu gaanggu you. Nere
wu bwiiye ning wurang tu
bwii, dingin wurang tu bwii
twiiwei miringgu gaanggu
you ku bwii.

³⁶ Anda n woo sagumbiru,
a nyanggu balu nuwa nyii
wei lee a dwii kana dono
ciyei du nyoi du pma cei.

³⁷ Dingin gon ciyei du bu
cei pera mbir wei bonggo
bali pero twala mbir wei
bonggo balu.>>

Somdi Yunana

38 Nyanggu ku kanggu kulumba teeringi wa yi Parisayo pma baanga bonggo Yesu a ce kin, <<Kulume, yi kasi ma juku yir somdi yiri riyandi buri.>>

39 Yesu nyii pma lee kin, <<Mba nuwa bu bwii wa bu sina daandi wa, bu yaa gwasi Yamba wa, bu kasi yiri somdi riyandi buri, yaa ku n ningambiri somdi riyandi buri ka gwal tu banabi Yunana.

40 Dingin cika ku Yunana woo pwii jingne wu dudu yo nyan daa kunong yi kum kunong, yito Bol Nere ningi wei daa kunong miringgu sima nyanggu yi kume.

41 Nuwa bu Ninebe wa baa tindi tiyandi kem yi mba nuwa bu sina daandi wa a nyanggu ku Yamba ningamanu wei bali nuwa, pma sambiri wei kin bee welem, dingin pma ninga bwiiwa a jor du Yunana wasiman pma ciyei Yambai, nere wu gwala Yunana woo pina.

42 Balaa wu nure wu sima bu taadi wa, ba tiro tiyei kem yi mba nuwa bu sina daandi a nyanggu ku Yamba ningamanu wei bali nuwa, yo sambiri wei kin bee welem, dingin yo duwe sima ya kwaara dingin ba baa nuu pwii Balaa Solomon, anda nere wu gwala Solomon woo pina.

43 <<Ka wutur twii buri neri, mwatir pu yaa gundu a

kasanggu pu yoronu. Ka yo kingga bu ne,

44 yo ba ce kin, <N waatu wei buri a laa mu wu n twiwe miru.> Ka baa kinggi laa wii candigi, pero menengi yaa tu kanggi,

45 bur yo ba waata ba de kapina wuturindi a nibiyo su gwala yo yi tuwe baa ba sindi siyau a pwii. Cwata goro you, pisu nere wii gwalu wei pisu you wu gawuriyo yi bwiiige. Tinaa kanda ku nindi wei yi pma nuwa bu bwiiwa bu sina daandi wa.>>

Njaa Yesu yi ciyamba ya

46 Pu Yesu woo cegu ciyei yi nuwa tum njaa yo yi ciyamba ya boo pitindi twalange, kasi ba sa ciyei.

47 Wu kangge cudu pmai sa Yesu kin <<Njaa mo yi ciyamba ma boo pitindi twalange kasigu ba ce ciyei yi mo.>>

48 Yesu pira kin, <<Njaa mi wii we? Ciyamba muwa bwii bu we?

49 Bur a juka kwatimba ya a ce kin, <<Bu suwa tina njaa mi yi ciyamba muwa.

50 Kana we wu tum dangandi Mbaa mi wu diyou twii ciya mi wu nure yi wu nambare yi njaa mi!>>

13

Balanggu ceu a dwii bajome wu waci duu

1 A nyanggu kwii Yesu duu laa wii a mwati a sin siyau ging kalinggu.

² Nuwa tum kuranga buri bonggo you, dingin tono a geero konggoru, a sin siyau pwii. Nuwa pma ka pitindi gingu.

³ A sa pma yiringi tum yi balanggu ciyeu kin, <<Bu ka twiyau! Nere wu kangge a de duu aara wacigu kondo you.

⁴ Pu woo wacigu duu kwii, goma bu kangga yaramana dwii nyinou, yidi baa kwama.

⁵ Bu kangga yaramana pu yi swaringi, pu yi swai banyina. A boro kilang kilang dingin swai dwii yaa tum.

⁶ Anda pu nyanggu biya a kusuwa dingin yaa swandi.

⁷ Goma bu kangga yaramana pu yi turi, turi twii gira, a kicanga pma.

⁸ Goma bu kangga dong yaramana sima bu nyaa wa, a biyo a gwala tu nuwa waci daa kuno kunong yi kun nokono, yi woon woon.

⁹ Yama nere wii twendi dingin nuugu, ba ka twiyau.>>

¹⁰ Kwatimba ya baanga pira yo kin, <<Dingin ca ma cee ciyei yi balanggu ciyeu ka ma pirgu yiri nuwa?>>

¹¹ Yesu nyii lee kin, <<Mba, Yamba leembira, bu som tu tukugi tu lau ku diyou, anda bu kangga yaa yito.

¹² Kana we wu woo yi tono nuwa cwatamanu wei yo ba ninga tum. Kana we wu yaa yiri dong, kana tu

woo yi tonoi nuwa yiyamanu wei yo.

¹³ Too tu diinai n nindi wurai yi ciyei du balanggai, Dingin pma suwi, anda pma yaa kweeyi.

Pma nuwi, anda yaa kar twiyau kana ba kuranga.

¹⁴ A twanga tu banabi Icaya ce a dwii pma kin, Bu ning wei pu nuugu anda bu kurani, Bu ning wei pu suugu anda bu kwei.

¹⁵ Dingin nuwa boo gaanggiri pmai cingcing pero twendi pmai yaa nuu sima, pma lakanga nundu pmai.

Ka yito ne pma kwee wei sima yi nundi pmai, pero nuu wei sima yi twendi pmai, ba kuranga yi gaanggiri pmai,

ba waatanga bonggo mu palaka n mira pma.>

¹⁶ <<Anda wuure bonggo nundi mbiri dingin bu kweeyi pero twendi mbiri nuuwi.

¹⁷ N woo sagumbiru jirei, banabindi tum yi nuwa bu nyaa wa tum kasa kogu yiringi tu bu kogu tina anda pma ko bu, a kasa pmai nuu yiringi tu bu nuugu, anda pma nuu bu.

¹⁸ <<Yoko bu ka twiyau pitindi ciyei du balanggai dwii bajoome a pigu yiru.

¹⁹ Goma bu yaramana a nyinou wa twii nuwa bu

nuu ciyei lau diyou anda yaa ku kurangau . Bur Balaa Buwai ba a yiyaman siyei a miringgi gaanggu pma.

²⁰ Goma bu dwii swaringi wa twii nuwa bu nuu ciyei dwii, a yiya yoko yoko yi buri degdeg.

²¹ Anda yake ku yaa swandi ko, yaa ku siya wang. Pu kuulu yi cusugu bammanuwe pma dingin ciyei dwii, yoko yoko pma ba yaranga.

²² Goma bu yaramana miringgi turi wa twii nuwa bu nuu ciyei Yambai, anda dangandi see wu sima yi gina a welenga, a gwala dimbiri ciyei dwii a ja ninggu gomau.

²³ Goma bu yaramana swai du nyaayi twii nuwa bu nuu ciyei Yambai a kuranga. Wii wu bi goma kuno kunong yi kun nokono, yi woondi a gwala ku nuwa piyau!>>

Ciyei du balanggai a dwii alkama yi kule

²⁴ Yesu nyii balanggu ciyeu ku kanggu kin, <<Lau ku diyou cika bajome wu pii duu ku nyaau a kondou you.

²⁵ Anda ku nuwa boo diima yi kume, bacen yo ba pii kule a miringgi alkama wii a liya mwati.

²⁶ Pu girau a teen goma, kule dwii mwaasi a twiyo.

²⁷ Kewaa nere wu kondou we you anda sa yo kin, <Nere wu gira, tu ma piya twii duu ku nyaau ne ru?

Anda na kule wuna twiwe piyau?>

²⁸ <<Bajome wii ce kin, <Twii bacente ninga yito!> Pma ce kin, <Yi anda yi podo ru?>

²⁹ A sa pma kin, <Ka bu ningi yito, bu podo wei alkama.

³⁰ Bu du pma ba giranga kem kopo nyanggu kacigi. N saru wei nuwa wurai wa a jor kacigi dwii pma ba seka kule wii, ba bweenga gwelendi gwelendi ba taa, ba teeni alkama mi a bindou.>>>

Ciyei du balanggai a dwii gon mustad

³¹ Pero Yesu sa pma balanggu ceu du kanggu kin, <<Lau ku diyou cika gon mustad du nere wu kangge de aara piya a kondou you.

³² Kana ku too gon duu du banyinai a miringgi duu mwa mwa, anda ka giri gwali kana kono duu wandi ali, pero ba yoo sou. Yidi baangai ba cwaani cwaaringi pmai a betindi yei.>>

Ciyei du balanggai a dwii yisti

³³ Yesu pero sagu pma balanggu ceu du kanggu kin, <<Lau ku diyou cika yisti wu nure wu kangge dee tuura yi lemine kunong ku miima alkama wa, miima bwii mwa mwa yoo yisti.>>

³⁴ Yesu ning wurai yi balanggi ciyei, pu sagu mwa mwa too yiringi nuwa bu tum bwii. Manggu yaa sar

pma ciyei kopo yi balanggu ciyeu.

³⁵ A twanga tu banabi ciyei kin:

<<N sa mbiru wei ciyei yi ciyei du balanggai.

N yesa mbiru wei yiringi tu tukugai yake toson taa ruugu simau.

Pitindi ciyei du balanggai a dwii alkama yi kule

³⁶ Bur Yesu du nuwa twalange, a diiro laa wii.

Kwatimba ya baanga bonggo yo pma ce kin, <<Kam kam sa yir pitindi balanggi ciyei a dwii kule du kondou dwii.>>

³⁷ Yesu nyii lee kin, <<Bol Nere twii bajome, wu pii duu ku nyaa kwii.

³⁸ Kondou twii sima, mwa mwa, pero duu ku nyaau kwii twii nuwa bu lau ku diyou wa. Kule wii, twii kwaraa Balaa Buwai.

³⁹ Bacente wu pii kule miringgi alkama wii Balaa Buwai. Nyanggu kacigu twii nyanggu ku cwata gorou, nuwa bu kacugu wa twii bacamandi.

⁴⁰ <<Cika ku nuwa yikiri kule ba taa, nindu wei yito nyanggu ku cwata gorou.

⁴¹ Bol Nere tumo wei bacamandi, pma demanu wei kana we wu diini nuwa ba ninga welem wa, yi wu ning tu bwii a lau you.

⁴² Pero bacamandi swii parnu wei pma par bwalai, pu pma jii wei wiindi yi dumonggu nyiyau.

⁴³ Anda nuwa bu ningi pisu wu nyaau a gawuri Yambai nyilanu wei cika nyanggu a lau Mbaa pmaw. Yama nere wii twendi dingin nuugu, ba ka twiyau.

Balanggu ciyei a dwii gina wu tukugi

⁴⁴ <<Lau ku diyou cika gina wu tukugi a kondou. Pu nere wu kanggi kinggau a pero tukugu, a ninga buri degdeg a aara cuu kana ca tu woo yi tonoi a ten kodou wii.

Ciyei du balanggai dwii gisou

⁴⁵ <<Lau ku diyou cika, nere wu kasanggu gisi tu nyaai,

⁴⁶ anda ku nyingga gisou kiino ku yi pircu wang, a aara cuu kana ca tu woo yi tonoi a tena.

Balanggu ciyei a dwii lemu

⁴⁷ <<Mwaasi, lau ku diyou cika, lemdi su nuwa parna you ree kana kono du jindu.

⁴⁸ Pu lem wii twangwa, pma yikuwe a gingu a sin siyandi a seka jindi su nyaayi a parna tacingi pmai, su yaa kundi a par siyei.

⁴⁹ Nindu wei yito nyanggu ku cwata gorou. Bacamandi cwanu wei nuwa bu ningi pisu wu nyaau gawuri Yamba wa yi nuwa bu bwii wa.

⁵⁰ Parnu wei pma par bwalai pu pma jii wei wiindi yi dumonggu nyiyau.

Jire wu puce yi wu milga

⁵¹ Yesu pira kin, <<Bu kuranga too yiringi ru?>>

Pma lee kin, <<Ong.>>

⁵² Anda a sa pma kin,
<<Too yiri pitindi twii, kana
wono kulum teere wu yoo
bwiya wu lau ku diyou,
yo cika nere wu laa wayau,
wu yikiwe gina wu puci yi
wu milgai miringgi kandi du
ruuni see yei.>>

Nuwa kwaa Yesu a gwei yei

⁵³ Pu Yesu mata sagu pma
ciyei du balangai, a du poo
wii.

⁵⁴ A waata buri gwei yei.
A toso jukugu yiringi nuwa
a gireng kuru, nuwa bu
nuugu yo wa pma riyanga
buri. Pma ninga pira kin,
<<Nere woo nyingga too
somandi yi yiringi riyandi
buri too piyau?

⁵⁵ Too bol kapinta woo ne
ru? Njaa yo wii Maryam yi
ciyamba ya Yakubu yi
Yusupu yi Simon yi Yahuda
ne ru?

⁵⁶ Ciyamba ya bu
nurumba wa yaa pisindi
pina mwa mwa kem yi yo
ru? Nere woo nyingga too
yiringi piyau?>>

⁵⁷ Pma bwiya gaanggu
a kwaa yo.

Yesu sa pma kin, <<Banabi
kinggi nyigu giru kana
piyau, anda yaa kinggi gwei
yei, yi laa you.>>

⁵⁸ Yaa ku ninga yiringi
riyandi buri tum a pwii,
dingin pma lee bu jire.

14

*Boori Yohanna wu Ningi
Batisima*

¹ A dwii jore Hiridus balaa
wu Galili, a nuu labar Yesu.

² A sa wula ya kin, <<Wii
Yohanna wu Ningi Batisima,
a wuni boore, twii tono a
ninggu too yiringi riyandi
buri.>>

³ Dingin conggo you a din
nuwa twala Yohanna, cala yi
cala a manna jarum. A ninga
yito dingin Hirudiya twii
nure ciya yo Pilibus, wu yo
yiki yo.

⁴ Dingin Yohanna ninga
pu sagu Hiridus kin, <<Yaa
cimacima yi teeri Yambai
ma yiki nure ciya mo!>>

⁵ Hiridus kasa ba ji yo,
anda a nuu gwasu nuwa bu
Yudaya wa, dingin pma dee
Yohanna twii banabi.

⁶ Nyanggu danggu yi bir
Hiridus bol Hirudiya wu
nure sii kolo gawuri
runnguwa ya mwa mwa. A
bwalaman dwii Hiridus

⁷ a ningaman yo alkawal
kin, <<N werenga n
nyiminu wei kana ca tu ma
senggo!>>

⁸ Njaa yo saa, ba sa
Hiridus kin, <<Nyisinggi dwii
Yohanna wu Ningi Batisima
yoko yoko a pilai!>>

⁹ Balaa gaanggu you
bwiwa, anda yake ku ninga
alkawal yi wera a gawur
runnguwa ya a diin nuwa
nyii tu kasai.

¹⁰ Dingin tono a sa nuwa
ba mwarwe dwii Yohanna
wu Ningi Batisima a jarum.

¹¹ Nuwa dee dwii yei a
pilai nuwa nyii bweecanga
wii, a deman njaa yo.

¹² Kwatimba Yohanna wu Ningi Batisima wa baanga ba de buri yei aanda tingo, pma mwatanga sa Yesu.

Yesu puu jeendi nuwa tedu nuwo

¹³ Pu Yesu nuu labar Yohanna, a geero konggoru, a aara pu yaa nuwau yo wundu. Ku nuwa nuu tu ningi wa pma twiyo gorondi pma a pee yi mwari pong yo.

¹⁴ Yesu julo konggoru a ko nuwa tum a nuu bunam pmau a mira pma bu yaa cingcing wa pma yilanga.

¹⁵ Pu nyambiranggu ninga kwatimba ya baanga bonggo you a see kin, <<Poo wuna tina gulai, yoko nyambiranggu ninga. Sa nuwa boo ba aanda gorondi tu nem, palaka ba tenmanuwe buri pmai jeendi.>>

¹⁶ Yesu nyii pma lee kin, <Kopo ba mwatanga ne, anda mba bu nyii pma yiri ba je!>>

¹⁷ Pma see kin, <<Tu yi boo yi tonoi mwa mwa tina kumaa nuwo yi jindi rop tibak.>>

¹⁸ Yesu sa pma kin, <<Bu denguwe pina.>>

¹⁹ A sa nuwa bwii ba sindi siyei, a dwii siyangi. A dee kumaa wu nuwo wii yi jindi su rop swii, a wun dwii diyoyu, a ninga wandima a gelenga kumaa wii. A nyii kwatimba ya ba cwaanga, pma cwaanga nuwa bwii.

²⁰ Anda mwa mwa pmau je riyanga. Kwatimba ya gamanga buburingi tu

nyonai, a twanga tacingi kwap sur rop.

²¹ Kuci nuwa bu je jeendu wa bwii twii nambirmba tedu nuwo yaa muringgi nurumba yi bakwara.

Yesu aari songma a dwii gundu

²² Yoko yoko Yesu sa kwatimba ya ba teendo konggoru ba cwiwongo yerou you, pma du yo anda a sa nuwa bwii ba mwatanga.

²³ Pu nuwa bwii mwatanga, Yesu geero cingu yo wundu dingin ba ce kuru. Kum ninga woo pwii yo wundu.

²⁴ Anda a doo jore konggoru wii ninga kwaara yi gingu you, gwere gundu turonggu pma dingin wuture wii jagu pma songma.

²⁵ Pu kacu ninga, Yesu aara bonggo pmau yi nau a dwii gundi.

²⁶ Pu kwatimba ya ko yo songma dwii gundi pma nuu gwasi, pma ninga duwai kin <<Twii pitingga!>> Pma nuu gwasi wang.

²⁷ Yoko yoko, Yesu sa pma ciyei kin, <<Bu bo gaanggu, bu nuuya gwasi, wuna mi!>>

²⁸ Anda Bitrus see kin, <<Mbaa Wu Gira ka woo mo wei sangge n baa bonggo mou n ninga songma gundu.>>

²⁹ Yesu leeman yo kin. <<Bame.>>

Bur Bitrus twiyo miringgi konggoru a yanna songma a dwii gundu aara bonggo Yesu.

³⁰ Anda pu ko wutur gundu wii yi dimbire a nuu gwasi a toso jimtigu a gundu. A ba kwarama kin, <<Mbaa Wu Gira, mirangge.>>

³¹ Yesu yaki wai you a taa yo ce kin, <<Ma yaa leegu jireu. Dingin ca ma cwaanga gaanggir rop?>>

³² Pu pma teendo miringgu konggoru wii, bur wutur wii gwata.

³³ Nuwa bu miringgi konggoru bwii kuraman sima Yesu a cegu kin, <<Manggu ma Bol Yamba.>>

Yesu mira nuwa bu yaa cingcing a Jenesarata

³⁴ Pu pma yerongo kalinggu kwii, pma julongo a Jenesarata.

³⁵ Pu nuwa bu gwei dwii kuranga Yesu, pma tumamin sima bwii mwa mwa. Pma ninga pu degu nuwa bu buri yaa cingcing wa bonggo Yesu.

³⁶ Pma senggo yo ba du nuwa bu yaa cingcing wa ba mwaanga nyan landa you, anda kana we wu mwaanga nyan landa you a yila.

15

Pirgu ningandi kakai

¹ Parisayo bu kangga kem yi kulumba teeringi wa bu baanga Wurcalima wa, pma baanga bonggo Yesu a pira kin,

² <<Dingin ca kwatimba ma yaa pong tu kakaa pir yei? Pma yaa cardi wari ka wunni jegu jeendi!>>

³ Yesu nyii lee kin, <<Dingin ca mba bu par teeri Yambai dingin pu pong ningandi mbiri?>>

⁴ Dingin Yamba ce kin, <Ma nyii giru mbaa mo yi njaa mo,> anda <Kana we wu semtanga mbaa yo yi njaa yo, nuwa ba jiyo.>

⁵ Anda mba bu jukuri min nere ba kwaa kalunggu mbaa yo yi njaa yo jor du boo yi biiki, ba ce kin, kana ca tu n woo yi tonoi n nyii Yamba.

⁶ Dingin tono bu jukiya min nere ba nyii ya giru mbaa yo, bu kwaa teeri Yambai palaka bu pong ningandi mbiri.

⁷ Mbaa bu yi batal wa! Icaya ce cimacima pu ciyei du baa bonggo Yambai a dwii mbiri, a ce kin,

⁸ <Nuwa boo nyiinggi giru yi nyandi pmai tibak anda gaanggiri pmai kwaara yi mi.>

⁹ Pma kurangin sima nyo, yiringi tu pma jukugu, twii teeringi nuwa tibak!>>

Yiri tu bwiyani nere ba ninga yaa walwal

¹⁰ Yesu yiwe nuwa bu kuranggi buri wa bwii ba baanga bonggo you, a sa pma kin, <<Bu ka twiyau bu kuranga!

11 Yiringi tu diiri nyan neru twii tu diini nere ba ninga yaa walwal ne anda yiringi tu twiiwei nyiyau neru bwiyani nere ba ninga yaa walwal.>>

12 Kwatimba ya baanga bonggo yo ce kin, <<Ma soma min tu ma ce too a bwiyanan gaanggu Parisayo ru?>>

13 Yesu nyii lee kin, <<Kana ca tu Mbaa mi wu diyou pi bu, nuwa podu wei.

14 Bu du pma, too nuwa bu taman jwalu kermo wa, anda kermo yaa taman jwalu kermo, dingin mwa pmau yaraman wei boowu.>>

15 Bitrus ce kin, <<Sa yiri pitindi balanggu ciyei du ma ce doo.>>

16 Yesu sa pma kin, <<Karai kwii bu kuran bu ru?

17 Bu som bu min kana ca tu diiro nyiyau aari pwii pero ba twii buri du?

18 Anda yiringi tu twiiwei nyiyau twiiwei miringgu gaanggu, too tu diini nere ba ninga yaa walwal.

19 Dingin a miringgi gaanggu dangandi tu bwii twiiwei, jigu neru, taari, taari yi nurumba buru wa, kuwi, seedaki leendi, yi bwiyanggu dinu.

20 Too yiringi diin nere ning yaa walwal. Anda jegu jeendi wari yaa cargi, yaa diini nere ba ninga yaa walwal.>>

Leegu jire nuru wu Kanana

21 Yesu du poo wii a mwati sima Taya yi Sidon.

22 Nur Kananiya wa wu bonggondi swii baa bonggo you a wun miu yi duwai kin, <<Mbaa Wu Gira, Bol Dawud, nuu bunam mu, bweecanga mi woo yi wuturindi a cusugu.>>

23 Anda Yesu yaa ku sa yo ciyei. Kwatimba ya baanga bonggo you senggo a ce kin, <<Kee ba mwati! A ponggu yiru ninggu duwau!>>

24 Yesu nyii lee kin, <<Nuwa tunguwe bonggo nuwa bu Israila yi wundu bu cika puuri su liyangai wa.>>

25 Nure wii baa kun kwiyei gawuri yei ce kin, <<Mbaa Wu Gira kalangge.>>

26 Yesu lee kin <<Yaa kundi nuwa ba de jeendi bakwarai ba nyii baindi.>>

27 A nyii lee kin, <<Mbaa Wu Gira, too jire, kana baindi jee tu ywiyongo bonggo nere yo.>>

28 Yesu nyii lee kin, <<Ma yoogi nure wu yi leegu jirau! Nuwa ningaminu wei tu ma kasugu.>> Kinangu kwii bweecanga yo yila.

Yesu mira nuwa tum

29 Yesu du poo wii a mwati kalinggu ku Galili. A gero cingu sin siyei.

30 Nuwa tum baa bonggo you dee guwongi yi kermo yi nere wu mwar borgi, yi bapime yi nuwa bu buri pmai yaa cingcing a bonggo Yesu, a mira pma, pma yilanga.

16

31 Nuwa bwii riyanga burī pu pma ko bapime cegu ciyeu, guwongi a yila, nere wu mwar borgi a songma, kermo kogu sima. Burī pma terenga Yamba wu Israila.

Yesu puu jeendi nuwa tedu nii

32 Yesu yiwe kwatimba ya a sa pma kin, <<N nuugu bunam nuwa boo, dingin pma ninga daa kunong kem yi mi anda yi yaa jeendi tu yi jei, n yaa kasi baa mwatanga yi june, ko mwa ba jaanga songma nyinou ka wuni mwatangu.>>

33 Kwatimba ya pira kin, <<Yi nyingga wei jeendi tum piyau pina gulai tu yirmanu wei nuwa bu tum boo?>>

34 Yesu pira pma kin, <<Bu boo yi kumaa sono?>>

Pma nyii lee kin, <<Yi boo yi kumaa a nibiyo yi jindi banyina.>>

35 Yesu sa nuwa bu tum bwii kin ba sindi siyendi sima.

36 A de kumaa wu nibiyo wii yi jindi swii a wananga Yamba, a gelenga nyii kwatimba ya, kwatimba ya cwaanga nuwa bwii.

37 Pma jee riyanga mwa mwa. Kwatimba ya kuranga bubiringi tu nyonai a twanga tacingi nibiyo.

38 Kuci nuwa bu je jeendi wa lam tedu nii, yaa muringgi nurumba yi bakwara.

39 Goro pu Yesu tum pma mwatanga, a diiro konggoru a yeri bonggondi Magadan.

Nuwa Kasigu somdi yiringi riyandi burī

1 Parisayo bu kangga yi Sadukayo pma baanga bonggo Yesu palaka ba cuu yo, pma see kin, <<Juku yiri somdi yiri riyandi burī, ka ma baa diyoyu Yamba wai.>>

2 Anda Yesu nyii pma lee kin, <<Ka nyambiranggu ningi, bu ce min, <Sima ningu wei teng dingin diyoyu ninga wing.>

3 Pero yi pinu bu ce min, <Gundu yaru wei, dingin diyoyu ningi wing pero ninga pitipiti!> Bu kurani tu ningdu wei diyoyu, anda bu jaanga kuranggu tu ningdu wei a daandi su yokoi.

4 Mba nuwa bu bwii wa bu sinaa daandi wa, bu yaa gwasī Yamba wa, bu kasi yiri somdi riyandi burī, yaa ku n ningambiri somdi riyandi burī ka gwal tu banabi Yunana.>>

Bur Yesu a du pma mwati.

Yisti Parisayo yi Sadukayo

5 Pu kwatimba ya yerongo kalinggu kwii, pma mondo ba de kumaa.

6 Yesu sa pma kin, <<Bu ruun tuwe, yi yisti Parisayo yi Sadukayo.>>

7 Pma toso gwela yi burī pmai kin, <<A ce yito dingin yi dee bu kumaa kana banyina.>>

8 Yesu som tu pma cegi, dingin tonō a pira pma kin, <<Dingin ca bu ninggu gwela yi burī mbiri min bu

yaa kumaa? Leegu jirau
mbiru banyina!

⁹ Lama yoko bu kuran bu
ru? Bu dangga bu yi kumaa
nuwo wu n jee nuwa tedu
nuwo wo ru? Bu kuranga
tacingi twangi sono?

¹⁰ Kumaa nibiyo wu n jee
nuwa tedu nij woo dong
dej? Bu twanga tacingi
sono?>>

¹¹ Dingin ca bu yaa kurani
min n yaa cegu kumaa? Bu
swera buri mbiri bonggo
yisti Parisayo yi
Sadukayo.>>

¹² Kwatimba ya bwii
kuranga kin yaa cegu kin ba
swera buri pmai bonggo
yisti wu miringgi kumaa
anda bonggo yiringi tu
Parisayo yi Sadukayo jukuri.

Ciyei Bitrus a dwii Yesu

¹³ Pu Yesu mwati gwei
Kaisariya du Pilipi, a pira
kwatimba ya kin, <<Nuwa
ciyei kin Bol Nere we?>>

¹⁴ Pma lee kin <<Bu
kangga cee kin ma yoogi
Yohanna wu Ningi Batisima,
bu kangga kin ma Iliya, bu
kangga kin ma Irmiya
yikwii ma wu wiino
miringgi banabindi.>>

¹⁵ A pira pma kin <<Anda
mba, bu ce min, mi we?>>

¹⁶ Simon Bitrus lee kin,
<<Ma Masiya, Bol Yamba wu
yi piima.>>

¹⁷ Yesu leeman yo kin,
<<Ma yoogi wu yi wuure
Simon bol Yunana, dingin
woo jire yaa ku baa bonggo

neru. Mbaa mi wu diyoyou a
juku mina.

¹⁸ Yoko n sagu mou, ma
Bitrus, (pitindi yei twii
sweli.) * Ma yoogi sweli du
n moru wei ikkilisiya mi,
kana boore na gwali.

¹⁹ N nyiiminu wei tu
wundi nyinoi lau ku diyoyou,
kana ca tu ma kwee a sima,
a kwauwa a diyoyou, tu ma
pera a sima, a perwa a
diyoyou.>>

²⁰ Goro yito Yesu sa
kwatimba ya kin, ba sari ya
kana we kin yo Masiya.

Yesu ce booru yei

²¹ A toso dwii jore Yesu
toso sagu kwatimba ya dak
kin, <<Tagi n angge
Wurcalima n tii kuule
wundu wundu bonggo
bagiraa Yudaya wa yi
bagiraa kuruwa wa yi
kulumba teeringi wa. Tagi
nuwa jinggu wei, anda
nyangu ku kunong, yo
wuni wei yi piima.>>

²² Bitrus wuu yo bonggo a
toso yerenggu kin, <<Mbaa
Wu Gira! Too na nindi yi
mo!>>

²³ Yesu waka kau sa Bitrus
kin, <<Lamana bonggo mu
Balaa buwai! Ma yoogi
sweli puti, too dangandi baa
bu bonggo Yambau, anda
bonggo neru.>>

²⁴ Yesu sa kwatimba ya
kin, <<Kana we ka kasi ba
pongge, tagi ba kwaa buri
yei, ba de yeu you ba
pongge.

* 16:18 16:18 Pitindi din Bitrus twii sweli

25 Kana we wu kasi ba mira piima ya mandu wei siyau, anda kana we wu mansi yei piima ya dingin mi nyingu wei.

26 Tu nere pulu wei ca ka nyinggi yiringi tu sima mwa mwa anda nyingga bu piima ne? Tu nere nyii wei ca ba waka piima ya.

27 Dingin Bol Nere baa wei yi yilau Mbaa yo yi bacamandi yei, pero nyii wei kana we woriri cimacima yi yiri tu ningai.

28 N woo sagumbiru jire bu kangga boo pitindi pina, yaa ku bwaanu wau kopo ka kwee Bol Nere bagu yi lau you.

17

Buri Yesu waku wa

1 Goro daa nokono Yesu de Bitrus yi Yakubu yi ciya yo Yohanna a geendo cingu ku getenteng pma yi wundu pmau.

2 Pu pma boo pwii Yesu wakuwa, kau you a nyilangu cika nyangu, see yo ninga populok rang.

3 Bur kwatimba Yesu wa bu kunong wa bwii ko Iliya yi Musa baanga toso cegu ciyei yi Yesu.

4 Bitrus sa Yesu kin, <<Mbaa Wu Gira a ninga yiro kundi ku yi boo pina! Ka ma lei n menenu wei cukuringi kunong, diino dingin mo, diino dingin Musa, diino dingin Iliya.>>

5 Pu woo cegu ciyei, buri tinene du nyilani baa summo pma, pero miu

twiwe tinene dwii kin, <<Tina Bol mi wu n kangni, wu dirangin gaangu. Bu nuu yo!>>

6 Pu kwatimba ya bwii nuu miu kwii pma nuu gwasi wang pma gonjo kau sima.

7 Yesu baa bonggo pmau a mwaanga pma a ce kin, <<Bu wunongo, Bu nuu yaa gwasi!>>

8 Pu pma wun dwiiyongi pma ko bu kana we bur Yesu.

9 Pu pma julonggu cingu kwii Yesu sa pma kin, <<Bu sar ya kana we tu bu ko kopo ka Bol Nere wuni boore.>>

10 Kwatimba ya pira yo kin, <<Dingin ca kulumba teeringi wa ce kin tagi kopo ka Iliya waatai bati anda Masiya ba baa?>>

11 Yesu nyii lee kin, <<Mangu Iliya baa wei, pero waata wei kana ca mwa mwa.

12 Anda n woo sagumbiru Iliya gicila baa, nuwa yaa ku kuranga yo, pma ningaman yo kana ca tu pma kasai, Yito mwaa Bol Nere aari tiigu kuulu a wari pmai.>>

13 Buri kwatimba ya kuranga kin a cegu ciyei dwii Yohanna wu Ning Batisima.

Yesu yiki wuture a buri babwiyai

14 Pu pma waatanga buri bonggo nuwau, nere wu kangge baa bonggo Yesu, a kun kwiyou bonggo you.

15 A ce kin, Mbaa Wu Gira, nuu bunam bol mu! Yi toki pero a tiigu kuuli wang, sii yaringgu bwalau yi gundu.

16 N demuwe kwatimba ma anda pma jaanga mirgu.>>

17 Yesu nyii pma lee kin, <<Mba nuwa bu yaa leegu jire wa yi nuwa bu bwiiwa! N singgu wei siyei yi mba kopo pene? N tari wei kanadi yi mba kopo pene? Bu nyingu wei bwiya woo pina!>>

18 Yesu yera wutur wii, a twiyo buri bwiya wii swii kinangu a yila.

19 Bur kwatimba Yesu baanga wulak pira yo kin, <<Dingin ca yi jaanga yikugu wutur wii?>>

20 Yesu nyii lee kin, <<Dingin leegu jire mbiru banyina, n sagumbiru jire ka bu boo yi leegu jire banyina cika gon mustad, bu saru wei cingu kina min, <Mwati pina ma amna pwii!> Mwatir wei. Yaa tu bu puu ninggi.

21 Koo duu wutur yaa twii kopo yi kuru yi cooji.>>*

Yesu ce ciyei dwii boori yei dong

22 Pu mwa mwa kwatimba ya kuranga buri Galili, Yesu sa pma kin, <<Nuwa curu wei Bol Nere a war nuwai.

23 Nuwa jiru wei, anda goro daa kunong wunu wei boore.>> Anda kwatimba bwiyanga gaangu wang.

Yagu janggal a Laa Yambau

24 Pu Yesu yi kwatimba ya baanga Kaparnahum, nuwa bu yiri janggal Laa Yambau baanga bonggo Bitrus pira kin, <<Kulum mbir yar janggal wu Laa Yambau ru?>>

25 Bitrus lee kin, <<Ong.>>

Pu Bitrus waata miringgi lai, Yesu ninga pira kin., <<Wu yar janggal balamba we? Nuwa bu sima bwii ru? Rungguwa ru? Ma ce min ca Bitrus?>>

26 Bitrus nyii lee kin, <<Tu yar Rungguwa.>> Yesu lee kin, <<Kundi, ma cegu min nuwa bu sima boo pma yaa yari.

27 Anda n yaa kasi yi welaman nuwa boo. Dingin tono mwati you ma manni godim. Ma wuwe, jinde wu ma taa, a nyiyau yau ma nyingu wei kene du yinno yagu janggal, ma dee, ma ya pma janggal yire.>>

18

Wu gwala yi giru a lau ku diyau we?

1 A dwii jore kwatimba Yesu wa baanga bonggo you a pirgu kin, <<Wu gwala yi gira we a lau ku diyau?>>

2 Yesu yiwe babwiya wu banyina a ruwo cudi pma

3 a ce kin, <<N woo sagumbiru jire kopo ka bu waka buri bu yoo cika babwiya wu banyina, ka yito ne, yaa wu diru wei lau ku diyau.

* 17:21 17:21 Yaa kana wono lakargar wu murni bonggo ciyei 21.

⁴ Dingin toño kana we wu cingo dwii yei cika babwiya wu banyina, yoo wej wu gwala yi gira a lau ku diyoyou.

⁵ Kana we wu yi babwiya banyina cika wuna dingin din mi, a yingge.

Yiringi tu dee welem

⁶ <<Anda kana we wu diini wu wiino miringgi bu nyititi, bu puu jire yi mi wa ba yaranga a welem, kujang nuwa ba kwangman yo nii du duuyi a kwii ba manna miringgi kalinggu ba bwaa.

⁷ Too yiri bunam a sima, dingin nyindi welem tagi ba baa, anda yoo wej yiri bunam a bonggo nere wu de yari.

⁸ <<Ka wai mau yi naa mau diiminu wej welem wai, ma mwar ya, ma man siyei! Kujang ma nyingga piima bu yaa matigu wa, yaa wari yi mwari yi ku nuwa manu wej mwa mwa wari mai yi mwar mai miringgu bwalau ku yaa dumdu.

⁹ Ka nung mo diimini wej welem wai, podo ma man siyei! Kujang ma nyingga piima yi nung wiino yi ku nuwa manminu wej yi nundi rop a bwalau ku yaa dumdu.

Balangu ciyei a dwii puure wu liya

¹⁰ <<Suwa kii, bu cedi ya kana we cudu bu nyititi boo. N woo sagumbiru bacamandi pmai su diyoyou

kana pene pene boo gawuri Mbaa mi wu diyoyou.

¹¹ * Bol Nere baa dingin ba mira pma bu liyanggi wa.

¹² Bu dangani min? Ka nere wu kangge woo yi puuri woon anda wu wiino liyari, na dur su kun toro sur toro swii a taagu taawu a cingu, ba mwati ba kasanga puure wu wiino wu liya wii ru?

¹³ Ka nyingai, n sagumbiru jire ninggu wej buri degdeg a dwii puure wiino wii gwalu wej su kun toro sur toro su liyani bu swii.

¹⁴ Yito mwaasi, Mbaa mbire wu diyoyou yaa kasi kana wiino miringgi bu nyititi boo ba liyanga.

Bagon mo wu ningamin welem

¹⁵ Ka bagon mo ningamin welem, ma amna bonggo you ma juku yo liyari yei, dwii mbir rop tibak. Ka kar twiyau ma mira bagon mo.

¹⁶ Anda ka, ka bu twiyau ne ma de nere wiino kana nuwa rop kem yi mo, palaka kana ca tu ma see ba yoo jire a cudu nuwa rop kana kunong bu twii seedaki bwii.

¹⁷ Pero ka kwa kagu twiyau ma dee bonggo ikkilisiya, ka kwaa kagu twiyau ikkilisiya, bu dee twii nere wu som bu Yamba yi nere wu yiri janggal.

Tu nuwa kwee yi tu nuwa pera

* **18:11 18:11** Yaa kana wono lakargar wu murni bonggo ciyei 11. Cika Luka 19:10

18 <<Pero n woo sagumbiru jire kana ca tu bu kwee a sima a kwauwa a diyou tu bu pera a sima a perwa a diyou.

19 <<Bambang n cwatugu sagumbiru, kana pene pene ka nuwa rop cudu mbiri neci dwii a pinaa sima, ce kuru a dwii kana ca Mbaa mi wu diyou ninga mbiru wei.

20 Dingin pu nuwa rop kana kunong kuranga buri yi din mi, n woo kem yi pma.>>

Balangu ciyei a dwii kewe wu yaa par sukom

21 Bur Bitrus baa bonggo Yesu a pira kin, <<Mbaa Wu gira, n paramanu wei bagon mi sukom daa sono, ka ninga ngin welem? Daa nibiyo ru?

22 Yesu nyii lee kin, <<Yaa yito, yaa daa nibiyo, anda kun nibiyo daa nibiyo.

23 Dingin tono lau ku diyou cika balaa wu kangge wu kasi ba suwa gina yo wu bonggo kewaa ya.

24 Pu toso sugu, nuwa demuwe yo kewe yo wu pong talenti tedu kwap.†

25 Kewe wii yaa ku pu bu yagu cin dwii, dingin tono nere wu gira yo wii a diina nuwa ba tee ba cuu yo kem yi nuru yo yi kwaraya yi mwa mwa yiringi tu woo yi tonoi ba ya cine dwii.

26 Kewe wii a yara kun kwiyoyu yi dinendi a gawuri

balaa a ce kin, <Ninga kanadi yi mi, n senggu mau, n yaminu wei kana ca!>

27 Nere wu gira yo wii nuu bunam you, a duu cin dwii, a dwiwa mwati.

28 Bur nere wii baa kaanga yi basin wurai yo wu kangge wu pong yo dinari woon. A tee kwii a cegu kin, <Yangge cine mi!> ‡

29 Basin wurai yo a kun kwiyoyu yi dinendi a gawuri yei a senggo kin, <Ninga kanadi yi mi, n yaminu wei!>

30 Anda a kwaa, waka a dee manna jarum kopo ku ya yo cine yei.

31 Ku kewaa bu kangga bwii ko tu ning wai gaanggir pmai bwiiwa, pma aanda sa nere wu gira pma kana ca tu ning wai.

32 Nere wu gira wii yiwe kewe wii a see kin, <Ma kewe wu yi tuwe, n yapa min cine mai mwa mwa, dingin ma sengangge.

33 Daabu na ma nuu bunam bagon mo kewe cika ku n nuu bunam mau ru?>

34 Nere wu gira yo wii suko wang, a manni kewe wii jarum, nuwa ba turongo kopo ka yar cine dwii mwa mwa.>>

35 <<Too tu n Mbaa mi wu diyou ninga manu wei kana wono mbire kopo ka bu paraman sukom kambaa yi gaangu kiino.

† 18:24 18:24 Talentı tedu kwap, tum you lam ken wurai neri, nyan mila kuna rop a dwii jore ‡ 18:28 18:28 Dinari twii ken wurai neri a nyan kiino a dwii jore

19

Jigu laabwiya

¹ Pu Yesu mata cegu too yiringi, a du Galili mwati sima Yudaya bonggo wu kangge wu you ku Urdun.

² Nuwa tum pong yo pwii a mira pma yilanga.

³ Parisayo bu kangga baanga bonggo you ba cuu yo, pma pira kin, <<Teere lee kin nere ba ji laabwiya nure yo dwii kana ca ru?>>

⁴ A nyii lee kin, <<Bu ce bu tu balgi ru? <Yake toson taawu Yamba ruu pma nambare yi nure.>

⁵ pero a ce kin, <Dingin tono nere dur wei mbaa yo yi njaa yo ba neca buri yi nure yo pma bu rop boo yoo wei buri kiino.>

⁶ Pma yaa rop mere anda buri wiino. Dingin tono tu Yamba neca nere ba cwaani ya.>>

⁷ Pma pira kin, <<Dingin ca Musa sa pma kin nere ba nyii nure yo lakargar jigu laabwiya anda ba mana?>>

⁸ Yesu nyii lee kin, <<Musa leembira bu ji laabwiya nurumba mba dingin gaanggir mbiri cingcing. Anda gwak yaa yito yake taa you.

⁹ N woo sagumbiru min, kana we wu man nure yo ka yaa dwii taari ne, ka yikir nure wu kangge a ninggu taari yi yo.>>

¹⁰ Kwatimba ya see kin, <<Ka cudu nure yi bwiya te yito wei, kujang nere ba ningi yaa laabwiya.>>

¹¹ Yesu sa pma kin, <<Yaa kana we wu lee wei yi doo ciyei, kopo pma bu Yamba kalanga pma wa.

¹² Bu kangga ninga bu laabwiya dingin twii pole, nuwa bi pma yi twii, bu kangga nuwa diin pma, pero bu kangga dingin lau ku diyou. Anda kana we wu lee wei yi do ciyei, ba lee yi tono.>>

Bakwaraa yi Yesu

¹³ Nuwa bu kangga dee bakwaraa bu nyititi wa bonggo Yesu ba cerman pma wari ba cerman pma kuru. Anda kwatimba ya yera pma bu dee bwii.

¹⁴ Yesu ce kin, <<Bu du bakwaraa bu nyititi wa ba baanga bonggo mu bu jari ya pma, dingin lau ku diyou kwii ku pma bu cika bakwaraa wa.>>

¹⁵ Pu cerman pma wari, a mwati.

Bwiya wu yi gina

¹⁶ Nere wu kangge baa bonggo Yesu a pira kin, <<Kulume, tu nyaayi yei ca tu ningu wei palaka n nyingga piima bu yaa matigu wa?>>

¹⁷ Yesu nyii lee kin, <<Dingin ca ma pirangge tu nyaayi? Wu nyaa wiino tibak, ka ma kasi piima bu yaa matigu, ma ninga pongondi yi teeringi.>>

¹⁸ Nere wii pira kin, <<Twii, tono?>>

Yesu nyii lee kin, <<Ma jiri ya nere, ma ningi ya taari,

ma ningi ya kuwii, ma nyii
ya seedaki leendi,

19 ma nyii giru mbaa mo yi
njaa mo, pero ma kangman
bapun mo cika buri mai.>>

20 Nere wii ce kin, <<N
pong too teeringi mwa mwa,
tu nyona ca?>>

21 Yesu nyii lee kin, <<Ka
ma kasi ma yoo nere wu
twanga wei, mwati ma cuu
gina mo ma cwaanga
bakuuluwa, ma nyingu wei
gina a pwii diyou Yambau.
Anda ma baa ma
pongguwe.>>

22 Pu bwiwaka wii nuwa
yito, a mwati yi bwiwang
gaanggu, dingin yi gina
wang.

23 Yesu sa kwatimba ya
kin, <<N sagumburu jire,
ning wei buu wang nere wu
yi gina ba diiro lau ku diyou.

24 Pero n sagumburu, ning
wei leelee nggela ba diiro
bou lippirau, yi ku bagina
ba diiro lau Yambau.>>

25 Pu kwatimba ya nuwa
yito, pma riyanga buri wang
pero a pira kin, <<Ka yito
wei wu nyingu wei mirma
we?>>

26 Yesu suwa pma a ce kin,
<<Too gwala dimbiri neri,
anda yaa tu gwala dimbiri
Yambai.>>

27 Bitrus lee kin, <<Yi du
kana ca yi pongmina. Tu yi
kinggu wei ca?>>

28 Yesu sa pma kin, <<N
sagumburu jirei, jor du
kana ca waatu wei buri
puçi, pero pu Bol Nere siinu
wei candu lau you ku yi
yilau, mba bu ponggu wa bu

siinu wei cannindi lauri
kwap sur rop bu ningamanu
wei bali duuri kwap sur rop
tu Israila.

29 Anda kana we wu du
laandi kana ciyamba bu
nambirmba kana nurumba
wa, kana mbaate kana
njaate kana kwaraa kana
koondi dingin mi nyingu
wei tum you daa woon pero
nyingu wei piima bu yaa
matigu wa.

30 Anda nuwa tum bu
gawuriyo wa, yoo wei bu
goroyo wa, pero nuwa tum
bu goroyo wa yoo wei bu
gawuriyo wa.

20

*Balangu ciyei a dwii
bawura*

1 <<Lau ku diyou cika
nere wu yi kondou wu twiyo
yi pinu kilang a nyii nuwa
wurai a kondou you.

2 A nuwanga yaru wei
pma dinari a nyanggu, a
teni pma kondou you.

3 <<Ku jor du toro ninga a
twiyo a ko bu kangga pisindi
lummo yaa tu ninggi.

4 A sa pma, <Mba mwa bu
ambira bu ninga wurai a
kondou mu, n ya mbiru wei
tu daayai.>

5 Dingin tono pma aanda
ba ninga wurai a kondou
wii.

<<Yo pero mwati yi cudi
nyanggu yi jor du kunong
dong, a ninga cika ku
conggo nuwanga.

6 Pu jor du nuwo wu
nyambiranggu ningau, pero
a twiyo a nyingga bu kangga

pitindi. A pira pma kin,
<Dingin ca bu pitindi pina
yaa tu bu ninggi nyanggu
mwa mwa?>

7 <<Pma nyii lee kin, <Yaa
nere wu dee yiro wurai.>

<<A sa pma kin, <Mba
mwaasi bu ambira bu ninga
wurai a kondou mu.>

8 <<Pu nyambiranggu
ningau nere wu kondou
weyou yiwe nere wu sugu
kondou a see kin, ba yiwe
nuwa bu ninggu wurai bwii,
toso bu baa yi gorou wa a
bee bu gawuriyo wa.>

9 <<Nuwa bu toso wurai
jor du nuwo wu
nyambiranggu pma baanga
nuwa nyii pma dinari.

10 Dingin tono bu nuwa
nyii wurai gawuriyo wa,
pma baanga dangani kin
nuwa yaru wei pma tum
gwala wei bu goroyo wa.
Anda kana wono pmo nuwa
nyii dinari.

11 Pu nuwa nyii pma
nyina, pma toso jangga ceu
bonggo nere wu sima boo
ya.

12 Pma ce kin, nuwa bu
baa yi goro boo pma ninga
wurai nyan jor du wiino
anda bu ya yiro kiino yi
pma yo bu yar nyanggu
wurai wa.>

13 <<A sa wu kanggi pma
kin, <Basin mi, yaa ku n
ninga dwal jire. Ma lee bu
min ma ninggu wei wurai
nyan dinari ru?

14 Ma yi tu nuwa ya mina
ma mwatanga. N kasi n ya
nere wu baa yi goro yito
mwaasi cika ku n ya mina.

15 N puu ninggu tu n kasi
yi ken mi ru? Ma ninggu
bwiu dingin mi nii ru?

16 <<Dingin tono, nuwa bu
goroyo wa, yoo wei bu
gawuriyo wa, pero nuwa bu
gawuriyo wa yoo wei bu
goroyo wa.>>

*Yesu ce ciyei a dwii boori yei
ku kunong*

17 Pu Yesu woo mwatugu
Wurcalima, a de kwatimba
ya bu kwap sur rop bwii a
bonggo a sa pma kin,

18 <<Yi mwatangu
Wurcalima anda nuwa
cuuru wei Bol Nere bonggo
bagiraa kuruwa yi kulumba
teeringi wa. Pma
mwarmanu wei yo bal
boori,

19 ba nyii yo war nuwa bu
yaa yoogi nuwa bu Yudaya
wa, pma ningamanu wei yo
nyasi, waciru wei pero piini
wei yeu. Nyanggu ku
kunong wuni wei yi
piima.>>

*Senggo njaa Yakubu yi
Yohanna*

20 Goro yito njaa kwaraa
Sabadi baa gawur Yesu kem
yi kwaraa ya a kun kwiyei a
senggo yo ba ningaman yo
yiri tu kanggi.

21 Yesu pira kin, <<Tu ma
kasigu ca?>>

A see kin, <<Ma nyii
kwaraa muwa bu rop binaa
pisu wu nyaayi a lau mau,
wu wiino a wai mau wu jeu
wu kangge a wai mau wu
miyu.>>

22 Yesu sa pma kin, <<Bu
som bu tu bu senggu. Bu

puu wej tiju kuule wu n tii wej ru?>>

Pma leeman yo kin, <<Yi puu wej.>>

²³ Yesu sa pma kin, <<Bu tii wej kuule wu n tii wej. Anda n yaa dimbire n seka wu sinu wej wai wu jeu mu kana wai wu miyu mu. Soo pisindi kopo bu Mbaa mi meneman pma wa.>>

²⁴ Ku kwatimba bu kwap bwii nuwa yito pma sukongo yi ciyamba bu rop bwii.

²⁵ Yesu yiwe pma mwa mwa a ce kin, <<Bu soma nuwa bu jeegi lau dwii nuwa bu yaa yoogi nuwa bu Yudaya wa jukur nuwa pma lau pero bagiraa pma jee lau dwii pmai.>>

²⁶ Anda yaa yito yi mba. Wu kasi ba yo wu gira a cudi mbiri, ba yoo kewe mbire.

²⁷ Kana we wu kasi ba yoo wu gawuriyo tagi ba yoo kewe mbire,

²⁸ cika ku Bol Nere baa bu nuwa ba yoo kewaa ya anda a baa ba yoo kewe nuwa pero ba nyii piima ya, palaka ba mira nuwa tum.

Kerma rop ko sima

²⁹ Pu Yesu yi kwatimba ya dugu Yeriko, nuwa tum pong pma.

³⁰ Kerma rop pisindi gingu nyinou, pu nuwa kin Yesu cwiigu, pma ninga duwai kin, <<Mbaa Wu Gira, Bol Dawud, nuu bunam yiru!>>

³¹ Nuwa bu kuranggi buri bwii a yera pma ba sin siyendi tok, anda pma cwata

duwai kin, <<Mbaa Wu Gira, Bol Dawud nuu bunam mu.

³² Yesu a tin tiyau a yi pma, a sa pma kin, <<Tu bu kasi n ningambira ca?>>

³³ Pma leeman yo kin, <<Mbaa Wu Gira yi kasi yi ko sima.>>

³⁴ Yesu nuu bunam pmau, a mwaanga nundi pmai. Yoko yoko pma ko sima, pma pong yo.

21

Yesu aara Wurcalima

¹ Pu Yesu yi kwatimbaya ninga nem Wurcalima pma baanga gwej Betpaji a dwii Cing Souri Setun, Yesu tum kwatimba ya rop,

² a sa pma kin, <<Bu ambira gwei du gawuri mbiri, ka bu tengma bu kwee wej bakoro twalgi pwii, yi twiyaa yo bonggo you. Bu pera bu dengguwe.

³ Ka kana we sambir ciyei, bu see min, <Mbaa Wu Gira kasigu,> dumbiri wej bu dee yoko yoko.

⁴ Too yiringi ningwa, palaka ba twanga tu banabi cei,

⁵ <<Bu sa nuwa bu Wurcalima min, <Bu ko, balaa mbire baaggu yi dwii du cinggai geenggi a dwii bakoro, a dwii twiyaa bakoro.>>>

⁶ Kwatimba ya bwii mwatanga ninga cika ku Yesu sa pma.

⁷ Pma dee bakoro yi twiyaa bakoro, pma

kenaman gatanggamandi
pmai dwii bakori swii, Yesu
siina dwii gatanggamandi
twii.

⁸ Nuwa tum ninga pu
kenenggu gatanggamandi
pmai a nyinou a gawuri yei,
anda bu kangga pma kaca
yendi souri a kenamana
nyinou.

⁹ Nuwa tum bu gawuri yei
wa yi bu ponggu yo goro wa,
pma ninggu duwai kin,
<<Yi teranga bol Dawud!
Wuure bonggo yo wu bagu
miringgi din Mbaa
Wu Girai.
Yi teranga Yamba wu woo
diyou.>>

¹⁰ Pu Yesu diiro
Wurcalima, mwa mwa gwei
dwii piro, a ninggu pira kin,
<<Woo we?>>

¹¹ Nuwa bu tum bwii nyii
lee kin, <<Woo Yesu banabi
wu baa Nasaret du Galili.>>

Yesu miringgi Laa Yambau

¹² Yesu diiro Laa Yambau
a kekenga nuwa bu cuugu yi
tenggu yiringi wa a pwii. A
sukaman siyau tebur nuwa
bu waki ken wa, yi pisindi
nuwa bu cuugu bamori
Masar wa.

¹³ A sa pma kin, <<Balgi,
laa mu nuwa yiri wei kin,
laa kuru, anda mba bu dee
bu yoo laa kuuwau.>>

¹⁴ Kermo yi guwongi
baanga bonggo yo a laa
Yambau, a mira pma
yilanga.

¹⁵ Pu bagira kuruwa yi
kulumba teeringi wa ko
yiringi riyandi buri tu
ningai pero nuu tu bakwara

bu ninggu buri degdeg a
miringgi laa Yambau cegu
kin, <<Yi teranga Bol
Dawud, Hossana!>> Pma
sukongo.

¹⁶ Pma pira kin, <<Ma
nugu tu bakwara boo cegu
ri?>> Yesu nyii lee kin,
<<Ong, yaa ku bu ce
miringgu lakargar ru? <Wii
mo ma juku bakwaraa bu
nyititi wa yi bweegaa ba
tera mina.>>>

¹⁷ A du pma mwati gwei
Betani a daa pwii.

Yesu semtanga sou pwalgu

¹⁸ Yi pinu kilang, pu
waatigu gwei Yesu nuu june.

¹⁹ A ko sou pwalgu ku
kanggu a nyinou a aara
bonggo you anda yaa tu
nyinggai bur wandi. Bur a
ce kin, <<Yama ma peri ya
twiyagu mere!>> Buri sou
kwii kusuwa kinangu.

²⁰ Pu kwatimba ya ko yito
pma riyanga buri. Pma
ninga pira kin, <<A ningwa
nye sou pwalgu koo kusuwa
kinengu yito?

²¹ Yesu nyii pma lee kin,
<<N woo sagumbiru jirei, ka
bu lee jire, bu ninga bu
gaanggir rop ne, bu ning
wei tu ningwa yi sou pwalgu
koo, anda buri too yi wundu
ne, bu saru wei cingu kina
min, <Mwati, ma manni buri
mai kalinggu,> ningdu wei.

²² Ka bu lee jire, kana ca
tu bu senggo miringgu kuru
bu kinggu wei.

Pira dwii dimbire Yesu

²³ Yesu diiro laa Yambau,
pu woo jukugu yiringi

nuwa, bagiraa kuruwa wa yi bagiraa nuwa wa a baanga bonggo you, pma pira kin, <<Ma ninggu too yiringi yi dimbire we? Pero wu nyiimin woo dimbire we?

24 Yesu nyii pma lee kin, <<Mi mwa n pirambiri wei pira wiino, ka bu nyiinggi lee n sambiri wei, ka ninggu tina yiringi yi dimbire we wei.

25 Dimbire wu Yohanna Ningi Batissima yi tono, a baa piyau, a baa diyou ru? A baa bonggo nere ru?>>

Pma ninga pu dangandi a cudu pmai kin, <<Ka yi ce min, a baa diyou, pirayiri wei kin, <Dingin ca bu kwaa leegu jire yi yo?>

26 Anda ka yi ce min, <A baa bonggo neru,> yi nugu gwasi nuwa dingin pma mwa mwa lee kin Yohanna twii banabi.>>

27 Dingen tono pma nyii lee Yesu kin, <<Yi som bu.>>

A sa pma kin, <<Mi mwa n sambire ka n ninggu too woo yi dimbire we wei.>>

Balanggu ciyei a dwii bakwara rop

28 <<Bu danggu wei min ca, a dwii ciyei dina? Woo yi nere wu yi ba kwaraa rop. A aara bonggo wu gawuriyo a see kin, <Amna ma ninga wurai a kondou.>

29 A nyii lee kin, <N anggi.> Anda cwata gorou a waka dangandi yei a aara.

30 <<Mbaate wii aara bonggo wu kanggi wii a see cika ku conggo ceu, a lee

man yo kin, <N anggu wei mbaa,> anda yaa ku aarau.

31 <<Wu ninga tu mbaa pma kasigu we cudu pmai?>>

Pma nyii lee kin, <<Wu gawuriyo wii.>>

Yesu sa pma kin, <<N woo sagumbiru jire nuwa bu yiri janggal yi karmajindi gicila mbir wei tengma lau Yambau.

32 Dingen Yohanna baa ba juku mbir nyinou ninggu pisu wu nyaau a gawuri Yambai, bu kwaa leegu jire, anda nuwa bu yiri janggal wa yi karmajindi pma lee. Pero kana pu bu ko too yiringi bu kwaanga bwiiwa yi leegu jire yi yo.

Balanggu ciyei a dwii nere wu nyii kondou inabi

33 <<Bu ka twiyau ciyei du balanggai du kanggi. Woo yi nere wu kangge wu yi kondou, a ruu souri inabi. A wora yi garu. A wul bou dudu a swei du karkar pu nuwa yamnu wei gundu inabi pero a moo cire. Bur a duu bajomba bu kangga a ninga songma.

34 Pu jor wagu inabi ningau, a tum kewaa ya a bonggo bajomba bwii, ba yimuwe yo tutwiyari inabi.

35 Bajomba bwii ta kewaa bwii, pma buwanga wiino, a ji wu kangge pero bacanga wu kunong.

36 Bambang a tum kewaa bu kangga bonggo pmau gwala bu gawuriyo wa,

bajomba bwii ninga cika ku conggo ningau,

³⁷ Cwata gorou a tum bol yo bonggo pmou. A ce kin, <Pma nyii wej giru yake ku twii bol mi ko.>

³⁸ <<Pu bajomba bwii ko bwiya wii bagu, sa buri pmai kin, <Suwa nere wu kondou wuna yoo wej weyau woo baayi, yama yi jiyo palaka gina yo ba yoo woyire.>

³⁹ Dingin tono pma ta yo, a baciwe siyei goro kondou wii, a jiyo.

⁴⁰ Dingin yito ka nere wu kondou wayau baayi, ningu wej nye yi bajomba bwii?>

⁴¹ Pma ce kin, <<Nere wii baa lacuwej bajomba bu bwiiwa bwii yi boori du yi buwi, ba nyii kondou wii bajomba bu kangga bu nyii wej yo tutwiyari kondou wa ka jor wagu ningi.>>

⁴² Yesu sa pma kin, <<Bu ce bu miringgu Lakargar Yamba ru?

<Sweli du mweemba kwaanga,

a yoo sweli du nyaayi du mweemba cenna gengelte.

Too ninggu Mbaa Wu Gira, too yiringi riyandi buri a nundi yiri.>

⁴³ Dingin tonon, n sagumbiru nuwa demanu wej lau Yambau bonggo mbiru, ba nyii nuwa bu twiya wej tutwiyari yei.

⁴⁴ Kana we wu yaramana swele dwii repuru wej cuk cuk, pero ka swele dwii yarman kana we, koo wej

pwangge lingling cika miima.>>

⁴⁵ Pu bagiraa kuruwa yi Parisayo nuu ciyei du balanggai du Yesu cei, pma kuranga kin a cegu pma.

⁴⁶ Pma kasa ba ta yo, anda pma nuu gwasu nuwa dingin pma dee twii banabi.

22

Balanggu ciyeu a dwii waandi laabwiya

¹ Yesu sa pma ciyei du balanggai dong kin,

² <<Lau ku diyou cika balaa wu ninga waandi laabwiya bol yo.

³ A tum kewaa ya ba sa ciyei nuwa bu yo yiwe wa ba baanga waandi swii anda pma kwaanga baaggu.

⁴ <<A pero tum kewaa bu kangga a ce kin, Bu sa pma bu nuwa sa pma ciyei wa min n mata menenggu jeendi. N laca gomtorongi yi tanggi mi su mwalanggi, kana ca menenggi. Bambe waandi laabwiya.>

⁵ <<Anda pma yaa ku ka twiyau, pma mwatanga, bu kangga aanda kondou, bu kangga aanda lummo.

⁶ Bu kangga taa kewaa bwii a turongo pma, a laca pma.

⁷ Balaa wii suko wang. A tum kacara ya laca nuwa bu laca kewaa bwii, a taa gwej dwii mwa mwa.

⁸ <<Pero a sa kewaa ya bu tuma bwii kin, <Waandi laabwiya sina cipigi anda nuwa bu n gicila n tum man

pma wa pma yinnibu ba baanga.

⁹ Ambira nyindi su miringgi gwei bu sa ciyei kana we wu bu nyingga ba baa waandi sina.>

¹⁰ Dingin tono kewaa bwii mwati a ponggu nyindi a kuranga nuwa mwa mwa bu nyingga wa, bu nyaa wa yi bu bwii wa, laa laabwiya twangwa yi rungguwa.

¹¹ <<Pu balaa diiro ba ko rungguwa, a ko nere wu kangge wu yaa see laabwiya.

¹² A pira kin, <Basinte, a ning wei nye ma dimmuwe pina yaa see laabwiya?> Nere wii yaa puuna.

¹³ <<Balaa wii sa kewaa ya bu sugu pma bwii kin, <Twala wari yi mwari ma yikiyo twalange ma manna pu yi kumjila, pma jii wei wiindi yi dumonggu nyiyau.>

¹⁴ <<Nuwa bu nuwa yiyanga wa tum, anda bu nuwa seka wa banyina.>>

Yagu janggal Balaa Kaisar

¹⁵ Buri Parisayo twiyongo twalange a kasa nyindi, ba ciman Yesu tandau a bonggo ceu yei.

¹⁶ Pma suka kwatimba pma kem yi nuwa Hiridus wa pma ce kin, <<Kulume, yi soma mai jire. Pero ma jukur nyinou Yambau yi jire, ma yaa seki nuwa, ma de nuwa mwa mwa waiyou wiino.>>

¹⁷ Yoko sa yiro, a kogu mou cimacima yi ya janggal

Balaa Kaisar ru, ba yari ya ru?>>

¹⁸ Yesu som dangandi pmai tu bwii, a ce kin, <<Mba nuwa bu yi batal wa, dingin ca bu kasi bu ciingin mu tandau?

¹⁹ Bu jukunggi ken du nuwa yari janggal dwii.>> Pma de nyiia,

²⁰ a ce kin, <<Wekilei yi din dinaa du wei?>

²¹ Pma ce kin, <<Doo du Balaa Kaisar.>> A sa pma kin, <<Bu nyii Balaa Kaisar tu yoogi tu Balaa Kaisar, pero bu nyii Yamba tu yoogi tu Yambai.>>

²² Pu pma nuwa yito pma riyanga buri. Dingin tono pma mwatanga.

Pira dwii wunonggu boore

²³ A dwii nyanggi Sadukayo pma bu ce kin, wunonggu booru ya, pma baanga bonggo you yi pira.

²⁴ Pma ce kin, <<Kulume, Musa sa yiro kin ka nere boori yaa kwaraa ne, tagi ciya yo ba yiki wutukolo wii palaka ba biman kwaraa ciya yo.

²⁵ Boo yi nuwa bu kangga nibiyo twii ciyamba buri a cudu yiri. Wu gira pmo ninga laabwiya a bwaa, yake ku yaa kwaraa a du nure yo ciya yo.

²⁶ Yito mwaasi a ningi wa yi wu rop yi kunong be wu nibiyo yei.

²⁷ Cwata gorou you, nure wii bwaa.

²⁸ Yoko sa yiro, yake ku ning pma mwa mwa pmau nibiyo ko, a nyanggu

wunggu boore, yoo wej nure we?>>

²⁹ Yesu nyii lee kin, <<Bu liyanga dingin bu som bu tu Demteere ciyei, pero bu som bu dimbir Yamba.

³⁰ Nyanggu wunonggi boore, nuwa na ningi laabwiya, kana ba nyii laabwiya, pma yoo wej cika bacamandi a diyou Yambau.

³¹ Anda dwii wunggu boore, bu ce bu tu Yamba sambira ru? Yamba sambira kin,

³² <Mi n Yamba wu Ibrahim, Yamba wu Icahu, Yamba wu Yakubu.> Yo yaa yoogi Yamba wu nuwa bu bwaanggi wa, yo yoogi Yamba nuwa bu yi piima wa.>>

³³ Pu nuwa tum nuwa yito pma riyanga buri yi yiringi tu jukuya.

Teere du gwala yi giru

³⁴ Pu Parisayo nuwa kin Yesu diini Sadukayo sindi siyei tok, pma kuranga buri.

³⁵ Wu wiino pmo wu som teeringi wang, a cuu yo yi wuna pira.

³⁶ <<Kulume, miringgi teeringi du gwala yi giru dono?>>

³⁷ Yesu nyii lee kin, <<Ma kangman Mbaa Wu Gira Yamba mo yi gaanggu mou mwa mwa, yi bawei mai mwa mwa yi dangandi mai mwa mwa.

³⁸ Too teere du gawuriyo yi du gwala yi giru.

³⁹ Du rop yei cika doo mwaasi, <Ma kangman bapun mo cika buri mai.

⁴⁰ Teeringi yi yiringi tu banabindi jukuri mwa mwa daangi laa teeringi tu rop too.

Kristo too bol we

⁴¹ Pu boo Parisayo boo kuranggi buru, Yesu pira pma kin,

⁴² <<Bu dangani ca dwii Masiya? Yoogi bol we?>>

Pma nyii lee kin, <<Too bol Dawud.>>

⁴³ A sa pma kin, <<Dingin ca ki, Dawud ce ciyei yi dimbire Bawei du Walwal, a yigu Masiya kin Mbaa Wu Gira? Dingin a ce kin,

⁴⁴ <<Mbaa Wu Gira sa Mbaa Wu Gira mi
<Sin siyei wai mu wu jeu

kopo ka n diini bacemba ma kuu mou.>>>

⁴⁵ Ka Dawud yi Masiya kin, Mbaa Wu Gira wai, <<A ningwa nye ba yoo bol yo?>>

⁴⁶ Yaa wu pun ciyei, yake kwii nyanggu yaa wu pero ninggu ma yo pirandi.

23

Yesu tukulanga kulumba teering wa yi Parisayo

¹ Yesu sa nuwa tum yi kwatimba ya kin,

² <<Kulumba teeringi wa yi Parisayo bwii pma bu jukuri pitindi teeringi Musa.

³ Dingin tono bu ninga pongondi yi kana ca tu sa mbirai, bu ningi ya tu pma ninggi, dingin pma yaa pongi tu pma wasigi.

⁴ Pma der see wu komburum ba cerman

nuwa, anda pma yiri pmai
yaa lee mwanngu yi wai.

5 Pma ningi kana ca
palaka nuwa ba ko. Pma
bali ciyei Yambai ba cwaki
balayandi gembirendi yi
tono ba bongna dwii, pero
cwaki nyandi
gatanggamandi pmai
cokurondi.

6 Pma kasi pisindi bagirai
a jor waandi, yi pisindi su
kundi wang a girindi kuru.

7 Pma kasi nuwa ba ci
pma a lummondi pero nuwa
ba yi pma kin kulumba.

8 <<Anda mba, bu lee ya
nuwa ba yi mbira kin,
<Kulume,> dingin bu boo
kulum wiino tibak pero bu
yoogi ciyamba buri.

9 Pero bu yirya kana we a
sima min, <<Mbaa,> dingin
bu boo yi Mbaate wiino
tibak a diyou.

10 Kana mba, bu lee ya
nuwa ba yi mbira kin,
<Kulume,> dingin bu woo yi
kulum wiino tibak, wii
Masiya.

11 Wu gwala yi gira cudu
mbiri ba yo kewe.

12 Dingin kana we wu wun
dwii yei nuwa cingo wei
anda kana we wu cingo dwii
yei nuwa nyii wei giru.

13 <<Bu yoogi yiri bunam,
mba kulumba teeringi wa yi
Parisayo, mba bu yi batal
wa! Bu laka nyinou lau ku
diyou a bonggo nuwau, mba
yir mbiri dong bu teembiri
bu pero bu du pma bu
teendu wei wa ba teendo. [

14 Bu yoogi yiri bunam,
mba kulumba teeringi wa yi
Parisayo, mba bu yi batal
wa! Bu ningaman wutukola
lelu, ba yi see wu laandi
pmai, pero ce kuru cokurok
cika nuwa bu nyaa wa. Boo
nuwa tii wei kuulu wang.]*

15 <<Bu yoogi yiri bunam,
mba kulumba teeringi wa yi
Parisayo mba bu batal wa,
bu kereni kana piyau a sima
yi you ku piu palaka bu wuu
nere wiino ba pong mbira,
pero ka baayi, bu dina ba yo
bol bwalau gwala mbira daa
rop.

16 <<Bu yoogi yiri bunam,
mba kerma bu taagu nuwa
wa! Bu ce min, <Kana we ka
wereni yi laa Yambau too
yiri tu kanggi ne anda ka
kana we wereni yi sinariya
wu laa Yambau, tiini wera
yo.>

17 Mba bacinba kerma wa,
tu gwala yi giru tono?
Sinariya ru, laa Yambau yo
wu diini sinariya ba ninga
walwal ru?

18 Bambang bu ce min,
<Kana we wu werenga yi
kwaare Yamba too yiri tu
kanggi ne, anda kana we wu
werenga yi nii du miri, tiini
wera yo.>

19 Mba nuwa bu yoogi
kerma, tu gwala yi giru
tono? Nii ru, kwaare du
diini nii ba ninga walwal ru?

20 Dingin tono kana we
wu werenga yi kwaare
werenga yi kana ca tu miri.

21 Kana we wu werenga yi

* 23:14 23:14 Lakargarindi su kanggi yaa ku bala bonggo ciyei kwap sur nii!

laa Yambau a werenga yi
tono yi wu sii miri.

²² Kana we wu werenga yi
diyoo Yambau a werenga yi
candu Lau Yambau yi wu
siini miri.

²³ <<Bu yoogi yiri bunam,
mba kulumba teeringi wa yi
Parisayo mba bu batal wa.
Bu nyii tiino miringgi kwap
wu see ali mbire, baabu,
dauri, yi waasa yi bungul,
anda bu kwaa tu gwala yi
kundi you, bu tumgu jirei yi
bunam yi ninggu yiringi
cimacima. Too tu daa yei na
bu ninga, bu dur ya tu
conggoi.

²⁴ Mba kerma bu taagu
nuwa wa, bu tosi gundu
dingin bu yiki gumpi su
kitindi anda bu miu nggela.

²⁵ <<Bu yoogi yiri bunam,
mba kulumba teeringi wa yi
Parisayo, mba bu batal wa.
Bu cardo goro kaagu yi
gorou panane anda miringgi
yei twangi yi yawo yi ninggu
tu gaangu mou kasi.

²⁶ Kerma Parisayo wa! Bu
car miringgi kaage yi
panane bati, palaka goro
you ba ningi wei walwal
mwaasi.

²⁷ <<Bu yoogi yiri bunam,
mba kulumba teeringi wa yi
Parisayo mba bu batal wa!
Bu cika purongi tu nuwa
banni tone du populok, kogu
you kundi a twalange anda
miringgi yei twanggi yi kuri
nuwa bu bwaanga wa, pero
kana ca yaa walwal.†

²⁸ Bu yito, a twalanga bu
cika nuwa bu ninggu pisu
wu nyaau wa bonggo
nuwau anda miringgi mbiri
twanggi yi batal yi tuwe.

²⁹ <<Bu yoogi yiri bunam,
mba kulumba teeringi wa yi
Parisayo mba bu batal wa,
bu mween dwiiyongi
puringi banabindi, pero bu
yekiri purongi nuwa bu
nyaa wa.

³⁰ Pero bu ce min, <Ka na
yi boo jor kwiimba yuwa
wei, na yaa ku yi necu wei
dwii yi pma yi laca
banabindi.>

³¹ Yito mwa bu jukuya
min bu yoogi kakaa pma bu
laca banabindi wa.

³² Bu jee gawure bu
twanga wurai du kakaa mba
toso.

³³ <<Mba coogindi, mba
kwaraa bageci wa! Nindu
wei nye bu ce mbir bali par
bwalai?

³⁴ Dingin tono, n woo tum
mbir banabindi yi nuwa bu
pwiyanggi wa yi kulumba.
Bu jiru wei bu kangga, bu
piini bu kangga yeu, bu
wacanu wei bu kangga a
girindi kuru pero bu kekenu
wei pma gwei yi gwei.

³⁵ Nuwa ninga mbiru wei
bali dwii tiima nuwa bu
ning pisu wu nyaau a gawuri
Yamba bu nuwa par siyei a
sima, toso dwii tiima Abila
nere wu ninga pisu wu
nyaau bee bu Sakariya bol
Berekaya wu bu jiyo cudu
laa Yambau yi kwaare.

† 23:27 23:27 Nuwa bu Yudaya wa banni tone du populok a purongi a
Wurcalima palaka runguwa ba mwani ya ba ninga yaa walwal.

36 N woo sagumbiru jire mwa mwa too yiringi julo wei dwii nuwa bu sinaa daandi wa.

37 <<Aing! Wurcalima! Mba bu laci banabindi wa, pero bu bacanga nuwa bu Yamba tumuwe bonggo mbiru wa! Daa sono n kasi n kura mbira cika ku cwiyo kuran kwaraa ya miringgi kongondi yei, anda bu kwaanga!

38 Suwa, nuwa duu mbiri laa mbiru koni!

39 N woo sagumbiru, bu peri kogu mu, kopo nyanggu ku bu ce min, <Wuure, a bonggo yo, wu bagu a miringgi din Mbaa Wu Gira!> >>

24

Somdi daandi su cwata gorai

1 Yesu du laa Yambau, a mwatugu, kwatimba ya baanga bonggo you pma jukugu yo mweendi twii.

2 A sa pma kin, <<Bu kogu tina yiringi mwa mwa, n sagumbiru jire Yaa sweli du nuwa duru wei a dwii bagon yo, kana dono nuwa kwiyanu wei.>>

3 Pu boo Yesu woo pisu dwii Cingu Souri Setun, kwatimba ya baanga bonggo you wulak pma ce kin, <<Sayiro, too yiri ningdu wei pene pero somdi bagu mai ca, yi daandi su cwata goroi?>>

4 Yesu nyii lee kin, <<Bu ruun tuwe kana we ba ciye mbiri ya.

5 Dingin nuwa tum baanga wei yi din mi, a cegu kin, <N yoogi Masiya,> pero pma ciyonu wei nuwa tum.

6 Ka bu nuu cewi kwai wundu wundu, anda bu nuu ya gwasi, tagi too yiringi ba ningi wa, anda boo nyanggu ku cwata gorou baa bu.

7 Sima wunmanu wei sima, lau wunmanu wei lau. June yari wei pero sima siktu wei buri pendi wundu wundu.

8 Too mwa mwa too toson taa kuulu.

9 <<Nuwa diinu wei nuwa ba pumbiri kuule, pero ba lacambira, bambam nuwa bu sima mwa mwa kwaambiri wei dingin mi.

10 A dwii jore nuwa tum yaranu wei miringgi leegu jirei, cuuru wei buri pmai pero kwaa wei buri.

11 Pero banabindi leendi twiyongo wei tum, pero ciyonu wei nuwa tum.

12 Tuwe cwatu wei buri dingin toño kangam nuwa tum ningi wei yututu.

13 Anda kana we wu boo gaanggu lam nyanggu ku pungu nyiinggu wei mirma.

14 Anda kopo ka nuwa wasir ciyei du teng du lau Yambau kana piyau a sima mwa mwa dingin nuwa mwa mwa ba nuwa, anda nyanggu cwata gorou baa.

15 <<Ka bu kweyi yiringi pusi twii tu dee sentanggi, pitindi pu walwal a Laa Yambau cika tu banabi Daniel bala kin, yama kana we wu cegu dinaa ciyei ba kuranga too.

16 A dwii jore, yama pma bu miringgi Yudaya wa ba ceendo cingiri.

17 Kana we wu dwii kani ba julo ya dingin ba dee kana ca a lai.

18 Kana we wu woo kondou ba waata ya lai degu gatangamau.

19 A kwii nyanggu, nurumba bu yi rwiyyengi wa yi bu puugu nyii kwaraa wa, ningamanu wei pma yi buu.

20 Bu ce kuru cuu mbiru ba yoo ya yi jundu kana nyanggu Sabadu.

21 Dingin a dwii jore nuwa tii wei kuulu wang, wu boo nuwa tii bu tiigu yake toson taa simau kopo yoko, pero yaa ku perdu wei.

22 Ka na nuwa gwandila bu daandi swii ne yaa wu yilu wei, anda dingin pma bu Yamba seka wa, nuwa gwandila daandi swii.

23 A dwii jore kana we ka ce kin, <Ko, Masiya yo wuna!> kana ce kin, <Yo wii!> bu lee ya jire yi tono.

24 Dingin Masiya wu leendi yi banabindi leendi twiyongo wei, pero ninggu wei yiringi riyandi buri ba welenga kana bu nuwa Yamba seka pma wa, ka pma puu wei wai.

25 Bu suwa, n sambira kilang, boo jor ninga bu.

26 <<Dingin tono kana we wu sambira kin, <Yo wii a gulai,> bu twiyoni ya, kana ce kin, <Yo wuna miringgi kani,> bu lee ya jire yi tono.

27 Dingin cika ku nyil gundu nyildi donome nuwa

kwei nyambiranggu, yito yi bagu Bol Nere.

28 Pu komdi soo miru, baperi kurani buri pwii.

29 <<Goro kuuli wu daandi swii, a kinangu,

<Nyanggu yo wei kumjila, pero pwalau na swiiri buri,

bajwari yaranga wei diyow, pero yiringi tu diyow saktu wei buri.>

30 <<A dwii jore somdi Bol Nere twii wei a diyow, pero mwa mwa duuri tu sima bwianu wei gaanggu, ka pma kwee wei Bol Nere bagu miringgu tinendi a diyow yi dimbire yi yilau wang.

31 Yo diinu wei nuwa ba wuu jume yi miu ba tummu wei bacamandi yei, kana piyau ba kuranga bu yo seka wa a miringgi kengandi nii su simai.

32 <<Yoko n kasi bu tilanga too yiri bonggo sou pwalgu, Ka bu kwee tosi bulugu, wandi yei tori bu soma min jundu ninga nem.

33 Yito mwaasi, ka bu kwee too yiringi mwa mwa, bu soma min a ninga nem, woo nyinou.

34 N woo sagumbiru jire nuwa bu sina daandi wa pma na bwaani kopo ka yiringi too mwa mwa ningdi buri.

35 Diyow yi sima woru wei anda ciyei mi yaa ku woru wei kana banyina.

Yaa wu som nyanggu yi jor yei.

36 <<Yaa wu som nyanggu kwii kana jor yei, kana bacamandi su diyoo, kana Bwiya, buri Mbaate.

37 Cika ku ningi wa a daandi Nuhu, yito mwaasi nindu wei a jor bagu Bol Nere.

38 Cika ku ningi wa kamin daandi su jame dee, nuwa jegu yi naagu, nuwa ninggu laabwiya yi nyigu laabwiya kopo nyanggu ku Nuhu diiro konggoru.

39 Yaa ku pma som tu nindu wei, kopo ku jame baa dee pma. Yoo wei yito a jor du Bol Nere baa wei.

40 Nuwa kinggu wei nuwa rop kondou nuwa deru wei wiino, ba du wu wiino.

41 Nuwa nyinggu wei nurumba rop kogu yiri nii nuwa deru wei wiino ba du wu wiino.

42 <<Dingin tono, bu ninga pu swerigu dingin bu som bu nyanggu ku Mbaa Wu Gira mbiri baa wei.

43 Anda n kasi bu kuranga min, ka nere wu laa wayau, na som jor du kuwe baa wei yi kume na sweru wei, yaa ku duru wei kuwe ba diiwe laa you.

44 Dingin tono bu siya cipigi buri, dingin Bol Nere baa wei a jor du bu yaa temandi.

45 <<Wii kewe yo we wu yi jire yi pwii, wu nere wu gira yo diin yo ba suwa kewaa bu laa you wa, ba nyii pma jeendi pmai cimacima a jor du daa yei?

46 Wuure bonggo woo nere, wu nere wu gira yo ka waatai ba kinggi wei a ninggu wurai yei cimacima.

47 N woo sagumbiru jire, yo cernu wei nere wii a dwii gina yo mwa mwa.

48 Ka cika kewe wii yi tuwe wei pero sar buri yei kin, <Nere wu gira mi daawe tum,>

49 pero tosi buwanggu kapima kewaa, pero yo wun jegu a naagu kem yi ba naamba nyinma.

50 Nere wu gira kewe wii waata wei a jor du nere wii teman bu, pero a jor du yo som bu,

51 baa puu wei kuule wang, ba neca yo yi nuwa bu yi batal wa, pu ji wei wiindi yi dumonggu nyiyau.

25

Balanggu ciyei a dwii bakorcanga kwap

1 <<A dwii jore, lau diyoo ningi wei cika bakorcanga kwap bu dee pitilari pmai aanda dingin ba terenga bwiyakaa wu laabwiya wa yo.

2 Bu nuwo wa twii bacinba anda bu nuwo wa pwiyanggi.

3 Bacinba bwii dee pitilari pmai yaa nunggu.

4 Bu pwiyanggi bwii pma dee nunggu a pitilari pmai yi cweindi pmai.

5 Bwiyakaa wii siiwe yaa ku baa kilang, mwa mwa pmau toso jusonggu dimau.

6 <<Yi cudu kumdi, nuwa nuu duwai kin, <Bwiyakaa

laabwiya yo wuna bu
twiyongo bu de rau.>

7 <<Buri bakorcanga bwii
wunongo, a menenga
pitilari pmai.

8 Bacinba bwii sa bu
pwiyanggi bwii kin, <Bu pu
yir nunggu mbiru pitilari
yiri a bwanggu.>

9 <<Pma nyii lee kin, <Ang
ang yaa ku yiri yiri wei kem
yi mbaa, kujang bu ambira
bu tenmanuwe buri mbiri
bonggo nuwa bu cuugu wa.>

10 <<Anda pu pma
mwatanga tenggu nunggu,
bwiyakaa laabwiya lamuwe.
Bakorcanga bu cipigi buri
wa bwii de rau kem yi yo a
waandi laabwiya. Pero
nuwa laka nyinou.

11 Gorou you, bu kangga
bwii baanga, pma ce kin,
<Nere wu gira, Nere wu
gira, wun yiri nyinou!>

12 <<A nyii lee kin, <N woo
sagumbiru jire n sommbiru
bu.>

13 <<Dingin tono bu cipa
buri, dingin bu som bu
nyanggi yei kana jor yei.

*Balanggu ciyei a dwii kewaa
kunong*

14 <<Bambang, cika nere
wu kangge wu ninggu
songmau, a yiwe kewaa ya
nyii pma gina yo ba suwa yi
tono.

15 Wu wiino a nyii ken
talenti nuwo, wu kangge
talenti rop, pero wu kangge
talenti wiino, kana wono
cuunggi dimbir yo, a ninga
songma ya.*

16 Nere wu nuwa nyii
talenti nuwo, a mwati yoko
yoko a ninga duu yi tono a
nyingga cwata talenti nuwo
wu kangge.

17 Yito mwaasi, wu nuwa
nyii talenti rop a nyingga
cwata talenti rop wu
kangge.

18 Anda wu nuwa nyii
talenti wiino wii a mwati
wul bou a sima ting ken
nere wu gira yo.

19 <<Goro daandi tum
nere wu gira kewaa bwii
waata buri songma ya a
kasa ba suwa gina yo wu
bonggo kewaa ya.

20 Nere wu nuwa nyii
talenti nuwo a dee talenti
wu kangge a nuwo a ce kin,
<Nere wu gira, ma nyiingge
talenti nuwo ko, n nyingga
cwata wu kangge nuwo.>

21 <<Nere wu gira yo see
kin, <Wusa, ma yoogi kewe
wu nyaa wu yi jirei! Ma
ninga jirei dwii yiringi
banyina, n diiminu wei sugu
yiringi tu tum. Bame ma
ninga buri degdeg kem yi
nere wu gira mo!>

22 <<Nere wu talenti rop
wii mwaasi a baa a ce kin,
<Nere wu gira ma nyiingge
talenti rop n nyingga cwata
talenti rop.>

23 <<Nere wu gira yo nyii
lee kin, <Wusa, ma yoogi
kewe wu nyaa wu yi jirei!
Ma ninga jirei dwii yiringi
banyina, n diiminu wei sugu
yiringi tu tum. Bame ma

* 25:15 25:15 Talenti wiino tum you lam ken wurai neri nyan mila kuna rop a
dwii jore

ninga buri degdeg kem yi nere_wu gira mo!>

24 <<Bur nere_wu yi talenti wiino wii baa, a ce kin, <Nere_wu gira n soma ma yoogi duu nere_ku ningandi yei yi buu, ma kaci pu ma pi bu, pero ma kurani pu ma wasi bu goma.>

25 Dingin tono n nuu gwasi, n mwatingge, n tuko talenti mo miringgi sima. Ko! Yiri mai yo tina.>

26 <<Nere_wu gira yo nyii lee kin, <Mo, kewe_wu yi tuwe_yi kuule! Ma soma min n kaci pu n pi bu pero n kurani pu n wasi bu goma?

27 Na ninga kundi, na ma ruu ken mi a betal kene, palaka ka n waata buri n nyingga a cwata buri.

28 Bu yi talenti woo bonggo_you bu nyii_wu yi talenti kwap.

29 Dingin kana we_wu woo yi tono_nuwa cwatamanu wei_yo, ba ninga tum. Kana we_wu yaa tono_kana tu yi tonoi_nuwa yiyamanu wei_yo.

30 Bu manni woo kewe_wu bwii woo twalange, miringgi kume, pu ningu wei pu windi yi dumonggu nyiyau.>

Nyanggu balu

31 <<A jor du Bol Nere_baa wei_yi yilau_you, kem yi bacamandi yei_mwa mwa, yo sinu_wei candu_lau_you_wu yi yilau.

32 Nuwa bu sima mwa mwa kuranu_wei_buri_gawuri_yei, yo kenu_wei_nuwa wundu wundu, cika

ku taage kari puuri bonggo kwamali.

33 Yo ruu wei puuri a wai you_wu jeu, kwamali a wai you_wu miu.

34 <<A dwii jore_Balaa wii sar wei_pma bu wai you_wu jeu kin, <Bambe, mba bu yi wuuri wa bonggo Mbaa mi, bu je_lau ku nuwa ruwo dingin mba yake taawu sima.

35 Dingin n nuu june_bu nyiinggi jeendi, n nuu jii bu punggu gundu, n yoo rungge bu julunggi bu,

36 n yaa see bu paringin see, n yaa cingcing bu suwangge, n woo jarum bu kacangguwe.>

37 <<Nuwa bu ning pisu_wu nyaa wa bwii lee wei kin, <Mbaa Wu Gira, yi ko mina_pene_yi june_yi jee mina, yi jii yi puu_min gundu ma naa?

38 Yi ko mina_pene_ma rungge, yi yi mina, pero ma yaa see, yi pari_min see?

39 Yi ko mina_pene_yaa cingcing kana a jarum yi kaca mina?>

40 <<Balaa wii nyii wei lee kin, <N woo sagumbiru jire, kana ca tu bu ningaman wu wiino wu banyina a cudu ciyamba muwa bina, bu ningangina.>

41 <<Pero sa ru wei_pma bu wai you_wu miu kin, <Bu lamanga poo_bonggo_mu, mba bu sentanggi wa, bu tembiro bwalau ku yaa dumdu, ku nuwa menenga dingin balaa buwai wa kem yi bacamandi yei.

⁴² *Dingin* n nuu *june* yaa ku bu *nyii*nggi *jeendi*, n nuu *jii* yaa ku bu *punggu* gundu.

⁴³ N *rungge* yaa ku bu *julungge*, n yaa *see* yaa ku bu *paringin* *see*, n yaa *cingcing* pero n *woo* *jarum* yaa ku bu *suwangge*.>

⁴⁴ <<Pma *mwaasi* *nyii* *wei* *lee* *kin*, <Mbaa Wu *Gira*, *yi* *ko* *mina* *pene* *yi* *june*, *yi* *jii*, *ma* *rungge*, *ma* *yaa* *see*, *ma* *yaa* *cingcing* pero *ma* *jarum* *anda* *yi* *kala* *min* *bu*?>

⁴⁵ <<Yo *nyii* *wei* *lee* *kin*, <N *woo* *sagumbiru* *jire*, *kana* *ca* *tu* *bu* *ningaman* *bu* *wu* *wiino* *wu* *banyina* *a* *cu**du* *pmai*, *bu* *ningangin* *bu*.>

⁴⁶ <<Nuwa *bwii* *teendu* *wei* *ku**le* *wu* *yaa* *matigu* *anda* *nuwa* *bu* *ning* *pisu* *wu* *nyaau* *a* *gawuri* *Yamba* *wa*, *aandi* *wei* *pu* *yi* *piima* *bu* *yaa* *matigu* *wa*.>>

26

Bagiraa ciiman Yesu tandau

¹ Pu Yesu mata cegu *too* *yiringi* *mwa* *mwa*, *a* *sa* *kwatimba* *ya* *kin*,

² <<Bu *soma* *min* *Waandi* *Yerigu* *a* *du* *daa* *rop*, *nuwa* *nyii* *wei* *Boj* *Nere* *nuwa* *ba* *piina* *yeu*.>>

³ A *dwii* *jore* *bagiraa* *kuruwa* *yi* *bagiraa* *nuwa* *wa*, *pma* *kuranga* *buri* *caame* *bagira* *kuruwa*, *wu* *dini* *yei* *Kayapa*,

⁴ *pma* *cipa* *buri* *dingin* *ba* *taa* *Yesu* *tukugi* *ba* *ji* *yo*.

⁵ *Anda* *pma* *ce* *kin*, <<Yaa *jo**r* *Waandi* *Yerigi*, *daakal* *nuwa* *ba* *wun* *kwai*.>>

Nur parman Yesu nunggu a Betani

⁶ Pu Yesu *woo* *Betani* *a* *miringgi* *laa* *Simon* *wu* *woo* *yi* *butangi* *nang*,

⁷ *nure* *wu* *kangge* *baa* *yi* *kukulo** *wu* *yi* *nunggu* *ku* *yi* *pircu* *wang* *ku* *run* *teng*, *a* *parman* *yo* *dwii* *pu* *woo* *jegu* *jeendi*.

⁸ Pu *kwatimba* *ya* *ko* *too* *yito*, *pma* *bwiyanga* *gaanggu*, *pma* *ce* *kin*, <<Woo *kwala* *yo* *ca*?>

⁹ *Nunggu* *koo* *nuwa* *na* *cuu* *yo* *yi* *ken* *tum* *ba* *nyii* *bakuuluwa*.>>

¹⁰ *Yesu* *som* *tu* *pma* *cegu*, *a* *sa* *pma* *kin*, <<*Dingin* *ca* *bu* *doma* *yi* *nure* *woo* *a* *dwii* *yiri* *tu* *nyaayi* *tu* *ninganginai*?>

¹¹ *Bu* *boo* *yi* *bakuuluwa* *kem* *yi* *mba* *kana* *pene*, *anda* *yaa* *ku* *n* *sii* *wei* *kem* *yi* *mba* *kana* *pene*.

¹² *Paringgu* *nunggu* *ku* *run* *teng* *ku* *paringina* *buri* *koo*, *a* *cipigu* *mu* *bonggo* *boore*.

¹³ N *woo* *sagumbiru* *jire*, *kana* *piyau* *pu* *nuwa* *wasiru* *wei* *ciyei* *du* *teng* *dina* *a* *sima* *mwa* *mwa*, *nuwa* *ce* *wei* *tu* *ningai* *dingin* *danggigu* *yi* *yo*.>>

Yahuda lee ba cuu Yesu

¹⁴ A *dwii* *jore* *wu* *wiino* *cu**du* *bu* *kwatimba* *ya* *bu* *kwap* *sur* *rop* *bwii*, *wu* *dini*

* 26:7 26:7 *Kukulo* *wii* *nuwa* *mene**ni* *yi* *swel* *du* *yi* *yilau*, *du* *nuwa* *yiri* *kin* *alabasta*.

yei Yahuda Iskariyoti a aara bonggo bagiraa kuruwa wa,
 15 a sa pma kin, <<Tu bu nyiinggu wei ca ka n din yo war mbiri?>> Pma ce ken asurpa kuna kunong nyii yo.
 16 Yake doo jore, Yahuda kasa nyindi su yo cuuru wei yo.

Yesu je jeendi Waandi Yerigi kem yi kwatimba ya

17 A nyangu ku gawuriyo a Waandi Burodi wu yaa Yisti, kwatimba Yesu wa baanga pira kin, <<Ma kasi yi menenga jeendi Waandi Yerigi piyau dingin mo?>>

18 A nyii lee kin, <<Bu ambira gwei bonggo nere wu kangge bu see min, <Kulum ce kin: Jor mi ninga nem. N je wei Waandi Yerigi kem yi kwatimba mu wa a laa mau.>>

19 Kwatimba ya bwii ninga cika ku Yesu sa pma ba ninga, pma menenga Waandi Yerigi.

20 Pu nyambirangu ninga, Yesu si siyau aari jegu jeendi kem yi kwatimba ya kwap sur rop.

21 Pu pma boo jegu jeendi, a ce kin, <<N woo sagumbiru jire, wu wiino cudu mbiri cuunggu wei.>>

22 Pma bwiyinga gaunggu, pma toso sagu yo wiino, wiino kin, <<Mbaa Wu Gira, wii mi ne?>>

23 Yesu nyii lee kin, <<Wu diini wai you miringgi panane kem yi mi cuunggu wei.

24 Bol Nere bwaaru wei cika ku balgi a dwii yei,

anda too yiri bunam bonggo nere wu cuu Bol Nere, kujang ku nuwa na bi bu yo.>>

25 Yahuda wu yo cuuru wei yo a ce kin, <<Kulume, wii mi ru?>> Yesu nyii lee kin, <<Ong ma ce.>>

26 Pu pma boo jegu jeendi, Yesu dee kumaa, a wananga Yamba, a gelenga, a nyii kwatimba ya, a ce kin, <<Bu yiya bu jee, too buri mi.>>

27 Pero a dee bosoro gundu inabi, a wananga Yamba, a nyii pma, a ce kin, <<Mwa mwa bu naa miri.

28 Too tiima muwa, bu twanga tu Yamba kwee yi nuwa ya, bu pardu wei siyei buri dingin pargu sukom welemdi nuwa tum.

29 N woo sagumbiru, yaa ku n peru wei naagu gundu inabi kopo kwii nyangu ku n naa wei ku pucu kem yi mba a Lau Mbaa mu.>>

30 Goro pu pma pii pii pma mwatanga Cingu Souri Setun.

Yesu ce kin Bitrus gwelu wei yo

31 Goro yito Yesu sa pma kin, <<Yi kum wunaa mwa mwa mbiru bu nyiinggu wei gorou, dingin balgi miringgi lakargar Yamba kin,

<N buu wei taage, n jiyo, kan puuri weenu wei.

32 Anda goro pu n wuni n cwii wei gawur mbiri n anggi Galili.>>

33 Bitrus nyii lee kin, <<Kana, kana we waatu wei buri yi gorou dingin mo, mi yaa ku n waatu wei.>>

34 Yesu see kin, <<Bitrus, n woo sagumou jire, a kum wunaa kamin koloo ba tee teere ma gwelenggu wei daa kunong.>>

35 Anda Bitrus ce kin, <<Kana n booru wei kem yi mo, yaa ku n gweleminu wei>> Pero mwa mwa kwatimba ya bu kangga bwii mwaasi ce yito.

Yesu ce kuru yi kwatimba ya a Gesimani

36 Goro yito Yesu mwati kem yi kwatimba ya a pu nuwa yiri kin, Gesimani, a sa pma kin, <<Bu sindi siyei pina mi n ko n songge gawure n ce kuru.>>

37 A dee Bitrus yi kwaraa Sabadi bu rop kem yi yo, a toso bwiyang gaanggu yi miyanggu buru.

38 A sa pma kin, <<Bawei mi twangi yi bwiyang gaanggu cika n bwaa. Bu sindi siyandi pina bu siya cipigi buri kem yi mi.>>

39 A kosuro banyina a yara, a suni kau sima, a ce kuru kin, <<Mbaa mi, ka nindu wai wei mo demangin kina cusugu. Anda dangandi mi ne, anda too mai.>>

40 A waata bonggo kwatimba ya baa nyingga pma diimandi, a pira Bitrus kin, <<Yaa ku bu puu wei bu siya cipigi buri kem yi mi nyan jor banyina ru?

41 Bu siya cipigi buri, bu ce kuru daakal bu yanna miyam. Bawei kasigu anda buri yaa dimbire.>>

42 A mwati ku rop a ce kuru kin, <<Mbaa mi, ka yaa ku nindu wei koo cusugu ba lamana kopo ka n cusi, yama dangandi mai ba ningwa.>>

43 Pu waatau a nyingga pma diimandi dong, dingin nundi pma ninga kombirom.

44 A du pma a waata buri dong, a ce kuru ku kunong a pero tu conggo ciyei.

45 Pero a waata buri bonggo kwatimba ya a sa pma kin, <<Boo bu boo diimandi ru? Bu yoronggu ru? Suwa jor ninga nuwa cuu Bol Nere a war nuwa bu yi welemdi wa.

46 Bu wunongo yi mwatanga! Nere wu cuugu mu wii woo bagu!>>

Nuwa ta Yesu

47 Pu boo Yesu woo cegu ciyeu, Yahuda wu wiino cudu bu kwap sur rop bwii lamuwe kem yi nuwa tum yi dompouri yi gumongi, bu bagiraa kuruwa wa yi bagiraa nuwa wa tumuwe.

48 Yo wu nere wu cuuru wei a ru somdi tu pma kuranu wei kin, <<Nere wu kuuna buri wii yo, bu tee.>>

49 Ku pma lama, yoko yoko Yahuda aara bonggo Yesu see kin, <<N ci mina kulume,>> pero a kuunu yo buri.

50 Yesu nyii lee kin, <<Basin mi, ninga tu demuwe.>>

Nuwa bwii twiyongo parnu wari taa Yesu.

51 Ku ningwa yito, wu wiino cudu barauwa Yesu a yaku wai a podo dompou you a kaca twiyau kewe bagira kuruwa a mwariya.

52 Yesu se kin, <<Pun dompou mou miringgi laa you, dingin wu podo dompou boori dompou.

53 Ma nuu min n pu yigu Mbaa mi, ba suka bacamandi tum yoko kina ru?

54 Anda ka n ning yito, ciyei Demteere du ce kin, tagi ba ningwa yito, nindu wei nye ba twangwa?>>

55 A dwii jore Yesu sa nuwa bu tum bwii kin, <<Dingin ca bu baanga yi dompouri yi gumongi bu tangge cika n kuwe? Kana kono nyanggu n sii laa Yambau n pirgu yiri nuwa anda bu tanggu bu.

56 Anda too mwa mwa a ningwa palaka ba twanga tu banabindi bala kin nindu wei.>> Kwatimba ya mwa mwa du yo a ceendo.

Yesu gawur bagiraa nuwa bu Yudaya wa

57 Nuwa bu ta Yesu wa a dee yo bonggo Kayapa kuru wu gira pu kulumba teeringi wa yi bagiraa Yudaya wa kuranga buri.

58 Anda Bitrus pong yo gantin, a lama bonggo laa kuru wu gira . A diiro sin siyei kem yi nuwa bu swerigu yo wa ba ko tu nindu wei buri.

59 Bagira kuruwa yi bagiraa nuwa bu Yudaya wa mwa mwa pma kasigu

seedaki leendu a dwii Yesu palaka pma ba ji yo.

60 Anda pma nyingga bu kana ca, kana ku baleenda twiyongo.

Cwata goro you nuwa rop twiyongo,

61 a ce kin, <<Nere woo ce kin, <N puu wei bwiyanggu laa Yambau n mwe nyan daa kunong.>>>

62 Bur bagira kuruwa wii wuni a sa Yesu kin, <<Yaa ku ma nyii wei lee a dwii weleceu wu nuwa boo cegu a dwii ru?>>

63 Yesu sin siyei tok.

Bagira kuruwa wii sa yo kin, <<N neca mina yi Yamba wii yi piima yi wera sa yiro ka ma Masiya Bol Yamba wai.>>

64 Yesu nyii lee kin, <<Ong cika ku ma ce koo, anda n woo sagumbiru pina yi gawure bu kwee wei Bol Nere pisu a wai wu jeu Yambau wu yi Dimbire a bagu miringgu tinendi a diyoo.>>

65 Bagira kuruwa wii pwaranga see yo dingin ba juku bwian gaanggu you, a ce kin, <<A ce cewi bwiyangi din Yambai! Dingin ca yi kasigu seedaki wu kangge dong? Suwa, yoko bu nuu koo bwiyangu din Yambau.

66 Bu ce min ca? Pma leeman yo kin, <<A yinno boore!>>

67 Bur pma tuuman yo tiima kau, pero cumongo. Bu kangga kapanga yo.

68 A ce kin, <<Masiya, ka ma banabi wai, sa yiro, wu buu mina we?>>

Bitrus gwela Yesu

69 Bitrus woo pisu miringgi laa kuru wu bagira, bur bweecanga wu kangge wu twii kewe baa bonggo yo ce kin, <<Mo mwaasi ma woo kem yi Yesu nere wu Galili.>>

70 Anda a gwela yo a gawuru pmai mwa mwa kin, <<N som bu tu ma cegi.>>

71 Pu twiyo nyinou, bweecanga wu kangge wu twii kewe ko yo, a sa nuwa bu pwii bwii kin, <<Wuna nere woo kem yi Yesu wu Nasaret.>>

72 A gwela dong, a werenga ce kin, <<N som bu woo nere.>>

73 Gorou banyina pma bu pitindi pwii bwii aanda bonggo Bitrus a ce kin, <<Manggu, ma woo cudu pmai, dingin miu ce mou a jukuya.>>

74 A toso werenggu kin, <<Bwiige ba tangge ka n cegu leendi wai, n som bu nere woo.>>

Kinongu koloo tee teere.

75 Bitrus dangga tu Yesu sa yo, <<Kamin koloo ba tee teere, ma gwelenggu wei daa kunong min ma songgu bu.>> A twiyo twalange, a ji windi wang.

27

Yahuda yaka buri yei

1 Yi pinu kilang, bagiraa kuruwa yi bagiraa nuwa wa

mwa mwa pma suwa tu pma ningu wei ba ji Yesu.

2 Pma twala yo, mwatanga yi yo de bonggo Bilatus wu twii gomna.

3 Pu Yahuda wu cuu yo ko nuwa mwar man Yesu bali boori. A ninga mondo mondo, a puu ken asurpa kuna kunong dwii bagiraa kuruwa wa wii yi bagiraa nuwa bwii.

4 A ce kin, <<N ninga welem, n cuu nere wu yaa weleceu.>>

Pma ce kin, Do yiri dono, too biiki mo.>>

5 Yahuda para ken dwii miringgi laa Yambau, a mwati yaka buri yei.

6 Bagiraa kuruwa wa wii dee ken dwii a ce kin, <Teeri lee bu nuwa ba parni doo ken a betal, dingin too ken tiimai.>>

7 Pma lee ba dee ken dwii ba ten sima nere wu mweeni dinendi, dingin ba yo pu nuwa ting runggua.

8 Twii tonu nuwa yiri kin, Sima Tiima wa lama yoko.

9 Too twang tu banabi Irmiya cei, <<Pma dee asurpa kuna kunong, too duu wu nuwa bu Israila wa ru woo kin nuwa ba cuu yo.

10 Pma dee ten sima nere wu mweeni dinendi cika ku Mbaa Wu Gira sangge.>>

Bilatus ningaman Yesu bali

11 Yesu tin tiyei gawur gomna, gomna pira kin, <<Ma yoogi balaa wu Yudaya ru?>>

A lee kin, <<Ong cika ku ma ce koo.>>

12 Pu bagiraa kuruwa wa yi bagiraa nuwa wa ce welemdi a dwii yei, yaa ku nyii lee.

13 Bilatus pira kin, <<Ma yaa nuugu seedaki wu pma cegu dwii ma ru?>>

14 Anda Yesu yaa ku sa pma ciyei, a dwii cewi tu pma ce dwii yei kana banyina, gomna riyanga buri wang.

15 Cika ku gomna mee ningi, kana sono Waandi Yerigu yo man nere wiino wu jarum wu nuwa kasa.

16 A dwii jore woo nere wu jarum wu nuwa soma wang yi ninga wu bwiiye, dini yei Barabas.

17 Dingin tono pu nuwa kuranga buri, Bilatus pira pma kin, <<Wu bu kasi n man mbira we Barabas ru, Yesu wu nuwa yiri kin Masiya ru?>>

18 Dingin a soma kin pma taa Yesu bonggo you dingin bwii.

19 Pu Bilatus woo pisu a pisu wu yo ning balu, nure yo ninga man yo tune kin, <<Ma ningamani ya nere wu yaa weleceu woo kana ca dingin reni n turuwa yi dweendi dingin yo.>>

20 Anda kuruwa bu bagiraa wa yi bagiraa nuwa wa pma ciyongo nuwa ba ce kin nuwa ba man Barabas, nuwa ba ji Yesu.

21 Gomna pira kin, <<Cudu pmai bu rop, n man mbuwe we?

Pma nyii lee kin, <<Barabas.>>

22 Bilatus pira pma kin, <<N ning ca yi Yesu wu nuwa yiri kin Masiya?>>

Mwa mwa pma nyii lee kin, <<Piina yeu ba bwaa.>>

23 Bilatus pira kin, <<Dingin ca? A ninga weleceu you ca?>>

Anda nuwa bwii cwata kwarindi kin, <<Bu piina yeu!>>

24 Pu Bilatus ko yaa tu yo puu wei, anda pma toso kasigu ruuni, dingin tono a dee gundu a car wari yei gawur nuwa bwii a ce kin, <<N yaa wai dwii boore nere woo, yama tiima you ba siya dwii mbiri!>>

25 Nuwa bwii mwa mwa lee kin, <<Yama tiima ya ba siya dwii yiri yi kwaraa yuwa!>>

26 A man manuwe pma Barabas, a din nuwa waci Yesu, a nyii Yesu kacara bu Roma wa ba piina yeu.

Kacara ninga man Yesu nyasi

27 Kacara Bilatus de Yesu miringgi caame gomna, pma yiwe kacara mwa mwa kuranga buri bonggo you.

28 Pma wuroman yo see a teeman yo gatangamau ku wuci ci cika balaa,

29 pma menenga metuwal turi a diiman yo dwii. Pma dee jwalu nyiia a wai wu jeu, pma kun kwiyei gawur yei, pma ningaman yo nyasi cegu kin, <<Bundi, balaa wu Yudaya>>

30 Pma tuuman yo tiima, pero pma dee jwalu ku wai

yo kwii a nīnga pu
buwanggu dwii.

31 Goro pu pma mata
nīnga man yo nyasi, pma
teeman yo see yo, pma de yo
ba piina yeu.

Piinggu Yesu yeu

32 Pu pma twiyonggu, pma
kaanga yi nere wu kangge
wu gwei Sayirin din yei
Simon. Kacara bwii kicanga
ba de yeu wii.

33 Pma baanga pu nuwa
yiri kin, Golgota, pitindi yei
kin, <<Koko Dwii.>>

34 Pma nyii Yesu gundu
inabi casinggi tu kwerek ba
naa, anda goro pu tiyau, a
kwaa naagu.

35 Pu pma piina yeu, pma
cwaanga see yo bonggo
keegu latombale.

36 Pma sin siyendi, nīnga
pu swerigu yo.

37 Nuwa bala weleceu you
a piina dwii yeu wii nem yi
dwii yei kin, <<Wunaa Yesu,
balaa nuwa bu Yudaya
wa.>>

38 Nuwa piini kuuwa rop
kem yi yo wu wiino wai you
jeu, wu kangge wai wu miu.

39 Nuwa bu cwiyonu wa
nīnga pu rweenggu a
gepugu dwii a ninggu yo
nyasi,

40 cegu kin, <<Ma ce min
ma repu wei Laa Yambau
ma moru wei nyan daa
kunong, mira buri mai, ma
julo yeu woo, ka ma Bol
Yamba wai!>>

41 Yito mwaasi yi bagiraa
kuruwa wa yi kulumba

teeringi wa yi bagiraa nuwa
wa pma nīnga man yo nyasi.

42 Pma cegu kin, <<Yo
mira bu kangga anda jaanga
mirigu buri yei! Balaa wu
Israila! Yama ba julo dwii
yeu woo, yo mwa yi lee wei
jire yi yo.

43 Yo lee jire yi Yamba.
Yama Yamba ba mira yo ka
kasi yo wei, dingin a ce kin,
<Yo Bol Yamba>>>

44 Ban kuuwa bu nuwa
piina yeu kem yi yo wa
rweenga yo mwaasi.

Boori Yesu

45 Yake cudu nyanggi,
kunjila laka sima bwii mwa
mwa kopo yi nyambiranggu
jor du kunong.

46 A jor du kunong Yesu yi
yire yi duwei kin, <<Eloi,
Eloi, lama sabaktani?>>
Pitindi yei kin, <<Yamba mi,
Yamba mi, dingin ca ma
manggi siyei?>>

47 Pu pma bu pitindi pwii
wa nuwa yito pma ce kin,
<<A yigu Iliya.>>

48 Kinongu wu kangge
ceero a diini soso gundu
inabi ku jomburom a diina
jwalu a diiman Yesu nyiyau
ba naa.

49 Bu kangga bwii ce kin,
<<Bu dwiya poo yi ko ka
yikwii Iliya ba mira wei yo
wai.>>

50 Pu Yesu pero yigu yiru
yi duwai, piima ya twiyo.

51 A dwii jore kowe wu laa
Yambau ngerenga buri rop
toso diyau bee sima. Sima
sikto buri swaringi gelenga
buri.

52 Purongi wumongo buri nuwa bu walwal bu bwaanga wa wunongo yi piima.

53 Pma twiyongo a purongi goro wungu Yesu boore, pma mwatanga gwei du walwal, pma juku buri pmai nuwa tum.

54 Pu bagira kacara yi pma bu kem swerigu Yesu wa ko sima sikto buri yi mwa mwa tu ningi wa, pma nuu gwasiwang, pma ce kin, <<Mangu too Bol Yamba!>>

55 Nurumba tum boo pwii pma sugu kwaanra. Pma pong Yesu yake Galili pma kalanggu yo wurai.

56 A cudu bu boo pwii wa, boo yi bu Maryamu wu Magadaliya yi Maryamu njaa Yakubu yi Yusupu yi njaa kwaraa Sabadi wa.

Tinggu Yesu

57 Pu nyambiranggu ninga nem, bagina wu kangge wu gwei Arimatiya a baa, din yei Yusupu, yo yiri yei woo cudu kwatimba Yesu wa.

58 A aara bonggo Bilatus, a senggo komou Yesu, Bilatus sa nuwa ba nyiia.

59 Yusupu diin nuwa cikumanuwe yo buri Yesu a yeu, a kumbulo yi lawan wu walwal.

60 A diin yo a puri yei du puci du wuli dwii sweli. A cenni sweli du duwi nyan puri dwii a mwati.

61 Maryamu Magadaliya yi Maryamu wu kangge wii pma pisindi puri dwii.

Nuwa bu swerigu puri Yesu wa

62 Ku lam pinu nyanggu sabadu, bagiraa kuruwa wa yi Parisayo aanda bonggo Bilatus.

63 Pma ce kin, <<Nere wu gira, yi dangga tu nere wu ciyeni nuwa woo cei pu boo woo yo piimau kin, <Goro daa kunong n wuni wei yi piima dong.>

64 Dingin tono diin nuwa ba swera puri dwii nyan daa kunong, dakali, kwatimba ya ba jinda buri yei, ba sa nuwa kin a wuni bonggo boore. Ka ningdi yito ciyeni tu goro yo gwalu wei tu gawuriyo.>>

65 Bilatus nyii lee kin, <<Bu dee kacara bu sweru wei wa bu ambira puri dwii bu swera nyan dimbiri mbire.>>

66 Pma aanda puri dwii, pma dii mwalinggi dwii sweli dwii, diini kacara ba swera.

28

Wunggu Yesu boore

1 Goro nyanggu Sabadu yi pin kilang a nyanggu Laadi, Maryamu wu gwei Magadaliya yi Maryamu wu kangge wii pma mwatanga ba suwa puri dwii.

2 Sima sikto buri wang, dingin bacama Mbaa Wu Gira a julo diyou Yambau, a aara puri dwii, a gumbulo sweli dwii a siina dwii yei.

3 A nyilanggu, see yo populok cika cankar.

4 Nuwa bu swerigu wa pma nuu gwasi yei pma remcuwa yaranga cika nuwa bu bwaanggi wa.

5 Bacama wii sa nurumba wii kin, <<Bu nuu ya gwasi, dingin n soma bu kasigu Yesu wu nuwa piina yeu.

6 Yaa poo, a wuni cika ku ceu, bambe bu ko pu nuwa kendau.

7 Bu ambira kilang kilang bu sa kwatimba ya, <A wuni bonggo boore, anda woo songma Galili a gawur mbiri. Bu kwee wej yo pwii.> Yoko n sambira.>>

8 Dingin tono nurumba bwii yala buri du puri dwii yi gwasi, yi buri degdeg, pma ceendo ba sa kwatimba ya.

9 Kinangu kwii Yesu baa bonggo pmau ce kin, <<N cigu mbiru.>> Pma baanga bonggo you kwiino mwar yei a kuraman yo sima.

10 Yesu sa pma kin, <<Bu nuu ya gwasi, bu ambira bu sa ciyamba muwa ba aanda Galili, pma konggu wej pwii.>>

Ciyei du nuwa bu swerigu puri Yesu dee

11 Pu nurumba bwii boo nyinou, bu kangga cudu nuwa bu swerigu puri Yesu wa mwatanga miringgu gwej a sa bagiraa kuruwa wa kana ca tu ningwa.

12 Pu bagiraa kuruwa wa kaanga yi bagiraa nuwa wa, pma sedo pwii, pma nyii kacara bwii ken tum.

13 Pma ba sa pma kin, <<Bu sa nuwa min, <Kwatimba ya baanga yi kume ba jinda yo pu yi boo diimandu.>>>

14 Ka doo ciyei lam bonggo gomna, yo nyan dwii yiri yi diramanu wej yo gaanggu pero yi yiki mbiri wej a kuule.>>

15 Dingin tono pma dee ken dwii ninga tu nuwa sa pmai. Woo labar wasi buri kwaara bonggo nuwa bu Yudaya wa a baa kina nyanggu.

Teeri du girai

16 Kwatimba ya bu kwap sur wiino bwii a aanda Galili, a cingu ku Yesu sa pmau.

17 Pu ko yo, pma kuraman yo sima anda bu kangga lee bu kin wii Yesu.

18 Yesu baa bonggo pmau a ce kin, <<Mwa mwa dimbire wu diyoyu yi sima nuwa nyingge

19 Dingin tono bu ambira a kana piyau miringgi sima bu yiwe nuwa mwa mwa ba yoo kwatimba muwa, bu ningaman pma batissima miringgi din Mbaate yi du Bwiya yi du Bawei du Walwal.

20 Bu pir pma ba ninga pongondi yi kana ca tu n sa mbirai. Jire, n woo kem yi mba kana pene pene, kopo nyanggu gwatugu simai.>>

COL

*Bulus a ci nuwa bu ponggu
bu gwei Kolosi wa*

¹ Wuna lakargar baa
bonggo Bulus, nere tumandi
Masiya Yesu wu Yamba seka
cuunggi dangandi yei yi
Timoti bagon yire.

² Yi boo balaman nuwa
Yamba bu gwei Kolosi wa,
ciyamba yuwa bu yi jire
miringgi Masiya wa.

Yama boo niuu yi pidau
gaanggu wu Yamba Mbaa
yire ba siya kem yi mba.

*Bulus ceman kuru nuwa bu
ponggu bu Kolosi wa*

³ Kana dono jore du yi
cegu kuru dingin mba, yi
wanan Yamba, Mbaa, Mbaa
Wu Gira Yesu Masiya yire,

⁴ dingin yi nuu leegu jire
mbiru miringgi Masiya Yesu
yi kangam wu bu ningaman
nuwa Yamba wa mwa mwa.

⁵ Bu ninga yito dingin
manam niuu wu nuwa ruu
mbiro diyoo, bu gacila bu
nuu labar manam niuu a
bonggo ciyei jirei, du twii
ciyei du teng.

⁶ Ciyei du teng du
bambuwe a jegu gawuru, a
giru a sima mwa mwa, cika
ku ninggu buru a cudu
mbiri yake jor du bu nuwa
pero bu kuranga boo nii
Yambau miringgi jire.

⁷ Bu tilanga bonggo
Abapas bagon wurai yire
wu yi kangne, wu ning

wurai Masiya yi jirei dingin
yo.

⁸ Yo sa yiri duu kangam
ku bu ningi miringgi Bawei.

⁹ Dingin tono, yake
nyanggu ku yi nuu tu bu
ningi, yaa ku lara cegu kuru
dingin mba palaka Yamba
ba twanga mbira yi somgu
tu kasi bu ninga a bonggo
somandi yi kurandi tu
Bawei nyii.

¹⁰ Dingin bu ninga pisu
wu nyaau wu nyii wei giru
Mbaa Wu Gira pero
diramanu wei yo gaanggu,
ninga mbire ba juki kana
dono wurai du nyaai, yi giru
miringgi somgu Yambau.

¹¹ Yi boo cegu kuru min,
Yamba ba ciko mbiro yi
kana wono dimbire cuunggi
dimbire yo, wu yi yilau,
palaka bu nyingga bogu
gaanggu yi kanadi yi dirang
gaanggu.

¹² Pero bu wananga Mbaa
yire, yo wu dina bu yinno
nyinggu gedel kem yi nuwa
Yamba wa bu miringgi lau
ku rang.

Yesu Masiya a gwala kana ca

¹³ Yamba mira yiro kuu
lau Balaa Buwai ku rim, a
de yiwe kuu lau Bol yo, wu
kangne,

¹⁴ Wu waka yiro, pero a
par siyei sukom welem yiru.

¹⁵ Nuwa yaa kwei Yamba,
anda Masiya wii yo wekilei
Yamba wu nuwa yaa kwei
wii. Wii yo woo yi dimbire a
dwii tu Yamba ruwo mwa
mwa.

¹⁶ Dingin Yamba ruu
yiringi mwa mwa a bonggo

you, yiringi tu diyou yi tu simai, tu nuwa kwei yi tu nuwa yaa kwei, kana lau kana dimbire, kana balamba kana lauri, mwa mwa yiringi Yamba ruwo bonggo you pero dingin yo.

17 Yo woo pu boo Yamba ruu bu yiringi mwa mwa, pero yo diini yiringi mwa mwa yoo a pisu pmau.

18 Yo yoogi dwii buri, wu twii ikkilisiya. Yo too toson taawu kana ca, wii yo wu Yamba wun yo gawuriyo a boore, palaka a miringgi kana ca yo ba yo wu gira.

19 Yamba kasa kana ku Masiya yoo nere, yo cimacima yi Yamba a kana wono nyinou mwa,

20 pero a bonggo Masiya a sipa kana ca yi yo, kana yiri tu simai yi tu diyou, a de pidau gaanggu bonggo pargu siyau tiima ya a dwii yeu.

21 Doo, mba bu kwaara yi Yamba, pero bu yoogi bacemba ya, dingin yiringi tu bwii tu bu ningai pero bu danggai.

22 Anda yoko Yamba diini Masiya ba yoo yi buri cika nere ba bwaa ba sipa mbira yi buri yei, palaka bu ninga walwal a gawuri yei, yaa dire pero yaa weleceu.

23 Anda bu tiina leegu jirei mburu cingcing, bu laamani ya bonggo manam nij wu bu boo yi tono bonggo ciyei du teng. Too ciyei du teng du bu nuwa, du nuwa wasiman kana we a sima, wu mi Bulus n yoogi kewe n

wasiya.

Wurai Bulus dingin Ikkilisiya

24 N woo yi buri degdeg dingin kuule wu n tiigu dingin mba, pero n kasi a buri mi n twanga tu nyonai cuunggi kuulu Masiya dingin buri yei su twii ikkilisiya.

25 Mi n yoogi kewe ikkilisiya, dingin Yamba nyiinggi dingman yo dingin mba, palaka n sambiri ciyei Yamba cimacima,

26 Ciyei Yambai du n sagumbiru doo, too tu tukugai yake ba doo doo, anda yoko Yamba juki nuwa ya.

27 A bonggo nuwa Yamba bwii, Yamba seka ba juku nyaau ku yi yilau ku tukugau, a miringgi nuwa bu yaa yoogi nuwa bu Yudaya wa, wii Masiya a pisu miringgi mbiri, manam niuu wii yilau.

28 Wii yo yi wasigu ciyei a dwii yei, yi ningaman kana we dikacene, jukugu kana we yi somandi yiri mwa mwa, palaka yi de kana we biigi a miringgi Masiya.

29 Dingin tono n ningi wurai yi kwasan kwii, yi dimbir Masiya wu wurai miringgi mi.

2

1 Too tu diina n kasi bu som kwasang kwiiu wurai du n ninga dingin mba, pero yi pma bu Laudikiya wa, yi bu tii bu kogu mu wa.

2 N nĩnga yĩto dĩngĩn n kasi pma ba ciko buri mirĩnggi gaanggu pero ba neca dwii mirĩnggi kangam, palaka pma ba nyĩngga wuure, jor du pma kuranga pero pma lee yi jire, pero ba som tu tukugai tu Yambai, wu wii Masiya.

3 Yo wu mwa mwa nyaau somandi yi kurandi tukugi mirĩnggi yei.

4 N sagumbiru too yiringi palaka kana we ba wele mbir ya yi cewi tu cika jire anda twii leendi.

5 Kana pu n yaa kem yi mba mirĩnggi buri ne, anda n woo kem yi mba mirĩnggi bawe, pero n woo ningi buri degdeg ku n nuu pongondi mbiri yi pitu mbiru mirĩnggi leegu jire bonggo Masiya.

Param buru mirĩnggi Masiya

6 Yake ku bu lee Masiya Yesu too Mbaa Wu Gira, bu nĩnga pisu naapu yi yo pero bu nĩnga pongondi yi yo.

7 Bu ru swandi pero bu mo buri mirĩnggi yei, yi pitu yi dimbire mirĩnggu leegu jire mbiru cika ku yi juku mbira, bu nĩnga pu wandima.

8 Bu ruun tuwe kana we ba dii mbiri ya bu nĩnga pongondi yi somandi tu nyoi, tu twii ciyendi yi dangandi nuwai. Tu pma jukugu twii teeringi tu simai tibak, twii tu Masiya ne.

9 Dĩngĩn a mirĩnggi Masiya, Yamba juku buri yei cimacima yi yo,

10 pero a bonggo naapu mbiru yi Masiya, bu yoo nuwa bu twanggi wa, yo wu jeegi lau dwii balaamba yi dwii dimbire baweingi mwa mwa.

11 A bonggo naapu mbiru yi yo, nuwa mwar mbiri gwane, twii mwargu gwane ku nuwa ningi yi wai ne anda kwii ku Masiya. Yo dema mbir ningandi buri.

12 Jor du nuwa ningambiri batisima a nĩnga cika nuwa tin mbiro kem yi Masiya, pero a jor du nuwa wun mbiro batisima a nĩnga cika bu wunongo kem yi Masiya bonggo leegu jire mbiru yi dimbir Yamba, wu wun Masiya a boore.

13 Nang bu cika nuwa bu bwanggi wa dĩngĩn welemdi mbiri, dĩngĩn gaanggu mbiru twanggi yi welemdi, anda Yamba nyiimbiri piima kem yi Masiya, pero a para sukom welemdi yiri mwa mwa.

14 A deman siyei bali su dwii yiri dĩngĩn dwal pongondi yi teeringi nuwa bu Yudaya wa, Yamba demana bonggo piinggu yeu.

15 A gwala dimbir baweingi yi wu lauri, a dwiiyanga pma melma a gawuri nuwai, a gwala dimbiri pmo a dwii yeu wii.

16 Dĩngĩn tono, bu lee ya kana we ba ko mbira yi welem dwii yiri tu bu jei kana tu bu nai, kana dĩngĩn bu yaa ningi waandi su pma ningi, kana waandi pwalau

ku pucu kana cwaagu
nyangu Sabadu.

¹⁷ Too wekilei yiringi tu
too baayi, anda Masiya wii
yo wu manggu.

¹⁸ Dingin tono, bu lee ya
kana we ba dii mbira bu
ninga cingon dwii wu
leendu, yi kuraman sima
bacamandi, ka bu pong tu
pma jukugi yaa ku bu
kinggu wej woriri tu Yamba
ninga mbir alkawal. pma
cegu kin, pma ko somdi a
dwii too yiringi pero
gaanggiri pmai tu bwii
ciyeni pma ba gira dwii.

¹⁹ Koo duu nuwau yaa
naapu yi Masiya, yo wu twii
dwii buri. Masiya wii yo
neca buri swii mwa mwa ba
yoo tu tiinoi, cika ku
penendi yi kiri neca buri, ba
gira cika ku Yamba kasu
girau.

²⁰ Yake ku bwaanga kem
yi Masiya a pera mbira a
bonggo ponggu teering tu
simai, dingin ca karai kwii
bu ninggu pisu cika nuwa
bu pong teering tu sima wa,

²¹ cika teeringi tu ce kin,
<<Bu tari ya! Bu tii ya! Bu
mwani ya!>>?

²² Too yiringi mwa mwa
tagi ba bwiiwa, dingin too
teeringi, yi yiringi tu nuwa
jukuri.

²³ Pma dangandi kin too
teeringi jukuri pwii, diini
pma ba ninga kwasan kwiiu
pala ba jukuya kin pmai
ponggu Yamba ku dinggu,
diini pma cingon dwii ku
leendi, diini ba turongo buri
pmai wang, anda yaa

dimbire ba ja pma tungu
ningandi buri tu bwii.

3

Pisu wu pucu

¹ Yake ku bu wunongo
kem yi Masiya, bu man nii a
yiringi tu diyoo, pu Masiya
woo pisu a pu yilau pu
Yamba miru.

² Bu ninga dangandi
yiringi tu diyoo, bu ningi ya
a dwii yiringi tu simai.

³ Dingin bu bwaangi
miringgi ninga buri, anda
piima mba tukugi kem yi
Masiya bonggo Yambau.

⁴ Nyangu ku Masiya yo
wu twii piima mba baa, mba
mwaasi bu baanga wej kem
yi yo miringgi yilau you.

⁵ Dingin tono bu lara kana
tono wurang buri. Ba bu
taari, pusi, miyandi, kasigu
yiringi tu bwii, yawo, wu
twii kuraman sima buwai.

⁶ Dingin soo welemdi
sukom Yambau woo baayi
dwii nuwa bu tum too
yiringi wa.

⁷ Nang kwii bu tum too
yiringi, pu bu pisindi
miringgi buri.

⁸ Anda yoko bu lara too
yiringi, ba bu sukom, cene,
cere, bwiyangu dinu, yi
cewi tu bwii a nyandi mbiri.

⁹ Bu mwaramani ya leendi
buri mbiri, yake ku bu du
ninga mbiru wu nang,

¹⁰ bu yoo nuwa bu puci
wa, bu wakuwa, too buri su
puci Yamba mwe, yo
wakugu ba yoo cika yo,

palaka ba diina bu kuranga yo kundi.

11 yake ku bu yoo nuwa bu puci wa, yoko yaa ner wu Yudaya, kana ner wu yaa yoogi ner Yudaya, wu mwargi gwane yi wu yaa mwargi gwane, rungge, wu yaa pwiya gi, kewe kana wu yaa yoogi kewe, anda Masiya wii yo neca yiro mwa mwa.

12 Dingin tono, mba nuwa bu Yamba seka wa, bu walwal bu kangni wa, bu yoo nuwa bu yi bunam wa, nuwa bu yi kalanggu wa, yi cinggi dwii wa, bubuk wa pero yi kanadi wa.

13 Bu ninga kanadi yi kana we, pero ka wu kanggi bwiya mbiri gaanggu bu paraman yo sukum, bu par siyei sukum cika ku Mbaa Wu Gira par siyei sukum mbiru.

14 Tu gwala mwa mwa bu ninga kangam, dingin kangam wii yo diini kana we ba teca dwii ku nyaau.

15 Yama pidau gaanggu wu bonggo Masiya ba jee lau a gaanggiri mbiri, yake ku bu yoogi ner wiino, Yamba yi mbira dingin pidau gaanggu. Bu yoo nuwa bu yi wandima wa.

16 Yama ciyei Masiya ba siina gaanggu mbiru kana dono jore, bu pir buri mbiri, bu ningaman buri mbiri dikacene yi pwii wang, bu pii pii lakargar piyangi, yi piyangi terenggu Yambai, yi piyangi Bawei, yi wandima

bonggo Yamba miringgi gaanggiri mbiri.

17 Kana ca tu bu ning wei kana bonggo cegu ciyei kana bonggo ninggu, bu ninga tu nuwa bu ponggu Mbaa Wu Gira Yesu ningi, bu wananga Yamba Kwiite a bonggo Masiya.

Pisu wu daa laa nuwa bu pongguwa

18 Nurumba, bu ninga pongondi yi bwiyamba mba cika ku daaya nuwa bu pongguwa ba ninga.

19 Bwiyamba, bu kangman nurumba mba, bu ningamani ya pma cene.

20 Kwaraa, bu ninga pongondi yi kwiimba mba miringgi kana ca, dingin too tu diraman gaanggu Mbaa Wu Gira.

21 Kwiimba, bu bwiyamani ya gaanggiri kwaraa mba, dakali gaanggiri pmai ba yara.

22 Kewaa, bu ninga pongondi yi bagiraa mba miringgi kana ca, bu ningi ya a nundi pmai tibak, cika ku nuwa bu kangga ningi dingin nuwa ba wandi pma, anda bu ninga yi gaanggu kiino bu nyigu giru Mbaa Wu Gira.

23 Kana ca tu bu ning wei, bu ninga yi gaanggu mbiru mwa mwa cika ku bu ningaman Mbaa Wu Gira, anda neri ne,

24 dingin bu soma bu yiru wei woriri tu Mbaa Wu Gira ruuman nuwa ya. Dingin Mbaa Wu Gira Masiya wii yo bu ningaman yo wurai.

²⁵ Kana we wu ninga tu yaa kundi yiru wej woriri tu yaa kundi, Yamba yaa seki.

4

¹ Bagiraa, bu ningaman kewaa mba tu [daaya][cimacima], dingin bu soma min mba mwaasi bagira mbir woo diyau.

Dikacene

² Bu kwasi kwii cegu kuru kem yi ruunggu tuwe yi wandima.

³ Pero bu ce yir kuru, Yamba ba wun yiri nyinou yi wasi ciyei yei, palaka yi wasi ciyei du tukugai a dwii Kristo du nuwa twalange dingin tonoi.

⁴ Bu ce kuru n wasiya kundi cika ku daayau n ninga.

⁵ Bu sindi siyandi yi pwii cudi nuwa bu yaa ponggu wa, bu ninga wurai yi jore du bu nyingai.

⁶ Yama cewi mbiri ba yoo tu yi kalunggu pero teng kana dono jore, palaka bu puu nyigu lee wu daaya kana we wu ninga mbir pira.

Cima bu cwata goro wa

⁷ Bagon yire Tikikus wu yi kangne, wu ningi wurai Masiya yi jire basin wurai yire miringgi Mbaa Wu Gira, sa mbiru wej kana ca a dwii mi.

⁸ N woo tum yo bonggo mbiru palaka ba sa mbir tu yi miri pero ba ciko gaanggiri mbira.

⁹ Baa wej kem yi Onisimus bagon yire wu yi kangne wu yi jire, yo wu twii bagon mbire. Pma sa mbiru kana ca tu pinai.

¹⁰ Bagon mi Aristakus wu woo jarum woo cigu mbiru yi Markus wu kaka pmo kiino yi Barnabas woo cigu mbiru mwaasi. Wii yo wu n sa mbir ciyei a dwii yei min, ka baayi bu yiya wari rop.

¹¹ Jocuwa wu nuwa yir kin Yustus woo cigu mbiru mwaasi. Boo nuwa bu kunong boo a ninggu wurai Lau Yambau kem yi mi a cudi nuwa Yudaya bu ponggu wa, pma cingongin gaanggu.

¹² Abapasar kewe Masiya Yesu yo wu twii bagon mbiri, woo cigu mbiru. Woo cegu kuru yi kwasam kwiiu dingin mba, palaka bu tindi tiyei yi dimbire a miringgi tu Yamba kasi bu ningai mwa mwa, bu siya twanggi pero bu yoo yi kurandi tu manggu.

¹³ N kasi n sambira manggu a ninga wurai wang dingin mba yi nuwa bu gwei Laudikiya wa yi bu gwei Hirapolis wa.

¹⁴ Luka wu yi kangne, nere wu pu nyinou yi Dimas woo cigu mbiru.

¹⁵ Bu lam ciima muwa, ciyamba bu Laudikiya wa, yi Nimpa yi ikkilisiya wu laa you.

¹⁶ Goro pu bu ce lakargar woo a cudi mbiri, bu tumman nuwa bu ponggu bu gwei Laudikiya ba ce

mwa, pero bu ce wu nuwa
tumman nuwa bu .

¹⁷ Bu sa Arkipus min, <<Ba
kwasi kwii ma mata wurai
du Mbaa Wu Gira nyii
minai>>.

¹⁸ Mi Bulus, n woɔ bala
mbiri binaa cijma yi wai
mu, bu dangga mi miringgi
cali, boɔ nii Yambau ba siya
kem yi mba.

1TH

1 Wunaa lakargar twiawe bonggo Bulus yi Silas yi Timoti, aari bonggo nuwa bu ponggu Yesu wa bu gwei Tasalonika bu Yamba Kwiite yi Mbaa wu Gira Yesu Masiya. Boo niuu yi pidau gaanggu ba siya kem yi mba.

Yi ningu wandima dingin leegu jire nuwa bu Tasalonika wa

² Yi wanan Yamba kana pene pene dingin mwa mwa mbiru pero yi boo ce kuru nyikirik dingin mba.

³ Yi boo danggimbiri a gawuri Yamba yire yi Mbaa yire, wurangi mbiri tu bonggo leegu jire, yi wurangi kangam mbiru tu bu ninggi, yi bogu gaanggu mbiru bonggo manam niuu mbiru miringgi Mbaa Wu Gira Yesu Masiya.

⁴ Ciyamba muwa bu Yamba kangman pma wa, yi soma min Yamba sekambira bu yoo nuwa ya,

⁵ dingin ciyei du teng du yi dembuwe yaa bonggo bene tibak, anda bonggo dimbire, yi Bawei du Walwal, yi leegu miringgu gaanggu jungulong. Bu soma yi duu pisu wu yi ninga a cudu mbiri dingin mba.

⁶ Bu tila yiro yi Mbaa wu Gira, dingin bu lee ciyei Yambai miringi tiigu kuule yi bur degdeg bonggo Bawei du Walwal.

⁷ Dingin tono bu yoo nuwa bu, nuwa bu lee jire wa mwa mwa, tilanu wei ninga mbire a sima Makidoniya yi sima Akaya wa.

⁸ Ciyei Mbaa wu Gira wasi buri bonggo mbire, yaa Makidoniya yi Akaya yi wundu anda leegu jire mbiru bonggo Ciyei Mbaa wu Gira a lama kana piyau. Dingin tono yaa tu yi ce wei a dwii leegu jire mbiru,

⁹ dingin pma ce ciyei dwii kanda ku bu yi yiro. Pma sa yiro kanda ku bu lee jire yi Yamba, bu kwaa buwangi, bu kuraman sima Yamba wu manggu pero yi piima,

¹⁰ pero bu yangu Bol yo wu baa wei diyau Yambau, Yesu wu yo wun yo boore, wu mira yiro bonggo sukom Yamba wu woo bagu.

2

Wurai Bulus a Tasalonika

¹ Ciyamba, mba yiri mbiri bu soma min bagu yiru bonggo mbiru yaa ku siya nyo.

² Kana ku diwo you, nuwa pu yiri kuule yi rweendi a Pilipi cika ku bu somau, yi kalangu Yamba yire, yi wasimbiri ciyei du teng a cudu kwaangi wang.

³ Dingin ciyei Yambai du yi wasimbirai yaa miringgi dwii liyari, yaa bonggo dangandi yiri tu bwii, pero yi yaa ciyengumbiru.

⁴ Anda yi wasigu cika nuwa bu Yamba lee yi pma wa, pero a nyii pma

dingiman wasigu ciyei du teng. Yi yaa kasugu yi diraman gaanggu nuwa anda yi kasi yi diraman gaanggu Yamba, yo wu cuu tu gaanggi.

⁵ Bu soma yaa ku yi ce ciyei yi bene du teng, yaa ku yi ce ciyei yi tuko yawo yire. Yamba yoogi seedaki yire.

⁶ Yi yaa kasugu nuwa ba wandiyiro, kana bonggo mbiru kana bonggo weu, na yi kasugu wej, na ninga wurai yi giru yiru ku nuwa tumandi bu Masiya wa, na yi kasa kalanggu.

⁷ Anda yi yoo nuwa bu yi kanadi wa a bonggo mbiru, cika ku njaate sweri kwaraa ya, yi swerambira yito.

⁸ Dingin yi kangmbiri wang, yi ninga bur degdeg yi wasimbiri ciyei du teng du Yambai, bur too ne anda yi nyii piima yuwa dingin mba, dingin bu boo gaanggu yiru.

⁹ Ciyamba, yi kasi bu dangga yi wurai yi kuule wu yi boo tiigu kume yi nyangu dingin wasigu ciyei Yambai du teng dakali yi yoombiri dingman.

¹⁰ Bu yoogi seedaki, yito mwaasi a bonggo Yambau, kanda ku yi ninga pisu wu walwal yi tungu tu nyaayi pero yaa weleceu, a cudu mbiri bu lee jire wa.

¹¹ Cika ku bu somau yi ningaman kana wono mbire cika ku kwiite ningaman kwaraa ya.

¹² Yi cikombira, yi

dorambiri gaanggu pero yi senggombira bu ninga pisu wu daaya gawuri Yambai, yo wu yimbira miringi lau you yi yila you.

¹³ Pero yi boo wanani Yamba kana pene, dingin a jor du bu lee yi ciyei Yambai du bu nuugu bonggo yiru doo, yaa ku bu lee cika too ciyei neri, anda bu lee manggu too ciyei Yambai, du dinggu du wurai bonggo mba bu lee jire wa.

¹⁴ Ciyamba, bu yoo nuwa bu tilanggu nuwa bu ponggu Yamba wa a sima Yudaya wa bu miringgi Masiya Yesu, bu tii kuule a bonggo nuwa mba cika ku nuwa bwii tii kuule bonggo nuwa Yudaya wa.

¹⁵ Pma ji Mbaa Wu gira Yesu yi banabindi pero a kee yiro. Pma bwiyanan gaanggu Yamba wang, pma ninggu cere yi kana we.

¹⁶ Pma kwasugu kwii ba ja yire cegu ciyei yi nuwa bu yaa yoogi nuwa bu Yudaya wa palaka ba yilaniya. A bonggo ninggu yito pma gamaman buri pmai welemdi. Anda sukom Yambau gicila juluman pma.

Bulus kasa ba waata buri a Tasalonika

¹⁷ Ciyamba, jor du yi cwaanga buri yi mba nyan jore banyina, a buri tibak anda dangandi yiri too kem yi mba, yi kasigu pero yi kwasigu kwiiu yi kombira nunge yi nunge.

18 Yi kasa bagu bonggo mbiru, mi Bulus n ninga pu kasugu bagu yaa daa kiino anda Balaa Buwai laka nyinou.

19 Dingin manam nii yiru, yi dirang gaanggu yiru yi metuwal gorsondi a bonggo Mbaa wu Gira Yesu nyanggu ku baa wej, bwii mba ne ru?

20 Ku jireu, gorsondi yi dirang gaanggu yiru bwii mba.

3

1 Dingin tono yaa ku yi pu bogu gaanggu, yi ko a gwala yi sindi siyei a gwej Atina yo wundu yiru.

2 Yi tum Timoti bagon yire yi basin yire a wurai Yambai miringgi wasugu ciyei du teng du Masiya. Yi tuma ba cwatambiri dimbire pero ba cikombira miringgi leegu jireu,

3 palaka kana we gaanggu you ba yariya dingin kuule. Anda mba yiri mbiri bu soma min too tu dwii yiri.

4 Ku jireu, pu yi boo kem yi mba, yi gicila yi sambira min, yi tij wej kuule. Manggu a ningwa yitwii cika ku bu somau.

5 Dingin tono, n jaanga bogu gaanggu kana banyina, n tuma min n nuu labar leegu jire mbiru. N nuugu gwasu ko mwa Balaa Buwai ba teembira miyandi, bu yaranga, wurai yiri ba siya nyo.

6 Anda yoko Timoti waata buri bonggo mbire, a de yiwe ciyei du teng dwii

leegu jireu yi kangam mbiru. Pero a sayiro kin bu boo yi dangandi tu nyaayi a dwii yiri, pero bu kasi bu koyiro, cika ku yo mwa yi kasigu yi kombira.

7 Dingin tono ciyamba, leegu jire mbiru a cikoyiro miringgi mwa mwa turom yi kuule wu yi boo miri.

8 Yoko mere, yi para buri yake ku bu tindi tiyei yi dimbire miringgi Mbaa wu Gira.

9 Wandima ya ca bu yi ningamanu wej Yamba, a dwii diran gaanggu yiru a gawuri Yambai dingin mba?

10 Kume yi nyanggu yi kwasigu kwiiu cegu kuru yi kombira kau yi kau, yi kalambira pu bu dwalangi miringgi leegu jire mbiru.

11 Yama Yamba Mbaa yire yo yiri yei yi Mbaa Wu Gira Yesu ba caryiri nyinou yi baanga bonggo mbiru.

12 Yama Mbaa wu Gira ba cwatambiri kangam wang dwii kana wono mbire yi nuwa mwa mwa, cika ku yi ningambirau.

13 Yama ba ciko gaanggiri mbiri bu ninga pisu wu walwal, bu yoo yaa welem a gawuri Yamba yire yi Mbaa yire, kopo nyanggu ku Mbaa wu Gira Yesu baa wej kem yi mwa mwa nuwa bu bwii boya wa.

4

Pisu wu Yamba kasu

1 Dingin tono tu cwata gorou, ciyamba, yi

senggumbiru pero yi boo cikugumbiru dingin Mbaa wu Gira Yesu, bu ninga pisu wu nyaau, pisu wu diramanu wei gaanggu Yamba, cika ku bu tilanga bonggo yiru. Kana ku bu boo ninggu pisu yito, bu kwasi kwii bu ninga yito.

² Bu soma ciyei du yi sagumbiru a bonggo Mbaa Wu Gira Yesu.

³ Yamba kasi bu ninga walwal. Dingin tono bu cwaa kana kono duu taari.

⁴ Kana we ba som kanda ku sii wei kem yi nur* yo walwal yi nyiigu giru.

⁵ yaa miyandi taari cika ku nuwa bu sombu Yamba wa ninggu.

⁶ Kana we ba ningamaniya bagon yo tuwe, kana ba ningaman yo yiri cika too. Mbaa wu Gira ningamanu wei bali nuwa bu tum too yiring, cika ku yi sambira gawuriyo, pero yi ningambiri dikacene.

⁷ Dingin Yamba yiyirubu kin yi ninga pusi anda kin yi ninga pisu wu walwal.

⁸ Dingin tono, kana we wu kwaa doo ciyei yaa ku kwaa nere anda a kwaa Yamba, yo wu nyiimbir Bawei du Walwal.

⁹ Yaa tagi nuwa ba balambiri bala a dwii ku bu kangmanu wei buri, dingin Yamba jukumbira kin bu kangman kana wono mbire.

¹⁰ Manggu bu ningaman kangam mwa mwa kiyaa

nuwa bu ponggu bu sima Makidoniya wa. Kiyaa, yi boo cikugumbiru bu cwata ninggu yito.

¹¹ Bu kwasi kwii bu ninga pisu wu daayau, bu ninga tu gawuri mbiri, bu ninga wurai yi war mbiri, cika ku yi jukumbirau.

¹² Ka bu ning yito bu yo wei nuwa bu nyaa wa, a bonggo nuwa bu yaa ponggu wa pero bu daaniya laa bonggo kana we.

Watugu Mbaa wu Gira

¹³ Ciyamba, yi yaa kasi bu yooya yaa somandi a dwii pma bu daa diima miringi Yesu wa, pma bu bwaanga wa, dingin bu ningya bwiyang gaanggu cika nuwa bu yaa manam niyu wa.

¹⁴ Yake ku yi lee jire min, Yesu bwaa wuni, dingin tono yi lee jire pma bu daa diima kem yi Yesu wa, Yamba de wei pma kem yi Yesu.

¹⁵ Cuunggi ciyei Mbaa wu Gira, yo bu yi boo yi piima wa a jor du Mbaa wu Gira baa wei, yaa ku yi gicilu wei nuwa bu bwaanga wunonggu.

¹⁶ Dingin Mbaa wu Gira yiri yei julo wei a diyou kem yi yire yi duwei yi miu bacama wu gira pero yi wuugu jume Yamba. Pma bu bwaanga miringi Masiya wunonu wei gawuriyo.

¹⁷ Goro yito yo bu yi boo yi piima wa a dwii jore, nuwa de yir wei diyou kem

* 4:4 4:4 Som wei kanda ku sii wei kem yi nur yo, kana ku tari wei buri yei

yi pma miringi tinendi,
palaka yi kaanga yi Mbaa
Wu Gira a diyoyu. Yi sindi
siyei kem yi Mbaa Wu Gira
kana pene pene.

¹⁸ Dingin tono bu ciko buri
yi doo ciyei.

5

¹ Ciyamba, a dwii jorondi
yi daandi su too yiringi
ningdu wei, yaa tagi yi
balambira,

² dingin bu soma wang
min, nyangu Mbaa wu Gira
baa wei cika kuwe yi kume.

³ A jor du nuwa boo
pisindi pma cegu kin, <<Yi
pisindi teng yi pidau
gaanggu,>> bur bwiige baa
yarman pma, cika ku buu
pwii ningaman nurumba bu
yi rwiyyengi wa, yaa ba
gwala.

⁴ Anda ciyamba, bu yaa
miringi kume yi ku nyangu
koo bambo wei cika kuwe.

⁵ Mwa mwa mbiru bu
yoogi kwaraa pu rangu wa,
pero kwaraa nyangu wa. Yi
yaa yoogi bu kum wa kana
bu rum wa.

⁶ Dingin tono yi daaya
diima cika bu kangga
ningwa, yi ninga pu swerigu
pero yi ta buri.

⁷ Pma bu daa diima wa
daa yi kume, pma bu
nyinma jiri wa, jiri yi kume.

⁸ Anda yake ku yi yoogi bu
nyangu wa, yi ta buri, yi
tee leegu jire yi kangam cika
dakilau, pero yi tee manam
niuu wu mirayiri wei, wu
cika dwari boo keni.

⁹ Yamba sekayiribu dingin
sukom you, anda dingin yi
nyingga mirma bonggo
Mbaa Wu Gira Yesu Masiya.

¹⁰ Yo bwaa dingin yo,
palaka kana yi boo yi piima
kana yi daa diima yi sii wei
kem yi yo.

¹¹ Dingin tono bu ciko buri
mbiri pero bu mo buri mbiri
cika ku bu ninggu yoko.

Dikaciyei yi ciima

¹² Ciyamba, yi boo
senggumbiru, bu nyii giru
bagiraa mba bu ninggu
wurai a cudu mbiri, bu
taambiri pero nyiimbir
dikaciyei a dwii pisu nuwa
bu ponggu wa.

¹³ Bu nyii pma giru kundi
yi kangam dingin wurai
pmai. Bu sin sindiyei yi
pidau gaanggu yi buru
mbiri.

¹⁴ Ciyamba, yi boo
senggumbiru, bu yerenga
nuwa bu yaa ningi wurai
wa, bu ciko bu gaanggiri
pmai yara wa, bu kalanga
bu yaa dimbiri wa, bu ninga
kanadi yi kana we.

¹⁵ Bu lee yaa kana we ba
ya tuwe yi tuwe, bu kwasi
kwii kana pene bu
ningaman bur mbiri tu
nyaayi yi nuwa mwa mwa.

¹⁶ Bu ninga buri degdeg
kana pene pene.

¹⁷ Bu ninga pu cegu kuru
yaa largu.

¹⁸ Bu wananga Yamba a
miringgi kana ca, dingin too
tu Yamba kasi bonggo mbiru
a miringgu Masiya Yesu.

19 Bu cingeniya ciyei
Bawei du Walwal.

20 Bu cediya cewi
banabindi,

21 anda bu cuu kana ca, bu
ta tu nyaayi,

22 bu kwaa kana tonoyiri
tu bwii.

23 Yama Yamba, yoyiriyei
wu yipidau gaanggu ba
diina bu ninga walwal mwa
mwa, pero ba swera bawei
mbiri yipiima mba yiburi
mbiri yaa welem kopo jor
waatigu Mbaa Wu Gira Yesu
Masiya.

24 Yo wu sekambira a
yinno bu nyii jire yi yo, pero
yoningwei.

25 Ciyamba, bu ceyiri
kuru.

26 Bu cinuwa bu ponggu
mwa mwa yigaanggu
walwal.

27 N sagumbiru miringgi
din Mbaa Wu Gira, bu
ceman kiyaa mba mwa
mwa lakargar woo.

28 Yama booniju Mbaa wu
Gira Yesu Masiya yire ba
siya kem yi mba.

2TH

¹ Wunaa lakargar twiwe bonggo Bulus yi Silas yi Timoti, aari bonggo nuwa bu ponggu Yesu wa bu gwei Tasalonika bu Yamba Kwiite yi Mbaa wu Gira Yesu Masiya.

² Boo niyu yi pidau gaanggu bonggo Yamba Kwiite yi Mbaa wu Gira Yesu Masiya ba siya kem yi mba.

Wandima yi kuru

³ Ciyamba, tagi yi wananga Yamba dingin mba nyikirik, a daaya yito, yake ku leegu jire mbiru a cwatugu buru kwang kwang, pero kangam kana wono mbire a cwatugu buru.

⁴ Dingin tono, yo yiri yiri yi ninggu gorsondi dwii mbiri a bonggo nuwa bu ponggu Yamba wa bu kanga dingin bogu gaanggu mbiru miringgu leegu jire miringgu yi tiigu kuulu yi turom wu bu boo miru.

⁵ Mwa mwa too jukuya kin bali Yambai cimacima, dingin bu yinno bu sindu wei siyendi miringgu lau Yambau, twii tono bu tiigu kuule a dwii lau kwii.

⁶ Yake ku Yamba ninga yo cimacima, turonu wei pma bu turongumbiru wa,

⁷ anda mba bu nuwa turongumbiru wa, nyimbiru wei yoronggu yi yo mwaasi. Too yiri nindu wei a nyanggu ku Mbaa wu

Gira Yesu waata wei diyoyu jukuru wei buri yei kem yi bacamandi yei su yi dimbire miringgi cile bwalai.

⁸ Yo ningamanu wei bali pma bu kwaa Yamba wa yi pma bu kwaa ninggu ponggondi ciyei du teng du Mbaa wu Gira yire Yesu.

⁹ Yo mwarmanu wei pma bali su bwii kana pene pene, yo kee wei pma gawuri Mbaa wu Gira pero yi bonggo dimbire yo wu yi yilau.

¹⁰ A kwii nyanggu baa wei dingin nuwa ya bu walwal wa ba nyii yo giru, pero pma bu lee jire wa buri baru wei pma mwa mwa. Too mwa ban mba, dingin bu lee jire yi seedaki yire.

¹¹ Dingin tono, yi cembiri kuru nyikirik min Yamba yire ba diina bu yinno yir yei, pero bonggo dimbiri yo ba twanga kana tono dangandi mbiri dingin tunggu tu nyaayi yi kana dono wurai mbiri du twii wei bonggo leegu jirei.

¹² palaka nuwa ba nyii giru din Mbaa wu Gira Yesu Masiya a miringgi mbiri, mba mwaasi nuwa ba nyimbiri giru a miringgi yei, cuninggi boo nii Yamba yire yi Mbaa wu Gira Yesu Masiya.

2

Ner wu kwaa teeri Yambai

¹ Ciyamba, a dwii waatigu Mbaa wu Gira yire Yesu Masiya yi kanda ku nuwa

kurayiru wej a bonggo you,
yi senggumbiru,

² gaanggu mbiri ba
wuniya kana ba mwaanga
buri beda beda, ka bu nuwi
kin, nyanggu Mbaa wu Gira
a lammuwe. Ko wu kangge
ba ce yito miringgi bawei,
kana miringgi cewi, kana
miringgi lakargar ba ce kin,
bwii bu yo yi bala.

³ Kana we ba ciyembiriya
a miringi kana sono nyindi,
dingin nyanggu kwii na
baayi kopo ka nuwa kwaa
teeri Yamba gawuriyo, pero
ner wu kwaa Yamba wii
twiwe wej, wu nuwa
ruuman yo bwiige.

⁴ Yo kwaa kana ca tu nuwa
yiri kin yamba, yi kana ca tu
nuwa kuraman yo sima, yo
der dwii yej a gwala pma
mwa mwa. Yo diiri wej Laa
Yambau ba sin siyau, ba de
bur yej yo yoogi Yamba.

⁵ Yaa ku bu dangga min, yi
sambira too yiringi mwa
mwa pu yi boo kem yi mba
ru?

⁶ Yoko bu som tu jagu yo
bagu dingin yo jukuru wej
buri yej ka jor yej ninggi.

⁷ Kana yoko ningga wu
bwii wii too ningu buru
tukugi, anda yo wu jagu wii,
jee wej gawure, kopo ka
Yamba deman yo.

⁸ Bur ner wu kwaa teeri
Yambai wii baa wej anda
Mbaa wu Gira Yesu bwiyanu
wej yo yi cewi yej tu nyiia
yej, ba ji yo bonggo bagu
you a nyanggu waatugu you.

⁹ Ner wu kwaa teeri
Yamba wii baa wej yi

dimbiri wurang Balaa
Buwai, wurangi tu
gembirendi yi somdi yi
yiringi bagu buri, wundu
wundu.

¹⁰ Ning wej wurai yi kana
ca tu bwii ba ciyengo nuwa
bu nyino booru wa, dingin
pma kwaa kangam jire wu
mir wej pma.

¹¹ Dingin tono Yamba
tumuwe ciyendi kwang
kwang palaka pma ba lee yi
leendi,

¹² dingin nuwa ba
ningaman bali pma mwa
mwa bu kwaa leegu jire yi
jire wa, pero pma nuu tengu
tumgu tu bwii.

Bu tindi tiyei yi dimbire

¹³ Ciyamba, tagi yi
wananga Yamba nyikirik
dingin mba bu Mbaa wu
Gira kangman pma wa,
dingin Yamba sekambira bu
yoo bu gawuriyo wa, bu
nyingga mirma bonggo
Bawei du diini bu ningi
walwal yi leegu jire mbiru
yi cej du jire.

¹⁴ Tu diinai a yimbira bu
nyingga mirma bonggo ciyei
du teng du yi sambirai,
dingin bu nyingga yilau
Mbaa wu Gira Yesu Masiya.

¹⁵ Dingin tono, ciyamba,
bu tindi tiyei yi dimbire,
pero bu ta tu yi jukumbira
bonggo cewi yi bala yiri.

¹⁶ Yama Mbaa wu Gira
Yesu Masiya yo yiri yej yi
Yamba Mbaa yire wu
kangyiro, cikoyiri gaanggu
kana pene pene yi manam

niiu wu nyaau bonggo boo
nii you,

¹⁷ ba ciko gaanggu mbiru
ba nyiimbiri dimbire
miringgi wurangi tu nyaayi
yi cewi tu nyaayi.

3

¹ Cwata goroi you,
ciyamba, bu ceyiri kuru
palaka ciyei Mbaa wu Gira
ba wasi buri kilang kilang
pero ba kingga nyigu giru,
cika ku kinggau a bonggo
mbiru.

² Pero bu ce kuru Yamba
ba mirayiro bonggo nuwa
bu bwiiwa bu tum tu bwii,
dingin yaa mwa mwa nuwa
bu lee jire wa.

³ Mbaa wu Gira wu yi jire,
yo nyiimbir wei dimbire,
swerumbiru wei bonggo wu
bwii woo, Balaa Buwai.

⁴ Yi man nii yi Mbaa wu
Gira min, bu ponggu tu yi
sambira, pero bu jee wei
gawure yi ponggu.

⁵ Yama Mbaa wu Gira ba
taa gaangiri mbiri miringgi
kangam Yamba, yi boogu
gaanggu ku Masiya.

Yeru a dwii kwaagu wurau

⁶ Ciyamba, yi boo
sagumbiru ciyei miringgu
din Mbaa wu Gira Yesu
Masiya, bu neciya dwii yi
ner wu ceri wari, wu yaa
pongggu tu yi jukumbira.

⁷ Mba mwa yiri mbiri bu
soma min, tagi bu tilanga tu
yi ningi, jor du yi boo kem yi
mba yaa ku yi cera wari.

⁸ Yaa ku yi je jeendi nyo a
bonggo kana we, anda yi

ninga pu wurai yi cusanggu
kume yi nyanggu, daakal yi
yoo dingiman a dwii kana
wono mbire.

⁹ Yi puu wei yi sambira bu
kalayiro, anda yi kasi bu
tilanga bonggo yiru.

¹⁰ Kana pu yi boo kem yi
sambira min, ner wu kwaa
wurai, bu nyiia jeendi.

¹¹ Dingin yi nuugu labar
kin bu kangga mba yaa lee
wurai, pma yaa ning kana
dono wurai buru jagu nuwa
ningu wurai pmai.

¹² Boo nuwa, yi boo sagu
pma, pero yi yerigu pma
miringgi Mbaa wu Gira Yesu
Masiya ba kingga pidau
gaanggu ba ninga wurai, ba
jee buri pmai.

¹³ Anda mba ciyamba, bu
janganiya yi ninggu tu
nyaayi.

¹⁴ Ka wu kangge mbire
kwaa ninggu ponggondi yi
tu yi sambira miringgi
lakargar wunaa, wu yi boo
balambire, bu ruun tuwe,
bu neciya dwii yi yo palaka
ba nuu melma.

¹⁵ Anda bu deriya yo cika
bacen mbire, bu ningaman
yo dikacene cika ciyate.

Ciyei du cwata gorou

¹⁶ Yama Mbaa wu Gira wu
yi pidau gaanggu, yo yiri yei
ba nyiimbiri pidau gaanggu
kana dono jore, yi kana
wono ninga. Mbaa wu Gira
ba siya kem yi mba mwa
mwa.

¹⁷ Mi Bulus, n woo
balambiri binaa ciima yi
wai mu. Too somdi a dwii

kana wono lakargar wu n
bala, n baliba yito.

¹⁸Yama boo niiu Mbaa wu
Gira Yesu Masiya yire ba
siya kem yimba mwa mwa.

1TI

¹ Wuna lakargar baa bonggo Bulus. Yamba nere mirma yire yi Kristo Yesu, wu yi man nii yi yo, pma sangge kin n yoo nere tumandi Kristo Yesu.

² N balaḡin mo Timoti bol mi wu jire miringgi leegu jirei.

Boo niuu yi bunam yi pidau gaanggu wu Yamba Kwiite yi Mbaa Wu Gira Yesu Masiya ba siya kem yi mo.

Dikacene a dwii kulumba leendu wa

³ Pu n mwatigu Makidoniya, n samina ma sin siyei a Apisa palaka ma yera nuwa bu jukugu yiringi tu yaa cimacima yi ciyei Yambai.

⁴ Ma sa pma ba bwiyaniya jor pmai bonggo ba cindi yi dinendi kakaa pma tu yaa matigu. Too yiri din nuwa gwela, yaa kalan nuwa ba man nii yi Yamba.

⁵ Tu diinai n ningu woo dikacene palaka mwa mwa nuwa bu ponggu wa ba twangwa yi ninggu kangam wu twiiwe miringgu gaanggu ku nyaau, yi dangandi tu nyaai, yi manggu niuu yi Kristo ku manggu.

⁶ Anda nuwa bu kangga poronga bonggo too yiringi tu nyaai mwa mwa pero pma bwiyaḡa jor pmai bonggo cewi tu yaa dwii.

⁷ Pma kasi nuwa ba som pma cika kulumba teeringi Musa wa, anda pma som bu tu pma cegi, kana yito pma ce ciyei gek.

⁸ Yi soma teere kundi ka nuwa nindi wurai cimacima yi tono.

⁹ Nuwa ningabu teere dingin nuwa bu tum tu nyaau wa. Nuwa ninga dingin nuwa bu yaa pong teere wa, pero pma bu som bu Yamba wa pero yi welem wa, yi pma bu yaa walwal wa, pero nuwa bu yaa gwasii Yamba wa, pma bu laci Mbaa mba pma yi njaa mba pma pero laci nuwa bu kangga,

¹⁰ yi bu ningi taari wa yi bu daayi nambirmba wa, yi bu jinani nuwa wa, yi baleenda, yi bu yaa ce jire a kan bali wa. Yi kana ca tu yaa cimacima cima yi yiri tu nuwa jukuya,

¹¹ too baa bonggo Ciyei du Teng du Yamba du yi wuure. Too Ciyei du Teng du nuwa nyinggi.

Wandima Bulus wa dingin bunam Yambau

¹² N wananga Kristo Yesu Mba Wu gira yire, yo wu nyiingge dimbire n ninga wurai yei. Yo kongge n yinno pero sekangge n ninga man yo wurai,

¹³ kana pu n bwiyaḡa din Kristo. N rweenga pero n turongo nuwaya. Anda Yamba nuu bunam mu dingin n ninga miringgi dwal kurandi yi leegu jirau.

¹⁴ Anda Mbaa Wu Gira wu yi *nii* yi *boonii!* A twangangge yi leegu jirau yi kangam wu bonggo Kristo Yesu.

¹⁵ Tina ciyei jirei, kana we ba kingga ba yiya, "Kristo Yesu ba miringgu sima ba mira nuwa bu yi welem wa" Anda mi n yoogi wu kwecekwece cudu pmai mwa mwa.

¹⁶ Anda Yamba nuu bunam mu palaka Kristo Yesu ba ninga wurai yi mi bonggo kanadi yo wu tum a bonggo pma bu yi welemdi kwecekwece wa. Pero dong bu kangga ba kuranga, pma ba pu jirei, ba nyingga piima bu yaa matuguwa.

¹⁷ Mwa mwa giru yi yilau koo ku Yambau kana pene pene! Yo yoogi balaa wu kana pene pene, wu nuwa yaa kweeyi, wu yaa bwaari, Yo wundu yoogi Yamba. Amin.

Wurai Timoti

¹⁸ Timoti, bol mi, tina dikaceni mi a bonggo mou, cuunggi ciyei banabi du ciyei gawuriyo. Yama ba kala mina ma ninga kwai su nyaai miringgi kwai Mba Wu gira.

¹⁹ Ma man nii yi Kristo miringgi leegu jirau mau, yi dangandi tu nyaai. Dingin nuwa bu kangga ning dangandi tu bwii beere; dingin tono leegu jirau pmau bwiiire.

²⁰ Cika Hamenus yi Aleksanda too yiri pmo. N yiki pma n nyii balaa buwai

palaka ba tilanga kanda ku na bwiyani din Yambai.

2

Jukugu yiri dwii kurgu simau

¹ N senggo mina, tu gawuriyo, ma ceman kuru nuwa mwa mwa. Ma senggo Yamba ba kalanga pma; ma dimino cudu pmai yi Yamba; ma wananga Yamban nyan pmo.

² Ma ce kuru dingin balamba yi mwa mwa bu yi giruwa palaka yi siya yi pidau gaanggu yi param buru yi gwasi Yambai yi nyigu giru a kana wono nyinou.

³ Yito kundi, pero diraman gaanggu Yamba nere mirma yire,

⁴ wu kasi kana we ba nyingga mirma pero ba som jire.

⁵ Dingin Yamba wiino pero woo yi wu cude, yo wundu wu sipi naapu yi Yamba yi nere, wii Kristo Yesu.

⁶ A nyii pijimaya dingin ba nyingaman kana we param buru. Too ciyei du Yamba nyii nuwa bu sima wa a jor du dayai.

⁷ Anda Yamba sekengge, n yoo nere wu wasiri ciyei yi nere tumandi. N juku nuwa bu yaa yoogi nuwa bu Yudayawa a dwii manam niu yi jire. N yaa cegu leendi anda n sagumbiru jire.

⁸ A kana piyau pu nuwa kuru simau, n kasi namirmba ba wun war pmai walwal diyou ba ce

kuru bonggo Yambau, yaa sukondi yi gwela.

⁹ Pero n kasi nurumba ba twiyongo yi see wu cimacima cima wu daaya wu nuwa nyii giru, ba sir ya dwii du yi waandi kwang kwang yi teegu sinariya yi gisi yi see wu yi pircu.

¹⁰ Anda nurumba bu ce kin pmai nyii giru Yamba wa, a daaya ba wuuwe nuwa bonggo wuran pmai tu nyaai tu pma ninggi.

¹¹ Nurumba ba tilanga yiri tok yi cinggu dwiiu.

¹² N yaa kasi nurumba ba juku yiri nambirumba, kana ba jee lau dwii pmai. Yama pma ba katwiyon tok.

¹³ Dingin Yamba ruu Adamu gawuriyo anda ba ruu Awau.

¹⁴ Wu Balaa Buwei welengo wii Adamu ne, anda wu nuwa welenga wii Awau, wii yo paa teere Yambai.

¹⁵ Anda nurumba nyinggu wei mirma bonggo bigu kwarau. Ka kwasir kwii leegu jirau yi kangam yi pisu walwal yi pisu wu nyaau.

3

Bagiraa Ikkilisiya wa

¹ Tina cedu jirei: "Ka nere kasi ba yoo nere wu gira wu ikkilisiya, a kasa wurai du nyaau.>>

² Dingin tono nere wu gira ba yoo nere wu yaa cedigi. Ba yoo nere wu yi nure wiino, nere wu tagi buri, wu nuwa nyii giru, nere wu lee

rungguwa laa you, nere wu puu jukugu yiri.

³ Ba yoo yaa banam nyinma, yi wu ning ruuni. Ba yoo nere wu yi kanadi, wu yaa kwai, wu yaa kangni kene.

⁴ Tagi ba yoo nere wu pu tagu laa you kundi, kwaaraya nyii giru a kana tono yiri pero ning pongondi yi yo.

⁵ Dingin ka nere puu bu tagu laa you ne, nindu wei nye ba puu tagu ikkilisiya Yamba?

⁶ Nere wu gira ba yoo ya nere wu ninga bwiiwa puçi, dingin yaa buu ba lee dwii, pero nuwa ningamanu wei yo bali cika ku nuwa ningaman Balaa Buwei.

⁷ Bambang, nuwa bu yaa ponggu wa ba ce tu nyaai dwii yei dingin ba nuu yaa melma pero ba yanniya tandau Balaa Buwei.

Nuwa bu ning kalanggu a ikkilisiya wa

⁸ Yito mwaasi, nuwa bu ningi wurai a ikkilisiya wa ba yoo nuwa bu nuwa nyii giru wa, bu yi jire wa. Ba yoo ya banaamba nyinma wa, yi yawo kasugu kenu.

⁹ Pma ba yoo nuwa bu nyii dwii wurangi leegu jire tu nuwa sombui pero ba siya yi dangandi tu nyaai.

¹⁰ Nuwa ba yesa pma bati. Ka yinno wai, pma ba ninga wurai.

¹¹ Yito mwaasi yi nurumba pma, ba yoo bu nuwa nyii giruwa. Ba yoo

yaa nurumba bu yi tu ceruwa. Pma ba taa dwii pmai, ba tu n jirei a kana ca tu pma ningi.

¹² Nuwa bu ningi wurai ikkilisiya wa ba yoo nere wu nure wiino pero ba suwa kwaraya yi laa you kundi.

¹³ Pma bu ninga wurai pmai kundi, nyinggu wei nyigu giru bonggo bu kangga pero cwatu wei leegu jirau pmau miringgi Kristo Yesu.

Ciyei jirei dwii leegu jirau.

¹⁴ N man nii n baa wei bonggo mou yaa sigu. N baligu tina yiringi bonggo mu yoko,

¹⁵ dingin ka n liyan buri, bu somu wei tu dayai nuwa Yambau wa ba ningai yi buri pmai. Tinaa nuwa Yambau wu yi piima, yo wu yoogi timbau yi taa jirau.

¹⁶ Yaa pira, tina tu tukugai a miringgu leegu jirau yiru: Kristo a baa miringgi buri cika nere,

anda bawei du walwal ce yito a dwii yei.

Bacamandi ko yo,

anda pma wasi ya a duuri.

Nuwa lee jirei yi yo a sima mwa mwa,

anda nuwa dee diyou yi yilau.

4

Dikacene dwii kulumba leendu wa

¹ Yoko Bawei Yambai sagu yiru dak kin, daandi su cwata gorou bukangga kwaa wei manggu nii yi Yesu; pma

ponggu wei bawei leendi yi yiri tu wuturindi pirdi.

² Nuwa bwii twii nuwa bu batal wa yi bu mwaran leendu wa, pero dangandi pmai boogi.

³ Pma ce wei kin ninggu laabwiya yaa cimacima pero yaa cimacima ma jee jeendi tu kanggi. Anda Yamba ruu too jeendi kin nuwa bu yi jire wa pero som jire ba jee yi wandima.

⁴ Yake ku kana ca tu Yamba ruu wo kundi, yi kwaa ya kana tono anda yi yiya yi wandima.

⁵ Dingin yi soma a yoo tu nyaai bonggo ciyei Yambai yi kuru.

Kewe Kristo Yesu wu nyaa

⁶ Ka ma sar too yiringi kamba bu namirmba yi bu nurumba wa bu ponggu, ma yo wei kewe Kristo Yesu wu nyaa, wu nuwa taa yi cewi manam nii yi yiri tu nyaai tu nuwa jukumina, ma pongai.

⁷ Ma liyaniya buri gwela a dwii yiri tu twii tu Yambai ne yi bacindi nurumba bu ritengi wa. Yi ku ma ninggu wei yito, ma yera buri mai, ma yo nere Yamba.

⁸ Turonggu nem buru kundi banyina, anda pongu ciyei Yambai a gwala a kana wono nyinou, dingin a dee kalanggu yoko yi piima bu boo baa wa.

⁹ Tina ciyei jirei du kana we ba yiya.

¹⁰ Too tu diinai yi ninggu wurai wang pero yi kwasiri kwii, dingin manam nii yiru

a bonggo Yamba wii yi piima. Yo wu twii nere mirma nuwa mwa mwa, cika nuwa bu lee jire wa.

¹¹ Juku too yiri pero ma sa kana we tagi ba ninga.

¹² Ma lee yaa nuwa ba cedo mina dingin ma yaa girgi. Ma yoo nere wu nuwa bu lee jire wa tilanu wei mwa mwa a bonggo ceu mai yi wurangi mai yi kangam mau yi manam nii mau yi pisu walwal.

¹³ Ma kwasan kwii cegu ciyei Yambai bonggo nuwa, yi wasigu ciyeu pero yi jukugu pmau, kopo ka n baayi.

¹⁴ Ma kwaa yaa somandi tu Yamba nyii mina pu bagiraa ikkilisiya wa cermini war pmai, pma ce ciyei Yambai a dwii mai.

¹⁵ Ma ruun tuwe a too yiringi. Ma diin dwii wurai mai palaka kana we ba ko jegu gawuri mau.

¹⁶ Ma suwa kanda ku ma ninggu pisu mau kundi yi yiri tu ma pirgi. Ma jee gawure yi ninggu tonon, dingin ka ma ningi, ma mir wei buri mai yi bu nuugu mau wa.

5

Dikacene a dwii wutukola, bagiraa, yi kewaa.

¹ Ma sariya ciyei nere wu gira yi kwai, anda ma kenda man yo miu cika ku ma sar ciyei mba mau. Ma sa ciyei nuwa bu yaa girangi wa cika ku ma sar ciyei ciyamba ma.

² Ma sa ciyei nurumba bu girawa cika ku ma sar ciyei njaa mau, pero ma sa ciyei nurumba bu yaa girangi wa cika ku ma sar ciyei ciyamba ma bu nurumba wa. Ma ninga yi gaanggu ku walwal.

³ Ma suwa kana wono wutukolo wu yaa nere wu su yo.

⁴ Anda ka pma boo yi kwaraa kana kakaa wei, ba ninga tu Yamba kasi a laandi pmai gawuriyo pero pma ba wora kwiimba pma yi sugu pmau. Too yiri tu diraman gaanggu Yambai.

⁵ Wutukolo wu jire twii nure wu yo wundu, wu man nii bonggo Yambau. Yo ce kuru senggikalanggu Yambau kume yi nyanggu.

⁶ Anda wutukolo wu kasi tengu tibak bawei yei bwaagi kana pu yi piimau.

⁷ Ma sa nuwa bu pongguwa too yiringi, palaka nuwa ba ninga tu daa yei.

⁸ Anda pma bu yaa su naapu pmau, ya cika bu laa pmau wa, pma gwela leegu jirau pmau. Boo nuwa a gwala nuwa bu yaa pongguwa yi bwiige.

⁹ Wutukolo wu nuwa murnu wei kuci bu nuwa kalanu wei wa balama cika mila kun nokono pero wu ning bwiyaate wiino,

¹⁰ Pero nuwa soma yi wurangi tu nyaai baabu: Sugu bakwaraau, yigu rungguwau, cargu mwar nuwa bu ponggu wa,

kalanggu nuwa bu tiigu kuulu wa yi nyiigu dwii dingin kana tono wurangi tu nyaai.

11 Wutukola bu nyititiwa, nuwa ba ceni yaa kuci, dingin miyam pmou cwanu wei pma yi Kristo pero pma kasi wei perugu laabwiya.

12 Pma weju wei bonggo degu alkawal pma wu gawuriyo.

13 Anda ka nuwa din pma kuci, pma ningi wei kuule, pma bwiyanu wei jor pmai tu ceeri ponggu laa yi laa a casingu buri miringgi wurangi nuwai a cegu tu daabu pma ba ciyei.

14 Dingin tonon ninga man dikacene wutukola bu nyititiwa ba ninga laabwiya ba bi kwaraa, ba suwa kwaraa pma a lai. Palaka bacemba ba kinggi ya tu ce wei dwii pmai.

15 Dingin bu kangga pma poranga, pong Balaa Buwei.

16 Ka nure wu ponggu wu woo yi wutukola a pu n pmai, ba suwa pma. Ba duuriya ikkilisiya, palaka ikkilisiya ba suwa wutukola bu jire wa.

17 Bagiraa bu ninga wurai pma kundi nuwa ba nyii giru pero nuwa ba ya pma kundi, yaa cika bu kwasugu kwiiu bonggo wasigu ciyei yi pirgu nuwa.

18 Dingin Demteere ce kin, "Ma diini ya balantang a nyan gontole jor du bacigu jamau.>> Pero a bonggo wukange kin, "Pma bu ninga

wurai wa a yinno nuwa ba ya pma.>>

19 Ma kari ya twiyau kwaramewu nuwa dee mo wei dwii bagiraa, kopo ka nuwa rop kana kunong ciyei.

20 Bagiraa bu ninga pu ninggu welem wa, nuwa ba wun pma gawur nuwa bu pongguwa; yito yoo wei dikacene bonggo nuwa bu kangga.

21 N woo sagu mau a gawuri Yambau yi gawuri Kristo Yesu yi bacamandi su sekigai, ma pong too teeringi yaa sekigu bu kangga ba du kangga.

22 Ma yaliya sekigu bagiraa bu ikkilisiya wa yi ceringgu pma wari. Ma diini yaa dwii mai welem nuwa bu kanggau. Ma siya walwal.

23 Ma naa yaa gundu yi wundu. Ma naa gundu inabi banyina dingin buu pwii mou yi buri mai su yaa sii cingcing.

24 Ma songma min welem nuwa bu kangga dak a der pma bali su kanggi. Anda welemdi nuwa bu kangga tukugi kopo jor du kanggi.

25 Yito mwaasi wurangi nuwa tu nyaai dak, kana wurangi tu nuwa ninga tukugi nyanggu ku kanggu twiwe wei dak.

6

1 Mwa mwa kewaa ba nyii giru bagiraa pma, palaka ba dee yaa yiri melmai a dwii

din Yambai yi yiri tu yi
piryo.

² Ka bagiraa bwii ponggu,
kewe ba kwaa yaa nyiigu
pma giru dingin twii
kappima bu ponggu wa.
Kewaa ba ninga wurai yi
kwasan kwii wang dingin
ba bagiraa pma bwii bu
ponggu wa pero kangman
pma.

*Kulumba leendu wa yi gina
wu jire*

Timoti, ma juku too
yiringi, ma ciko kana we ba
ninga pongondi yi tono.

³ Ka nuwa jukur yiri
leendi tu yaa cima cimacima
yi cewi tu nyaai tu Mbaa Wu
Gira yire Yesu Kristo yi tu
yaa cima cimacima yi pisu
wu Yamba kasu.

⁴ too leegu dwii pero yaa
tu somai. Ko duu nere kasi
gwela a dwii cewi. Too dee
bwii yi cwaanggu buru yi
rweendi pero yi dwal leegu
yi buri.

⁵ Boo nuwa pma ning
gwela. Dangandi pmai yaa
kundi, pma kwaa jire,
dangan kin ponggu Yamba
twii nyonou kasigu ginau.

⁶ Ponggu Yambau yi
gaanggu lepek yiri yei too
gina.

⁷ Yi baanga bu sima yi
kana ca pero yaa tu yi deru
wei ka yi wunni dugu.

⁸ Anda ka yi boo yi jeendi
yi see, yi ninga gaanggu
lepek.

⁹ Anda nuwa bu kasi gina
wang wa yaraman miyandi
welem yi tandau yi miyandi

cini su dee cusugu, ba
bwiige piimaya mwa mwa.

¹⁰ Dingin kangam kenu
too toson taawu yiringi tu
bwii tum. Anda nuwa bu
kangga kasigu kenu a din
pma poranga bonggo leegu
jire pero pma ji buri pmai yi
bwiyang gaanggu.

*Dikacen Bulus wu cwata
gorou*

¹¹ Anda mo, Timoti, nere
Yamba, ma cemin too
yiringi mwa mwa. Ma kwasi
kwii tungu tu nyaai yi pisu
wu Yamba kasi yi leegu
jirau yi kangam yi bogu
gaanggu yi cingu dwii.

¹² Ma ninga kwai su nyaai
dingin leegu jire. Ma taa
piima bu yaa matuguwa, bu
Yamba yimina mirwa, pu
ma ninga bwiyinga gawuri
nuwa tum.

¹³ N sa mina a gawuri
Yambai, yo wu nyii piima
yiringi mwa mwa, yi gawuri
Yesu Kristo, wu ce ciyei jire
a dwii yei a gawuri Bilatus,

¹⁴ ma ninga pongondi yi
too teeringi yaa dire, Kopo
ka Mba Wu gira Yesu Kristo
waatai.

¹⁵ Yamba wu yi wuure, Yo
wu Gira, balaa balamba yi
Mba Wu gira wu mba wu
girandi wu dee wei Kristo a
jor yei.

¹⁶ Yo wundu wu yaa boori,
woo yi piima, sii rang wu
yaa nere wu lam nem, wu
yaa nere wu ko pero yaa wu
kwee wei. Giru yi dimbire
ko you kana pene pene!
Amin.

17 Ma sa pma bu yi gina pinaa sima ba lee yaa dwii, ba mani ya nii a gina wu yaa sii. Anda ba man nii a bonggo Yambau, wu nyii yiri kana ca dingin nuugu tengu yiru.

18 Ma sa pma ba ninga yiri tu kundi, ba ninga wurangi tu nyaai tum, ba ninga nii pero ba cwaanga yi bu kangga.

19 Bonggo ninggu yi too, pma rumanu wei betal buri pmai wu twii taa pisu pmau pina yi gawure, dingin pma ba nyinggu wei piima bu manggu wa.

20 Timoti, ma ning wurai du Yamba nyimina. Ma deman dwii mai bonggo cewi tu nyoi tu yaa walwal yi somandi tu twii leendi

21 Nuwa bu kangga poronga bonggo leegu jirau dingin pongi too cini.

Boonij Yambau ba siya kem yi mba.

2TI

Cima Bulus wa.

¹ Tina lakargar Bulus, Wu Yamba seka cuungi dangandi yei ba yoo nere tumandi wu Yesu Masiya. Yamba tungge n sa nuwa ciyei piimai bu ninga alkawal wa a bonggo Yesu Masiya.

² N balaamin Timoti boi mi wu n kangne.

Boo niyu yi bunam yi pidau gaanggu wu Yamba Kwiite yi Mbaa Wu Gira Yesu Masiya ba siya kem yi mo.

Bulus ciko Timoti

³ Timoti, n wanan Yamba dingin mo, Yamba wu n kuraman yo sima yi dangandi tu nyaai, cika ku kaka muwa ningau. Kume yi nyanggu, n dangga mini miringgu kuru mu kana dono jore.

⁴ N kasi n komina dong, dingin n danggu gwer merma ma pu yi cwangu buru. Pero n ningu wei buri degdeg ka yi kiino dong.

⁵ N dangga leegu jirau mau ku manggu, cika ku kaka mo Lowis yi njaa mo Yunis boo yi tono. Pero n soma ma woo yi koo leegu jirau.

⁶ Too tu diinai n dangga mina min, ma jee gawure yi ni du Yamba nyimina a jordu n cermin wari.

⁷ Dingin Yamba nyii yiri bu bawei gwasi, a nyii yir du dimbiri, yi kangam yi tagu dwiu.

⁸ Dingin tono ma nuu yaa melma sugu nuwa ciyei dwii Mba Wu gira yire. Pero ma nuu yaa melma muwa, kana ku n woo jarum dingin yo. Mo mwaasi ma cusu wei kem yi mi yi dimbir wu Yamba nyimina dingin ciyei du teng .

⁹ Yo mira yiro yi ninga pisu wu walwal. Ninga bu yito dingin wurangi yiri tu nyaii anda too dangandi yei yake toson taayau, palaka ba juku boonii you ku bonggo Yesu Masiya.

¹⁰ Anda yoko a juki yiri too yiri mwa mwa gembel , bonggo bagu Yesu Masiya, nere mirma yire. A kiyanga dimbir boore pero a juki nyinou piimau bu yaa matir wa a bonggo ciyei du teng.

¹¹ Yamba sekangge n yo nere wu wasir ciyei, yi nere tumandi yi nere wu jukur ciyei du teng.

¹² Too tu diinai n woo cusugu a jarum. Anda n yaa nuugu melmau, dingin n som wu n lee jire yi yo, pero n soma puu wei swerigu tu nyiinggi* kopo nyanggu ku yo waata wau.

¹³ Ma tina cewi tu nyaai tu ma nuwa bonggo mu mwa mwa, ba yoo nyinou wu ma pong wei. Ma siya yi leegu jirau yi kangam wu yi boo yi tono a bonggo Yesu Masiya.

* 1:12 1:12 tu nyiinggi, kana, tu n nyii yei

14 A bonggo dimbir bawei du walwal du woo kem yi yo, ma swera yiring tu nuwa nyimina kundi.

15 Cika ku ma soma, mwa mwa nuwa bu pongguwa bu sima Asiya a kwaangge ban Pijelus yi Amajenes.

16 Yama Mba Wu gira ba nuu bunam laa Onisiporus mwa mwa dingin baa suwanggi nyikirik pero cikenggi. Yaa ku nuu melma muwa kin dingin n woo caligi yi cali.

17 Ka ba Roma, kasangi kana piyau kopo ka konggi.

18 Yama Mba Wu gira ba nuu bunam you nyanggu ku Masiya waata wau, Pero mo, ma somgi du kalanggu ku ningangina a Apisa.

2

Kacala Yesu Masiya wu nyaa

1 Timoti, bol mi ma ninga dimbire bonggo boonii ku Yamba nyii yiro bonggo Yesu Masiya.

2 Yiri tu ma nuungge pir yei a gawuri nuwa tum, ma piri too yiri nuwa bu yi jire wa bu pma ka pirdu wei bu kangga.

3 Ma bo gaanggu bonggo cusugu kem yi mi, cika kacala Yesu Masiya wu nyaa.

4 Kacara yaa casin buri nuwa, dingin ka pma ningi yito yaa ku diramanu wei gaanggu nere wu gira pmo wu de pma wurai.

5 Pero nuwa bu ningi kakari curi wa, yaa ku

nyinggu wei woriri kopo ka pong teeri kakari.

6 Pero bajome wu ning wurai yi kwasankwiu tagi yoo wei wu gawuriyo wu nyinggu wei woriri jangam wurangi yei.

7 Ma ninga dangandi a dwii tu n cegui, Mba Wu gira kalaminu wei ma kuranga too yiringi mwa mwa.

8 Ma siya danggu yi Yesu Masiya, kaka balaa Dawud, wu wuni a boore. Too ciyei du teng du n wasiri,

9 dingin tono, n cusugu pero nuwa calange yi cali cika nere wu welgi. Anda nuwa na puu caligu ciyei Yambai.

10 Dingin tono n lee n bo gaanggu yi kana ca dingin nuwa bu Yamba seka wa palaka ba nyingga mirma yi yilau ku miringgu Yesu Masiya.

11 Tina ciyei du jirei: Ka yi bwaani kem yi yo, yi sii wei kem yi yo mwaasi.

12 -Ka yi bor gaanggu bonggo tiigu kuulu, yi jee wei lau kem yi yo.

Ka yi kwa yo yi ka mwa kwa yiri wei.

13 Ka yi ningi dwal jirei yo yiri yei sam sam yi jire, dingin yo na pu ba kwa buri yei.

14 Ma dangga kana we yi too yiringi, ma yera pma a gawuri Yambai ba lara gwela a dwii cewi. Dingin koo duu gwela yaa kundi,

pero bwiyanni nuwa bu
pma nugu wa.

Nere wurai wu nyaa

¹⁵ Ma ninga wurai yi
kwasam kwiu palaka Yamba
ba wandi mina. Ma yo nere
wurai wu nyaa, wu yaa ku
nuu wei melma, wu jukir
ciyei jirei cimacima cima.

¹⁶ Ma kwaa cewi tu nyoi,
yi cewi cini tu cwati ninga
wu yaa kundi.

¹⁷ Too cewi wasiri siyau
cika benteng, Yimenawus yi
Pilitus jukuya too yiringi.

¹⁸ Pma du nyinou jirau,
pma cegu kin wunongu
booru mere a cwiiyo; yito a
din nuwa bu kangga du
leegu jirau.

¹⁹ Anda jirei Yamba tindi
tiyau cika sweli du taa
mweendi, balinggi wuna
bala: “MBA WU GIRA som
boo ya,>> pero “Mwa mwa
bu yoogi bu MBA WU GIRA
wa tagi ba kwaa tu bwii.>>

²⁰ A laa wu duwe, see
jeendi wu kangge menenggi
yi sinariya yi asurpa, pero
wu kangge menenggi yi
souwi yi gari. See wu yi
pircu nuwa nindi wurai a
jorondi waandi, anda wu
yaa pircu nuwa nindi wurai
kana kono nyangu.

²¹ Kana we ka card**u** buri
yei, dur too yiringi tu bwii,
yoo wei see wurai wu yi
yilau. Yo ningu wei walwal,
menenggi dingin Nere wu
gira ba ning kana dono
wurai du nyaai.

²² Ma cemin kana tono
yiri tu dee miyam wu bobiri.

Ma kasa pisu wu nyaau a
gawuri Yambai yi jire yi
kangam yi pidau gaangu.
Ma ninga too yiringi kem yi
nuwa bu kuraman sima
Yamba yi gaangu walwal.

²³ Pero n woo sagu mau
ma diini ya dwii mai gwela
wu ciniyo wu yaa kundi wu
dee kwai.

²⁴ Kewe Yamba tagi ba
caari ya anda ma ninga man
kana we kangam, ma puu
pirgu yiri nuwa, ma ta
kanadi yi nuwa.

²⁵ Ma cingo miu ka ma
sagu ciyei nuwa bu kwaa
jire wa. Yikwii Yamba waku
wei gaanggiri boo nuwa,
pma tilanu wei jire.

²⁶ Pma watanga wei
miringgu dangandi pmai,
pma gwalu wei tandau
balaa buwai. Dingin a ree
pma kewuri ba ninga tu yo
kasi pma ba ninga.

3

Nyangu ku cwata gorou

¹ Timoti, n kasi ma soma,
nyangu ku cwata gorou
yoo wei jor du yi buyi wang.

² Nuwa kang manu wei
buri pmai, ning wei yawo.
Pma ningu wei Gorsondi yi
leegu dwii, nuwa bu yi runi
wa, yaa pongondi yi
kwiimba pma, yaa
wandima. pero nuwa bu
yaa gwasi Yamba wa.

³ Pma yoo wei yaa
kangam, yaa pargu sukum,
pma bwiyani wei dine pero
yaa tar dwii. Pma yo wei yi

tuwe pero kwaa wei yiri tu nyaai.

⁴ Pma cuuru wei basimba pma, pma ning yiri yaa dangandi, pma twanggi yi leegu dwii, pma kasi tengu gwala ponggu Yambau.

⁵ Pma ningu wei cika pma som Yamba anda pma kwaa dimbiri yo. Ma ninga kwaraa yi boo nuwa!

⁶ Pma too nuwa bu teendi laandi nuwa wa, ba lelengo nurumba bu yaa pwiyanggi wa, bu welem turonggu pma wa, pero twanggi yi miyandi wundu wundu.

⁷ Boo nurumba kana pene pma ponggu yiri tu puci tu nuwa pir pmai, anda pma jaanga somgu jireu.

⁸ Boo kulumba kwaa jire cika Jannes yi Jambires bu gwela Musa wa. Danggadi pmai yaa kundi, pero yi leegu jirau kwii ku nyou.

⁹ Anda pma na jee gawure a bonggo too yiri. Kana we somu wei cini pmai cika ku ningwa yi bu Jannes yi Jambires .

Bulus nyii dikacene Timoti

¹⁰ Anda mo, Timoti, Ma som tu n pir yei yi pisu wu n ningau, yi yiri tu n manna gawuri. Ma som leegu jirau mu yi kanadi mi yi kangam mu yi bogu gaanggu mu.

¹¹ Ma som nyindi su nuwa turongge yi kuule wu n boo gaanggu miru. Ma som mwa mwa turonggu ku nuwa ningangina a Antakiya, yi Ikoniya, yi Listura anda Yamba mirangge.

¹² N sagumou jire, kana we wu ka kasi ba ninga pisu wu Yamba kasu miringgi Yesu Masiya tii wei kuule.

¹³ Anda nuwa bu bwiiwa yi nuwa bu yi lelu wa gwalanu wei bwiige. Pma ciyonu wei nuwa bu kangga yi buri pmai mwaasi.

¹⁴ Anda mo, ma tina jirei yiringi tu ma tilanga. Ma soma too jirei, dingin ma som pma bu juku mina wa.

¹⁵ Nuwa juku min Lakargar Yamba yake pu ma babwiyayo pero pma pirmin pwii du diina ma yi mirma bonggo leegu jire yi Yesu Masiya.

¹⁶ Mwa mwa Lakargar Yamba too ciyei du baa bonggo Yambai. Kundi dingin pirgu jire, yera yiri yi kuranga yiri tu yaa kundi, mena yiri ka yi ningi tu yaa kundi, pero juku yiri pisu nyaau a gawuri Yambai.

¹⁷ Yamba nindi wurai yi tono ba menenga, ba cipa nuwa ya dingin kana dono wurangi du nyaai.

4

¹ N woo sa min dina ciyei a gawuri Yambai yi Yesu Masiya, yo wu nyanggu ku punge ningamanu wei bali nuwa bu kurii yi bu bwaangii wa ka baa jegu lau yau,

² ma wasi ciyei Yambai, kana jor doo kana yaa ne, ma menenga pma, ma yera pma, ma ciko pma kem yi kanadi wang yi jukugu yiri.

³ Dingin jor doo baayi du nuwa na kar twiyau kana ca tu cima cimacima tu nuwa jukuya. Pma ponggu wei tu gaanggu pmai pero pma kasi wei kulumba bu saru wei tu twendi pmai kasi nuugi.

⁴ Pma kwaa wei jire anda kasi wei nuugu bacindi.

⁵ Anda mo, ma taa dwii mai bonggo kana ca. Ma nuu yaa gwasi tigu kuulu dingin Mba Wu gira. Ma ninga sagu nuwa ciyei du teng, ma ninga kana dono wurai du Yamba nyii minai.

⁶ Cika mi kam, n nyii piima muwa ba yoo nii bonggo Yambau. Jor boori mi a ninga nem.

⁷ N ninga kwai su nyaai, n mata wurai mi, n taa leegu jire.

⁸ Anda yoko woriri metuwal wurangi tu nyaai woo nyanggu mu, wu Mba Wu gira, wu ning bali su jirei, nyiinggu wei a nyanggu ku waatau. Anda woriri twii buri mi yi wundu ne anda kana we wu yanggu bagu you wa.

Wurai Bulus du cwata goroi

⁹ Timoti, kankam kwasi kwii ma bame kilang kilang.

¹⁰ Dimas kwaangge dingin kangman yiringi tu simai, a mwati Tasalonika, Kerisens, a mwati Galatiya pero Titus mwati Dalmatiya.

¹¹ Wu pina bonggo mu buri Luka. Ma denguwe rau yi Markus ka wunuwe bagu

dingin kalanggu wei a wurai mi.

¹² N tum Tikikus a Apisa.

¹³ Ka ma wunuwe bagu ma denguwe landau kororou mu a bonggo Karpus a Tarwasa.

¹⁴ Aleksanda bakwiiya a ningangin yiri tu bwii kwang kwang, anda Mbaa Wu Gira ninga manu wei yo bali a dwii yiri tu ningai.

¹⁵ Ma ruun tuwe a dwii yei, dingin yo ninga cere wang yi kana ca tu yi ciyei.

¹⁶ Ku gawuriyo nuwa dengge bonggo nuwa baluwa, yaa nere wiino wu baa kem yi mi. Kana we a kwaangge. Yama doo bali ba yo yaa a dwii pmai.

¹⁷ Anda Mba Wu gira kalangge a nyinggi dimbire palaka n pu wasi ciyei du teng mwa mwa, a bonggo nuwa bu yaa yoogi nuwa bu Yudaya wa ba nuwa mwa mwa. Pero a mirangge bonggo boore.

¹⁸ Anda Mba Wu gira yikungu wei bonggo yiri tu bwii a dengge lau ku diyoyu cingcing. Mwa mwa yilau a bonggo Yambau kana pene pene! Amin.

Ciima Bulus wa bu cwata gorow

¹⁹ Ma lam ciima muwa Piriskila yi Akwila yi pma bu pisindi laa Onisibaporus.

²⁰ Arastus a tin tiyei a Korinti, pero n du Tiropimus yaa cingcing a Miletus.

²¹ Ma kwasi kwii ma baa bonggo mu boo karang

nīngā bu. Ebulus a tumuwe
 cima ma, pero Pudens yi
 Linus yi Kilaudiya yi mwa
 mwa ciyamba bu
 nambirmba yi bu nurumba
 wa.

²² Yama Mbaa Wu Gira ba
 siya kem yi bawei mai. Pero
 Yama boonii you ba siya yi
 mba mwa mwa.

PHM

¹ wunaa lakargar a baa bonggo Bulus, wu nuwa manna jarum dingin wasugu ciyei du teng a dwii Yesu Kristo, yi bonggo bagonyo Timoti. N balgu mau Pilimon, bagon wurai yire wu yi kanggi,

² yi bagon yire wu nure Apiya, pero yi bagon yir kacala Arkipus, yi nuwa bu ponggu bu kurang buri a laa mau.

³ Yama Yamba mbaa yire yi Mbaa Wu Gira Yesu Kristo ba nyiimbir boo niyu yi pidau gaanggu.

Wandima yi kuru Bulus

⁴ N wanan Yamba mi kana pene ka n cegu kuru dingin mbaa, Pilimon.

⁵ Dingin n ninga pu nuugu leegu jire mbiru a miringgi Mbaa Wu Gira Yesu yi kangam mbiru dingin mwa mwa nuwa Yamba wa.

⁶ Anda n woo cegu kuru min bu dinu wei mangu wai mbiru ku baa bonggo leegu jire mbiru cika ku bu soma pero bu tilanga mwa mwa yiringi tu nyaa twii boo yi tonai bonggo Kristo.

⁷ Kangam mbiru a nyiigi bur degdeg yi cingu gaanggu, ba gonmi, dingin wurangi mbir tu nyaai a mwaanga gaangir nuwa Yamba wa.

Bulus ninga senggo dingin Onisimus

⁸ To tu dinai n singu mou. N kasigu a miringgi din Kristo dingin to tu daayai a bonggo mou.

⁹ Anda dingin kangam yiru, n gwala tibak n senggo mina.

¹⁰ N senggo mina ma pir kasugu bol mi, Onisimus. N yoo mba yo miringgi leegu jire jor du woo a jarum.

¹¹ Onisimus yoo bu ner wu nyaa a bonggo mou gaure you, anda yoko tina ner wu nyaa bonggo mi yi mo.

¹² N woo per sukugu yo a bonggo mou, pero kem yi yo woo baayi yi gaanggu mu.

¹³ N kasa n ruwo pina a bonggo mu, kana ku n woo miringgi cali dingin wasugu ciyei do teng, pero na kalanggu wei nyan mo.

¹⁴ Anda n kasa bu ningu kanaca yaa leegu mou. N kasa mo ma kalangge dingin ma kasa, yaa dingin nuwa kica mina.

¹⁵ Ma cwaanga buri yi Onisimus nyan jor banyina, dingin ma kinga yo dong kana pene pene.

¹⁶ Yaa cika kewe mere a bonggo mou. A gwala pitu kewe, yo yoo bagon yire miringgi kangam, cima cima you a bonggo mu. Yoko ninga wei kundi wang a bonggo mou, mwa mwa cika nere yi bagon yire a miringgi Mbaa Wu Gira.

¹⁷ Dingin tonoka ma konggi n yoogi bagon mo, ma teranga cika ku ma teranga wu wai.

18 Kana na bwiyaman ca a
kana wono nyinou pero ma
pong kanaca wai, bur ma
pirangge mi.

19 MI, BULUS N WOO
BALAMIN TINA YI WAI MU:
N YAR WAI. PERO YAA KU
CEI WAU MIN MA PONGI
PIIMA MA.

20 Ong, bagon mi, kankam
ningangin koo kalanggu
dingin Mbaa Wu Gira.
Nyingi koo diran gaangu
miringgi Kristo.

21 N woo yi param buru
ku bala wuna lakargar min
ma ningga tu n senggo mina
kana tu gwala to ma.

22 Yir tino tu nyonai bagon
mi menenggi kang
rungguwa, dingin n manni
min Yamba nuwai kuru
mau palaka n waata buri a
bonggo mou. /s Cima Bulus
bu cwata goro ba

23 Ipapas, bagon jarum
mi a miringgi Kristo Yesu,
woo tum miri cima.

24 Yito mwa yi Markus,
Aristakus, Dimas yi Luka ba
sing wurai mi.

25 Yama boo niju ku Mbaa
Wu Gira Yesu Masiya ba
siya kem yi bawei mai.

JAS

Ciima Yakubu wa

¹ Wuna lakargar a baa bonggo Yakubu, kewaa Yamba yi Mbaa Wu Gira Yesu Kristo. N woo balaman, duuri kwap sur rop tu nuwa bu Yudaya wa bu ponggu wa bu weenga a sima mwa mwa. N woo cigu mbiru.

Leegu jirau yi somandi

² Bu ninga buri degdeg ciyamba muwa bu nambirmba yi nurumba wa, ka bu tembirii kuule wundu wundu bu de too tengu,

³ dingin bu soma cuugu dee giru a miringgi bogu gaanggu

⁴ Yama ba gira, dingin ka borgu gaanggu matu giru mwa mwa, yi biyanu wej, yaa dwal kana ca.

⁵ Ka wu kangge cudu mbiri yaa pwii ne, ba senggo Yamba yire yo wu yi nii nyiiminu wej kana we yaa dwali. Yo na yere mini dingin ma senggo.

⁶ Anda ka ma senggi yo, ma man nii, bonggo Yamba yo wundu. Ma cwaniya gaanggir rop, dingin nere wu cwaanga gaanggir rop cika gwerai gundi du wuturi sukugi.

⁷ Koo du nuwa ba danggiya kin pmai nyinggu wej yiri tu kanggi bonggo Yamba.

⁸ Gaanggir pmai cwanggi rop a bonggo Yambau yi yiri

tu sima, pero pma yaa puwii ba tina yiri tino tu ninggi.

Kuule yi gina

⁹ Nuwa bu pu jire wa kana twii bakuuluwa boo yi yiri tu lee wej dwii yi tonu dingin a gawur Yamba pma yi giru.

¹⁰ Anda pma bu yi gina bu ponggu wa ba ninga buri degdeg dingin Yamba diina pma cingo dwii. Dingin pma mwatir wej cika pundi tu gulai.

¹¹ Ka nyanggu twiwe wulok siyangi kusuri, pundi tu nyiititi yuyoni, yilau you kwardi. Yito yi bagina, pma kwardu wej puu pma boo kasugu ginau.

Cuugu

¹² Yamba diiman wuure pma bu boo gaanggu yi cuugu. Dingin goro pu mata, yo yiru wej metuwal piima wu Yamba ningaman alkawal pma bu kangman yo wa.

¹³ Anda ma dangga kana nuwa cuumina, ma ce yaa min, "Yamba cuugu mu" Dingin nuwa cuu Yamba yi yiri tu bwii, yikaa yaa ku cuu wej kana we.

¹⁴ Cuugu baa bonggo miyandi welemdi yiri su lamba yiri ba man yiri siyei.

¹⁵ Anda ka Miyam der rwii bir welem, ka welem giri dee boore.

¹⁶ Nuwa ba ciye mbirya ciyamba muwa bu nurba wa yi bu nambir wa.

¹⁷ Kana ca tu nyaai yi tu cimacima baa bonggo

Yambau Mba yire, yoo wu ruu rangdi su diyoo. Yo wu yaa wakire kana banyina cika wekilei.

¹⁸ Yo seka ba bi yiro bonggo ciyei du jire. Anda yo a cudu yiringi tu ruu wai yi gwalaman yo kana ca.

Kagu twiyau yi ningu

¹⁹ Ciyamba muwa bu nambirmba wa yi bu nurumba wa bu kangni wa: Kana we ba katwiyau kilang, anda bu yaliya cegu ciyeu, pero bu suku ya kilang.

²⁰ Sukom neru yaa dee ninggu tu Yamba kasi.

²¹ Ma deman cewi yi ningandi tu bwii mwa mwa, ma lee yi ciyei yei Yamba du piya a miringgu gaanggu mau yi dwii cinggi, dingin yi dimbire ba mira.

²² Anda ma kariya twiyau ciyei Yambai tibak. Tage ma ninga tu ciyei. Ka yito ne, ma welenggu buri mai.

²³ Dingin ka ma kar twiyau ma ninga bu pongondi yi tono ne, cika ma suwa kau mau a bajwale.

²⁴ Ka ma kwee buri mai, ma mwatimini, yoko yoko ma mondo kanda ku mai tonou.

²⁵ Anda ka ma su kundi yi teeri Yambai tu nyaai, du nyiiminu wei paran buru, ka ma jee gawure yi tungu tu ciyei, ma mondo bu tu ma nuwa ne, Yamba diiminu wei wuure a kana ca tu ma ning wei.

²⁶ Ka ma ciyei min ma ponggu Yamba anda ma yaa tar benmai ne, ma welenggu buri mai, ponggu Yamba mau nyoo.

²⁷ Ponggu ku walwal a bonggo Yamba Mba yire twii sugu kwaraa bu yaa kwiimba wa yi Wutukola a Miringgi kuulu pmo yi nere ba taa buri yei bonggo yiringi tu simai tu bwianu wei yo.

2

Dikacene a dwii degu bu kangga ba gwala bu kangga

¹ Ciyamba muwa bu nambirmba yi nurumba, a pisu mbiru wu bu lee jire yi Mba Wu gira Yesu Kristo wu yi yilau, ma deriya bu kangga gwal bu kangga.

² Cika ka nere wu kangge teewe see wu nyaa yi gilatane sinariya baa Ikkilisiya mbire, wu kangge yika teewe gusuringi.

³ Ka ma nyii bagina giru ma sar min, "Siina pisu wu nyaau.>> Anda ma sar ba kuulu wii min, "Mo tin tiyei poo, ka yito ne, ma sina sima a mwar mi.>>

⁴ Ma jukugu bu min, ma kasi wu kanggi wii gwala wu kangge pero ma mwar bali yi dangandi tu bwii ru?

⁵ Bu katwiyoo, ciyamba muwa bu nambirmba yi bu nurumba wa. Yamba sekabu bakuuluwa bu sima bina ba yoo ba nyauwa a leegu jire ru? Bwii pma bu jee wei lau Yambau ku yo

n_{ing}a alkawal d_{ing}in pma bu kangman yo wa ru?

⁶ Anda bu cedo baku_uluwa! Anda twii banyauwa turo mbiri pero dembiri laa balu neru?

⁷ Bwii pma bu rweenga Yesu Kristo, yo wu bu lee jire yi din yei ne ru?

⁸ Ong jire, kundi ka bu ningi pongondi yi teeri Balaa Yamba, du yi kinggai a Demteere: "Ma kangman bapun mo cika buri mai.>>

⁹ Ka ma kangman nuwa bu kangga gwal bu kangga, ma n_{ing}a welem. Ma pa teere.

¹⁰ Dingin kana we wu pong teeringi mwa mwa anda kiyanga dino, a paa teeri Yambai mwa mwa.

¹¹ Dingin Yamba wu ce kin, "Ma ningi ya taari.>> Pero wii yo ce kin, "Ma jiriya nere.>> Dingin tono ka ma jir nere anda ma n_{ing}a bu taari ne, ma pa teere mwaasi.

¹² Kana ca tu ma ce yi kana ca tu ma n_{ing}a, ma n_{ing}a cika nuwa ningaminu wei bali yi teere du peri nere gesele.

¹³ Yaa ku nuwa nuu wei bunam pma bu yaa nuu bunam nuwa bu kangga. Anda ka ma nuu bunam, Yamba nuu wei bunam mau ka wuni ninggu bali.

Leegu jirau yaa wurangi kwii leegu jirau bwaagi

¹⁴ Kundi yau ca, ciyamba muwa bu nambirmbawa yi bu nurumba wa, ka ma ciyei min mai leegu jirau anda

yaa wurangi ne? Koo duu leegu jirau puu wei mirgu nere du?

¹⁵ Cika ma ko ba gonmo wu nambare yi nure yaa jeendi yaa see,

¹⁶ anda ma se min "Ma ci laamau. Yama ma cii buri mai wulok yi see, ma je jeendi wang.>> Anda ma nyii bu nere wii jeendi kana ba nyina kana see. Too yiri kundi yau ca?

¹⁷ Dingin tono, leegu jirau ku ya kem yi wurangi bwaagi.

¹⁸ Nere wu kanggi ce wei kin, "Ma woo yi leegu jirau; Mi n ko n woo yi wurangi.>> Anda n cegu min, "Ma jukunggi leegu jirau yaa Kem yi wurangi. N ju ku manu wei leegu jirau mu bonggo wurangi mi.>>

¹⁹ Ma ce min ma yi leegu jirau, dingin ma pu jirei Yamba wiino. Ma n_{ing}a kundi! Kana wuturindi pu jirei yito, buri pma miri dingin gwasi.

²⁰ Mo ba cine! Ma kobu kanda ku leegu jirau yaa wurangi too tu nyoi ru?

²¹ Ma som bu min kakaa yiri Braima Yamba ko yo nere wu nyaa dingin wurangi yei pu nyii bol yo Ica ku a kwaare ru?

²² Suwa, leegu jirau you yi wurangi yei a mwatangu kiino. Wurangi yei a diina leegu jire you twangi.

²³ Dingin tono a ningwa cika ku Demciyei Yamba ceu: "Ibrahim lee jirei yi Yamba, anda dingin leegu

jire you Yamba ko yo cimacima.. Nuwa yi yo kin, basin Yamba.>>

²⁴ Ma kogu, yi yoo nuwa bu nyaa wa a gawur Yambai a bonggo wurangi tu yi ning, yaa bonggo leegu jirau yi wundu tibak.

²⁵ Yito mwa yi Rahab wu twii karmaji nuwa ko yo wu nyaa bonggo wurangi yei pu yo tuko nuwa bu nuwa tumuwe, a juki pma nyinou wu kanggu twee yei.

²⁶ Cika ku, buri ka yaa piima ne bwaagi, yito mwa leegu jirau ka yaa wurangi ne bwaagi.

3

Tagu benu

¹ Ciyamba muwa bu nambirmbawa yi bu nurumba wa, bu duuwa mba ba yoo ya kulumba, dingin bu soma yo kulumba nuwa ninga yiri wei bali su gwala wang.

² Manggu, mwa mwa yi liyani wang. Anda ka nere liyabu bonggo cewi yei ne, woo nere cimacima pero puu wei tagu buri yei mwa mwa.

³ Yi diini gwerai yi tum you ba aara kana piyau pu yi kasu yi linjang ba twitwila a niyau you.

⁴ Suwa yi konggorundi su gembirendi mwaasi. Pma gemrendi anda wuturi wu yi dimbire suki pma, kana yito nere wu keeyi ning wurai yi boo ken ba keeyi pu yo kasu.

⁵ Yito mwaasi bene too yiri tu banyinai, anda ce cewi tu girdi dwii nere wang.

Anda cile bwalai ba nyina diinu wei baki du dui ba taawa.

⁶ Anda bene too bwalau. Too tu bwii wang a miringgi penendi su buri. Puu bwiyanggu buri neri mwa mwa. Yo manu wei piima ma mwa mwa bwalau, dingin bwalau yau twiwe bwalau ku yaa dumdu.

⁷ Nuwa pu wei taagu kana kono du nemu yi yidi yi yiri tu wurdu pwii simai yi jinde.

⁸ Anda yaa nere wu pu wei tagu benu. Yaa yoroni yi tu bwii, twanggi yi bwaali boore.

⁹ Yi teran Mbaa Wu Gira Yamba yi tono, jordi kanggi yi sentani bu kangga bu nuwa ruu pma Miringgi mweendi Yambai.

¹⁰ Wuure yi sentanggu twii wei niyau wii wiino. Manggu, ciyamba muwa nambirmba yi nurumba, too yiri ya cimacima cima.

¹¹ Nung bwiyo bwiiwe wei gundu ku teng yi ku suluk ru?

¹² Ciyamba muwa, pwalugu puu wei twiyagu tutwiyari inabi ru, kana sou inabi puu wei ba twiya pwari pwalgu ru? Yaa yito, yaa ku ma kelu wei gundu ku teng a nung bwiiyo wu suluk.

Pwii du nyaai baayi bonggo Yambau

13 Ka ma woo yi pwii yi kurandi, ma jukuya bonggo pisu wu nyaau, ninguwurangi tu nyaai, yicinggu dwii ku baayi bonggo pwiiu.

14 Anda ka ma woo yi bwiiu yi leegu dwii a gaanggu, ma liponiya jire yigirgi dwii yi leendi.

15 Dingin bwiiu yi kasiguburu too pwii du bonggo Yamba ne, yaa bonggo Bawei du Walwal, anda baa sima yi wuturindi.

16 Dingin pu bwiiu yi leegu dwii koo miru, ma nyinggu wei gwela yi kana tonoyiri tu bwii.

17 Anda pwii du baa diyou walwal, yipidau gaanggu, yimiu bubuk kana pene pene, ning pongondi, twangi yibunam yi wurangi tu nyaai, yaa cwaani nuwa, kana pene yi jire.

18 Pma bu kasi pidau gaanggu wa piri goma pidau gaanggu wa ba kaca wurangi tu nyaai.

4

Bame nem yi Yamba

1 Tu dee gwela ceu yi kwai a cudu mbiri ca? Yaa baayi bonggo miyam buru wu bwiiu wu wu kwai a gaanggu mbiri ru?

2 Bu kasi yiri anda bu yaa kinggi, Bu laci nuwa pero bu ning yawo, anda bu yaa kinggi tu bu kasigu. Bu ningi gwela yi kwai. Bu yaa kinggi tu bu kasigu, dingin bu sengg bu Yamba.

3 Ka bu sengg, bu yaa nyinggi dingin dangandi mbiri yaa kundi, bu kasi dingin nuugu teng mbiru tibak.

4 Mba nuwa bu yaa jire wa! Bu som bu min sirre yi sima diini nere ba yoo bacen Yamba ru? N sambira dong: Ka ma kasi ma ninga sirre yi sima wei, ma kasi ma yoo bacen Yamba.

5 Bu danggi min Demteere cegu kin, ca pu ce kin, bawei du Yamba dwii yiroidwii twanggi yi bwiiu?

6 Anda Yamba nyii yiru wei boniiu you ku tum. Cika ku Demteere ce kin, "Yamba kwaa nuwa bu yi leegu dwii wa anda ning tu nyaai bonggo pma bu cinggi dwii wa.>>

7 Dingin tonocingo dwii mai a bonggo Yambau. Kwaa Balaa buwai, anda yo ceeru wei ba dumbira.

8 Bame nem yi Yamba. Yika baa wei nem yi mba. Car war mbiri, mba bu ning welem wa; bu car gaanggu mbiri, mba bu gaanggir mbiri cwanggi buri wa.

9 Bu ninga bwiiyan gaanggu bu jii wiindi, yimerma dingin yiri tu bu ningai. Yama ma ninga bwiiyan gaanggu yi mondo mondo. Yama ma bwiiyanga gaanggu yi ku ma rii wei riima, ma ca kau yiku ning wei buri degdeg.

10 Cingo dwii mai bonggo Mbaa Wu Gira, yo wunminu wei yi giru.

*Dikacene dwii ninggu balu
bonggo nuwa bu kangga*

¹¹ Ciyamba muwa bu ce_ya tu yaa kundi a dwii kamba bu pongguwa. Kana we_wu ce_tu yaa kundi a dwii bagon yo, kana ka ningaman yo_bali, a ce_tu yaa kundi a dwii teeri Yambai pero a ninga bali dwii yei. Ka ma ning bali a dwii teeri, ma yaa ninggu bonggondi yi_tono, ma yoo nere_wu ning bali a dwii yei.

¹² Yamba yo_wundu wii yo_wu nyii teere, wii yo_ning we_i bali. Wii yo_yi wundu yi_dimbire ba mira yi ba bwiyanga. Dingin_tono, ma danggandi_min ma we_ma ningaman bali_bapumo?

*Dikacene a dwii manggu nii
yi_buri*

¹³ Bu nuwa mbaa bu ce_min, "Kana reni kana punge yi_aandu we_i gwe_i du kanggi yi_sindi siye_i pwii nyan Mila. Wii ninga lummo yi_nyingga kene.>>

¹⁴ Ma som bu tu nindu we_i punge yi_piima ma ru? Piima ma cika mire, yoko ma kogu ka yoron ba nyina ma kweeyi.

¹⁵ A daaya ma ce_min, "Ka Mbaa Wu Gira leeyi, n ning we_i tinaa yi_twii.>>

¹⁶ Anda bu leegu dwii yi dangandi mbiri. Koo leegu dwii too welem.

¹⁷ Kana we_wu som tu daayai ba ninga anda ninga bu, a ninga welem.

5

Dikacene a dwii gina

¹ qBu katwiyou mba bagina: Bu ji wiindi yi_kwarendi dingin tijgu kuulu yi_yiri tu bwii tu buki_buki tu too baayi dwii mbiri.

² Gina mbiri butu we_i, pero boboo_je_e we_i see_mbir_i.

³ Asurpa yi sinariya mo_a ninga sasa. Sasa wu ninga wii yoo we_i seedaki a dwii mai, pero wee we_i nem mo_cika bwalau. Ma kuraman buri_mai gina a daandi sina su cwata goroi.

⁴ Katwiyou! Ma nuu wii nuwa bu ningamin wurai a kondou, ma kwaa yagu pma kundi. Woriri tu ma kwa yagu pma twii a de_kwaran mo. Wiindi nuwa bu kacamin kondou bwii a lam bonggo Mba Wu gira Yamba.

⁵ Ma sin siye_i a sima miringgu tengu yi ninggu tu gaanggu mo_kasi. Ma ningamin buri_mai tawu ma duta ma yanggu nyan ku nuwa biiminu wau.

⁶ Ma kwaa, ma laca nuwa bu yaa welem wa, pma bu cebu kana ca a dwii mai.

Ningu kanadi jor cusugu

⁷ Dingin yito bu ninga kanadi ciyamba muwa kopo_jor bagu Mbaa Wu Gira. Bu suwa bajome yo_yam kondou you_kopo ka bir dwii kundi. Pero tar kanadi ba yam gundu ku gawuriyo yi_gundu ku cwata gorou.

⁸ N ka mwaasi ma ta kanadi. Ma tin tiyei yi

dimbire, dingin bagu Mba Wu gira ninga nem.

⁹ Ciyamba, bu ningaman ya jaanga ceu yi buri, dakali nuwa ba ninga mbir ya bali. Nere wu ningi bali woo pitu nyinou.

¹⁰ Ciyamba, bu suwa cuusangu banabindi su wasi ciyei Yambai bu tilanga bonggo pmau, dingin pma bo gaanggu a jor tiigu kuulu.

¹¹ Yi nyii pma giru dingin pma bo gaanggu pmau a jor tiigu kuulu. Bu nuu labar bogu gaanggu Ayuba a bonggo cusugu, bu nuu tu Mbaa Wu Gira ningaman yo. Mba Wu gira nuu bunam wang a kalanga.

¹² Ciyamba muwa, tu gwala mwa mwa, bu wereni ya kana yi diyou kana yi sima yi kana ca. Yama "Ong" mbire ba yoo Ong pero "Ang Ang" mbir ba yoo ang ang, dingin bu yaramani ya bali.

Kuru leegu jirau

¹³ Woo yi wu tiigu kuulu a miringgu mir ru? Ba ce kuru. Woo yi wu buri degdeg ru? Ba pii pii terenggu Yambai.

¹⁴ Woo yi wu buri yaa cingcing ru? Ba yiyanga kuruwa ba ceman yo kuru ba comman yo nunggu yi din Mba Wu gira.

¹⁵ Kuru ku yi leegu jirau weeni wei buwai, pero Mbaa Wu Gira nyii wei buri cingcing. Ka ninga welem wai, paru wei sukom welem yau.

¹⁶ Bu sa buri mbiri welemdi mbiri pero bu ceman buri mbiri kuru palaka bu yilanga. Kuru nere wu pong danggandi Yambai yi dimbire pero ning tu nyaai.

¹⁷ Iliya twii nere cika yo, anda ku ce kuru ku jirau kin gundu ba yariya, gundu yarubu nyan mila kunong yi pwalari nokono.

¹⁸ Anda ku pero ce kuru dong, diyou wun buri gundu ninga pu yarugu sima nyii jeendi.

Puugu nere wu ponggu wu yaranga

¹⁹ Ciyamba muwa bu nambirmba wa yi bu nurumba wa, ka wu kangge pori nyinou jirau, bu kwasi kwii bu waata yi yo nyinou.

²⁰ Bu soma min kana we ka puuwe nere ninggu welem, mir wei yo bonggo boore, pero a dee param sukom bonggo welemdi tum.

1JN

Ciyei piimai

¹ N woo bala mbiri bala a dwii yo_wu twii ciyei piimai, du doo_yake taa yau, wu yi nuu_yo, yi ko_yi nundi yiri, yi mwaanga yi_wari yiri.

² Nuwa juku yiri piima bwii, yi ko_yo, dingin tono_yi nyii seedaki dwii yei, pero yi wasi mbir ciyei a dwii piima bu yaa matirwa, woo_kem yi Kwiite, nuwa jukuyiro_yo.

³ Yi wasigu mbiru yiri tu yi ko_pero yi nuwai, dingin yi kasi bu ninga naapu yi_yo. Naapu yiru koo_kem yi Yamba Kwiite, yi Bol_yo Yesu Masiya.

⁴ Yi boo bala mbiri tina palaka degdeg gaangu yiru ba twangwa.

Pisu rangu

⁵ Tina ciyei du yi nuwai a bonggo Yesu Masiya yi sagu mbira min, Yamba twii rangu. Kumjila yaa bonggo_yo kana banyina.

⁶ Ka yi ce_min yi boo_yi naapu yi_yo, anda yi songma a kumjila, yi cegu leendu pero yi yaa tum jire_wii.

⁷ Anda ka yi ning songma miringgu rangu, cika ku yo_mwa a miringgu rangu, yi ninggu naapu yi_buri yiri, pero tijma Yesu Bol_yo, a car yiro a bonggo welemdi_yiri mwa mwa.

⁸ Ka yi ce_min yi tij bu ninggu welem ne, yi

welenggu_buri yiri, yi som bu_jire.

⁹ Anda ka yi sar Yamba welemdi_yiri, yo_wu cimacima pero twang tu yo_cei, para yiri wei_sukom welemdi_yiri, ba car yiro a bonggo wurangi_yiri tu bwii mwa mwa.

¹⁰ Ka yi ce_min yi ninga bu welem ne, yi de_Yamba twii ba leendo, pero ciyei_yei yaa miringgu_yiri.

2

Yesu twii kalam yire

¹ Mba kwaraa muwa wa, n woo bala mbir tina palaka bu ning ya welem. Anda ka wu kangge ning welem, yi boo_yi nere_wu kala yiri wei a bonggo_Kwiite, wii Yesu Masiya wu cimacima.

² Yesu yiri yei twii nii du yi kinggi pargu sukom welemdi, buri_yo ne_anda kana wono nere_wu sima.

³ Ka yi ningi pongondi yi teering Yambai, too_jukuyiro kin manggu yi som_yo.

⁴ Kana we_wu ce_kin, <<N som Yamba,>> anda yaa ning pongondi yi teering Yambai, too_baleendo, pero som bu_jire.

⁵ Anda nere_wu ning pongondi yi ciyei Yambai, wii yo_kangman Yamba cimacima. Too_kanda ku yi som wei_min yi boo_pisu naapu yi_yo.

⁶ Kana we_wu ce_kin yo woo_yi naapu yi_Yamba, tagi ba ninga pisu cika ku Yesu Masiya ningau.

Teeri du puci

7 Basimba muwa bu n kangni wa, teeri du n bala mbiri dina, dina du puci ne. Tina teeri du milgai, du bu boo yi tono yake taa yau. Teeri du milga dwii, dwii du bu gacila bu nuwai.

8 Anda kana yito teeri du n bala mbiri do, do du puci, Masiya a jukiya kin teeri dina too jire, mba mwa bu jukiya yito. Dingin kumjila weenggu anda rangu wu manggu a swiigu buru.

9 Nere wu ce kin yo ningu pisu rangu, anda kwaa bagon yo wu ponggu, lama yoko woo ningu pisu a kumjila.

10 Anda nere wu kangman bagon yo, a ninggu pisu wu rang, yaa ku diinu wei bu kangga ba ninga welem.*

11 Nere wu kwaa bagon yo a pisu pu rim, pero a songma a pu rim, som bu pu yo songmau, dingin kumjila a diina yoo kermo.

12 N woo bala mbiri mba kwaraa,
dingin Yamba gacila para mbir sukom welemdi mbiri dingin din Yesu.

13 N woo bala mbiri mba kwiimba,
dingin bu som yo wu yake taa yau.

N woo bala mbiri mba kwatimba,
dingin bu gwala dimbir Balaa Buwai.

N woo bala mbiri mba kwaraa,
dingin bu som Kwiite.

14 N woo bala mbiri mba kwiimba,
dingin bu som yo wu woo yake taa yau.

N woo bala mbiri mba kwatimba
dingin bu boo yi dimbire,
pero ciyei Yambai doo pisu a miringgi gaanggir mbiri pero bu gwala dimbir ninga Balaa Buwai.

15 Bu kangmani ya sima, yi kana yiringi tu miringgi yei. Kana we wu kangman sima, yaa kangman Kwiite.

16 Dingin mwa mwa yiringi tu miringgi simai, cika bu miyam buru, kana ca tu nundi suwi pero kasi, yi yiring tu diin nere lee dwii, too yaa baangai bonggo Kwiite anda twiyongoi sima.

17 Sima yi miyandi yei mwa mwa matir wei, anda kana we wu ning tu Yamba kasi sii wei kana pene pene.

Dikacene a dwii bacemba Masiya wa

18 Kwaraa muwa, tina daandi su cwata goroi, cika ku bu gacila bu nuwa kin, bacen Masiya woo baayi, yoko bacemba Masiya tum a gacila baanga. Too tono yi soma min yi boo daandi su cwata goroi.

19 Pma bu bagu ceri yi Masiya boo cudi yiri nang,

* 2:10 2:10 Lakargarindi su kanggi ce kin yaa tu diinu wei pma ba ninga welem.

anda pma twiyongo cudi yiri, bwii boyiwa ne. Kana pma boo boyiwa wej, lama yoko na boo kem yi yo. Anda pma duu yiro, too jukiya kin pma boo boyiwa ne.

²⁰ Anda mba, Masiya nyii mbir Bawei du Walwal, dingin tono mwa mwa mbiru bu som jire.

²¹ N bala mbira dingin bu som bu jire ne, anda dingin bu soma, pero bu soma jire yaa biri leendi.

²² Wu yi leendi wii we? Wii wu kwaa kin Yesu wii Masiya ne. Nere wu kwaa Kwiite yi Bwiya, wii yo bacen Masiya.

²³ Kana we wu kwaa Bwiya, a kwaa Kwiite. Anda kana we wu lee Bwiya, a lee Kwiite.

²⁴ Mba bu du tu bu tilanga yake taa yau ba si siyau a gaanggu mbiru. Ka bu ning yito, bu ning wej naapu kem yi Bwiya yi Kwiite.

²⁵ A bonggo koo naapu, Masiya ninga yir alkawal yo nyii yir wej piima bu yaa matir wa.

²⁶ N bala mbiri tina a dwii pma bu kasi ba ciyo mbira wa.

²⁷ Anda mba, Masiya a nyii mbir Bawei du Walwal du doo miringgi mbiri, dingin tono bu kasi ya kulum wu kanggi tweeyei. Dingin Bawei juku mbir kana ca, yiringi tu juku mbiri twii jire, twii leendi ne, dingin tono bu je gawure

yi ning naapu a miringgu Masiya.

²⁸ Kwaraa muwa wa, bu ninga pisu naapu kem yi Masiya, palaka yi nuu yaa gwasu kana melma a gawuri wej nyanggu ku waata wau.

²⁹ Ka bu soma min Masiya cimacima, bu somu wej min kana we wu ning tu cimacima twii bol Yamba.

3

Kwaraa Yamba wa

¹ Bu suwa kanda ku Kwiite kang yiro wang, ku nuwa yi yiri kin yi kwaraa Yamba wa. Too tu yi yoogi. Too tu diinai nuwa bu sima wa som yiri bu, dingin pma som bu yo.

² Basimba muwa bu n kangni wa, yoko yi yoogi kwaraa Yamba wa, bo yi som bu tu yi yoo wej. Anda yi soma min ka Yesu waatai, yi yoo wej cika yo, dingin yi kwee wej yo cika ku yo yoogi.

³ Kana wono nere wu woo yi koo manam niu yi Yesu Masiya, sii walwal cika ku Masiya walwal.

⁴ Kana wono nere wu ning welem a yer teeri Yambai, dingin welem twii yerigu teeri Yambai.

⁵ Bu soma min Masiya baa dingin ba deman siyau welemdi yiri, pero a bonggo you, yo yaa welem.

⁶ Dingin tono kana wono nere wu pisu a miringgu Yesu Masiya yaa jee gawure yi ninggu welem. Kana we

wu je gawure yi ninggu welem yaa ku tii kogu you pero som bu yo.

⁷ Kwaraa muwa, kana we ba ciye mbir ya! Kana we wu tum tu cimacima twii nere wu cimacima, cika ku Yesu Masiya yo cimacima.

⁸ Kana we wu je gawure yi ninggu welem wii wu Balaa Buwai, dingin Bala Buwai ning welem yake taa yau. Bol Yamba baa miringgi sima dingin ba woo siyau wurangi Balaa Buwai.

⁹ Kana we wu twii bol Yamba, yaa jee gawure yi ninggu welem, dingin piima bu puci bu Yamba wa boo miringgi yei. Yaa ku jee wei gawure yi ninggu welem dingin yo twii bol Yamba.

¹⁰ Tinaa nyindi su nuwa kurani kwaraa Yamba yi kwaraa Balaa Buwai wa. Kana we wu ning yiri tu yaa cimacima, twii bol Yamba ne, pero nere wu yaa kangman bagon yo, twii bol Yamba ne.

Bu kangman buri mbiri

¹¹ Tinaa ciyei du bu nuwai yake taa yau, yama yi kangman buri.

¹² Yi yoo ya cika Kayinu, yo wii wu Balaa Buwai pero dong a ji bagon yo Abila. Dingin ca a ji bagon yo? A jiyo dingin wurangi yei twii tu bwii anda wurangi bagon yei twii tu nyaayi.

¹³ Ciyamba, bu riyani ya buri ka nuwa bu sima wa kwaambiri.

¹⁴ Anda yo, yi soma min yi yeri boore yi baanga bonggo piima dingin yi kangman kiyaa yuwa. Nere wu yaa kangman kappima, lama yoko woo ku booru.

¹⁵ Kana we wu kwaa bagon yo, twii nere wu laci nuwa. Pero bu soma min yaa nere wu laci nuwa wu yi piima bu yaa matir wa.

¹⁶ Tinaa nyinou wu yi som kanda ku kangam yi tonou, Yesu nyii piima ya dingin yo, yito mwa a daaya yi nyii piima yiwa dingin kiyaa yuwa.

¹⁷ Ka nere wu yi gina kwee bagon yo yi biiki anda kalan bu ne, ba soma kin yo yaa kangam Yambau.

¹⁸ Kwaraa muwa yi jukuri ya kangam yi cewi yi ben tibak, anda yi juki kangam a bonggo wurangi yi jire.

¹⁹ Ka yi kangman buri yi soma min yo yi yooqi bu jire wa. Pero yi tindi wei tiyau a gawur Yamba yaa gwasi.

²⁰ Kana ka gaanggu yiru nyaa yiri dwii welemdi yiri, yi soma min Yamba a gwala dimbir gaanggir yiri pero a som kana ca.

²¹ Anda basimba muwa bu n kangni wa, ka gaanggu yiru nyaa yiri bu ne, yi tindi wei tiyei a gawur Yambai yaa gwasi.

²² Pero kana ca tu yi senggo a bonggo you yi

kinggi wej, dingin yi ning pongondi yi teering yej, pero yi ning tu diraman yo gaanggu.

²³ Pero Yamba nyii yir teeri kin, yi lee jire yi Bol yo Yesu Masiya, pero yi kangman buri yiri, cika ku Yesu Masiya sa yiro yi ninga.

²⁴ Kana we wu ning pongondi yi teering Yambai, sii kem yi Yamba, Yamba mwa sii kem yi yo. Bawei du Yamba nyii yiro a diina yi soma min yo sii kem yi yo.

4

Bawei jirei yi du leendi

¹ Basimba muwa bu n kangni wa, bu lee ya jire yi kana wono wu ce kin yo woo yi Bawei Yambai, anda bu cuu pma. Yikwii bawei pmai baa bonggo Yamba ru? Dingin banabindi leendi wa a twiyongo kana piyau a sima.

² Tina nyinou wu yi kurani wej min nere woo yi Bawei Yambai, kana we wu lee kin Yesu Masiya baa miringgi buri, woo nere woo yi Bawei Yambai.

³ Anda nere wu lee bu yito a dwii Yesu, yaa Bawei Yambai. Bawei du woo yi tonoi dwii du bacen Masiya, bu nuwa kin baa wej, yoko a gacila baa, a miringgu sima.

⁴ Kwaraa muwa, mba bu yoogi bu Yamba wa, bu gwala dimbire banabindi leendu wa, dingin Bawei du miringgi mbiri a gwala bawei du nuwa bu sima wa.

⁵ Pma bwii bu sima wa, dingin tono kana ca tu pma cegu twii tu simai, pero nuwa bu sima wa nuu pma.

⁶ Anda yi yoogi bu Yamba wa. Kana we wu som Yamba kar twiyau yi yo, anda kana we wu yaa yoogi wu Yamba yaa kar twiyau yi yo. A bonggo yito yi som nere wu yi Bawei du jirei yi du leendi.

Yamba kangam

⁷ Basimba muwa bu n kangni wa, yi kangman buri, dingin kangam baa bonggo Yambau. Kana we wu jukur kangam twii bol Yamba pero a som Yamba.

⁸ Kana we wu yaa jukur kangam som bu Yamba, dingin Yamba twii kangam.

⁹ Tina kanda ku Yamba juku yir kangam you, a tumuwe Bol yo yi wundu a miringgi sima, palaka yi nyingga piima a bonggo you.

¹⁰ Tina kanda ku kangam yi tonou, bwii bu yo yi kangman Yamba ne, anda yo kang yiro a tumwe bol yo palaka ba yoo nii dingin pargu siyei sukum welemdi yiri.

¹¹ Basimba muwa bu n kangni wa, yake ku Yamba kang yiro ko, tagi yo mwa yi kangman buri yiri.

¹² Yaa wu tij kogu Yambau, anda ka yi kangman buri, Yamba ninggu naapu yi yo, pero kangam you twangwa a cudi yiri.

¹³ Yi soma min yi ninggu naapu kem yi Yamba, yika

pisu kem yi yo, dingin yo nyii yiri Bawei yei.

¹⁴ Yo yiri yiri, yi ko pero yi nyii seedaki bu kangga min Mbaate a tummuwe Bol yo ba yoo nere wu mir wei sima.

¹⁵ Kana we wu ce kin, Yesu twii Bol Yamba, a ninggu naapu kem yi Yamba, yika pisu kem yi yo.

¹⁶ Yo yir yiri, yi soma pero yi lee jire yi kangam Yambau wu juku yirou.

Yamba twii kangam, kana we wu jukur kangam, a ninggu pisu naapu kem yi Yamba, Yamba yika kem yi yo.

¹⁷ Kangam yoo cimacima a cudi yiri palaka yi nuu ya gwası a nyanggu ku Yamba ning wei balu, dingin yi ninggu pisu naapu yi yo a pina sima binaa, cika ku Masiya yi tonou.

¹⁸ Kana we wu Yamba kangne yaa gwası Yamba. Anda kangam wu cimacima keeri siyau gwası, dingin ka ner nuugu gwası a gwasugu tiigu kuulu a nyanggu balu. Nere wu nuu gwası kangam you yaa cimacima.

¹⁹ Yi jukur kangam dingin Yamba kang yiro gawuriyo.

²⁰ Kana we wu ce kin, yo kangman Yamba, anda kwaa bagon yo wu ponggu, yoogi baleendo. Dingin kana we wu kangman bu bagon yo wu kogu, na puu kangman Yamba wu yaa kogu.

²¹ Teeri du Masiya nyii yiro twii, kana we wu

kangman Yamba, tagi ba kangman bagon yo mwaasi.

5

Gwalgu dimbiri sima

¹ Kana we wu lee kin, Yesu wii Masiya, twii bol Yamba, kana we wu kangman Mbaate kangman Bol yo mwaasi.

² Tina kanda ku yi soma min yi kangman kwaraa Yamba wa, a bonggo kangman Yamba yi pongondi yi teering yei.

³ Ka yi kangman Yamba yi ning pongondi yi teering yei. Pero teering yei yaa buu.

⁴ Kana we wu twii bol Yamba a gwala dimbir wurangi tu bwii tu simai. Wunaa dimbiri wu gwala dimbir sima, twii leegu jire yiru.

⁵ Wu gwalu wei dimbir sima we? Kopo nere wu lee jire kin, Yesu twii Bol Yamba.

Seedaki a dwii Yesu Masiya

⁶ Nuwa juku Yesu Masiya twii Bol Yamba, bonggo batisima yo yi gundu pero yi pargu siyei tiima ya a yeu, yaa bonggo gundu yi wundu tibak, anda kem yi gundu yi tiima. Bawei mwaasi a nyii seedaki too woo too jire, dingin twii Bawei du jire.

⁷ Woo yi seedakindi kunong bu nyii seedaki kin Yesu twii Bol Yamba.

⁸ Bawei, yi gundu, yi tiima pma nyii seedaki wiino.

⁹ Yi lee yi seedaki nuwa, anda seedaki Yamba a gwala

mwa mwa, too seedaki wu Yamba nyiia a dwii Bol yei.

¹⁰ Kana we wu lee jire yi Bol Yamba woo yi woo seedaki a miringgi gaanggu you, anda pma bu lee bu jire yi Yamba, a de twii baleendo, dingin yaa ku lee jire yi yiri tu Yamba ce a dwii Bol yei.

¹¹ Seedaki wii kin, Yamba nyii yir piima bu yaa matirwa, piima binaa a miringgi Bol yei.

¹² Kana we wu woo yi Bwiya woo yi piima, anda kana we wu yaa Bol Yamba yaa piima.

Piima bu yaa matirwa

¹³ N bala mbira tina yiri, mba bu lee jire yi Bol Yamba wa, palaka bu soma min, bu boo yi piima bu yaa matirwa.

¹⁴ Yi tin tiyendi a gawur Yamba yaa gwasid dingin yi soma min nuu yiri ka yi senggi kana ca cuungi dangandi yei.

¹⁵ Yake ku yi soma min nuu yiri ko, yi soma min yo nyii yir kana ca tu yi senggo.

¹⁶ Ka kana we kwee bagon yo ninggu welem wu yinnibu boori ne, ba ce kuru a bonggo Yamba pero yo nyii wei piima pma bu ninga welem wu yinnibu booru. Anda pma bu welem pmaw yinno booru, n ce bu min bu ce kuru dingin koo duu nuwau.

¹⁷ Ninggu kana ca tu bwii twii welem, anda woo yi welem wu yinnibu boore.

¹⁸ Yi soma min kana we wu twii bol Yamba, yaa jee gawuri yi ninggu welem, dingin Bol Yamba sweri pma, palaka Balaa Buwai ba mwani ya yo.

¹⁹ Yi soma min yi kwaraa Yamba wa, kana ku sima binaa a wai Balaa Buwai.

²⁰ Yi soma min Bol Yamba a baa a nyii yir somandi dingin yi som Yamba, yo wu twii jire. Yo mwa yi boo ning naapu yi yo wu twii jire, pero yi boo ning naapu yi Bol yo Yesu Masiya. Yo twii Yamba wu jire pero yi piima bu yaa matirwa.

²¹ Kwaraa muwa, bu ta dwii mbiri kundi bu cwaa kana ca tu demanu wei gaanggu mbiru a bonggo Yambau.

2JN

Ciima

¹ Wuna lakargar twiiwe bonggo mu nere wu gira wu ikkilisiya.

N balaman nuru wu Yamba seka kem yi kwaraa ya,* wu n kangman pma ku manggu. Buri mi yi wundu ne, anda mwaasi yi pma bu som jire wa.

² Yi kang mbiri dingin jire wu gaanggu yiru, pero sii wei kem yi yo kana pene pene.

³ Boo niyu yi bunam yi pidau gaanggu wu Yamba Kwiite yi Yesu Masiya Bol Yamba ba siya kem yi yo a miringgi jire yi kangam.

Jire yi kangam

⁴ N ninga buri degdeg ku n nuwa kin kwaraa ma bu kangga boo ponggu jire, cika ku Yamba Mbaa yire sa yiro kin yi ningau.

⁵ N woo senggu mo, nure, yi kangman buri mwa mwa, too teeri du puçi ne, doo du yi boo yi tono yake taa yau.

⁶ Kangam wu jireu twii yi ninga tu Yamba ce kin yi ningai. Teeri du bu nuwa yake taa yau, twii bu ninga pisu kangam.

⁷ N ce yito dingin nuwa bu ciyeni nuwa tum a twiyongo kana piyau a sima bina.

Pma bu lee bu kin Yesu Masiya a baa miringgi buri cika nere. Koo duu nuwau too nuwa bu ciyeni nuwa wa pero yi bacemba Masiya wa.

⁸ Bu ruun tuwe, dingin bu bwiyani ya wurai du yi ningai a bonggo mbiru, palaka bu nyingga woriri mbiri cimacima.

⁹ Kana we wu tiini bu tu Yesu Masiya jukuya anda cwata yiri tu kanggi, woo nere yaa Yamba. Anda nere wu tiina yiringi tu Masiya jukuya, woo yi Mbaate yi Bwiya.

¹⁰ Ka nere wu kanggi baa jukugu mbiri yiringi tu kanggi tweeyei yi yiri tu Masiya juku mbirai, bu yiri ya pma a laandi mbiri, pero bu ciri ya pma.

¹¹ Kana we wu ci pma a teca dwii yi pma a bonggo ninggu wurangi pmai tu bwii.

Ninggu yorangau

¹² N woo yi yiring tum tu n sambiri wei, anda n yaa kasi n bala mbira a lakargar tibak. N danggigu n kaca mbuwe, ba yi ce ciyei yi nunge yi nunge, palaka buri degdeg yiru ba twangwa.

¹³ Kwaraa ciya mo wu nure wu Yamba seka boo cigu mou.†

* **1:1 1:1** Nure yi kwaraa ya, pitindi yei twii ikkilisiya yi nuwa bu pongguwa. (Yito mwa yi bonggo ciyei 4 yi 5) † **1:13 1:13** Kwaraa ciya mo wu nure. Yo tungu ciima bu baa bonggo ikkilisiya wu yo twiiwe miri.

3JN

Ciima

¹ Wuna lakargar twiiwe bonggo mu nere wu gira wu ikkilisiya.

Aari bonggo basin mi Gayus, wu n kangni ku jirau.

² Basin mi wu n kangni, n woo cemin kuru min kana ca ba aara cimacima pero ma kingga buri cingcing, cika ku ma cingcing a miringgi bawei.

³ N ningga buri degdeg wang, pu nuwa bu ponggu bu kangga baanga sangge jire wu mai tono, pero yi kanda ku ma woo ponggu jire kana pene pene.

⁴ Yaa tu diingini ninggu buri degdeg wang, cika ka n nuwi kin kwaraa muwa boo ninggu pongondi yi jire.

Nuwa wandi Gayus

⁵ Basin mi wu n kangne, ma woo yi jire a bonggo wurangi tu ma woo ningaman kiyaa ma bu ponggu wa, kana ku pma twii runguwa.

⁶ Pma ba sa ikkilisiya wu pina kangam wu ma juku pmau. Kamkam ma kalanga pma, ba je gawure yi songma pma a nyinou wu Yamba nuu wei teng you.

⁷ Dingin pma twiyongo ba wasi din Masiya, pero pma yaa yiri kalanggu a bonggo nuwa bu yaa ponggu wa.

⁸ A daaya yi kalanga koo duu nuwau, dingin yi teca dwii kem a miringgi wurai du jirei.

Diyotiripis yi Demetiriyus

⁹ N balaman ikkilisiya lakargar, anda Diyotiripis a kwaa ba yi ciyei yiri dingin yo kasi giru.

¹⁰ Ka n baai, baa n puru wei tu ninggi, yi cewi tu bwii tu leendi tu cei dwii yiri, bur too yi wundu ne, bambam a kwaa yigu kiyaa bu pongguwa bu baanga wa, pero a ja pma bu kasi ba yi pma wa, a kee pma a miringgu ikkilisiya.

¹¹ Basin mi wu n kangne, ma tilani ya tu bwii, anda ma tilanga tu nyaai. Kana we wu ning tu nyaai wii wu Yamba. Anda yo wu ning tu bwii som bu Yamba kana banyina.

¹² Kana we cee tu nyaai a dwii Demetiriyus, jire yiri yei a nyii seedaki a dwii yei. Yo mwa yi nyii seedaki, pero ma soma min tu yi ce twii jire.

Ninggu yorangau

¹³ N woo yi yiring tum tu n sa mini wei, anda n yaa kasi n bala mina a lakargar tibak.

¹⁴ N danggigu n kaca muwe pina yi jor banyina, yi ce ciyei nunge yi nunge.

¹⁵ Yama pidau gaanggu ba siya kem yi mo. Basimba ma mwa mwa boo cigu mou. Ma ci basimba yiwu bu poo wa kana woño wiino.